

JESUS JXKAAHNISAWE'SX DXUS YUWE'S PTA'SXNI

Dxus Espiritu's kaajxa' neeyüuni

1 ¹Jesusa' nyafxte kīhwa kaapiya'jna kījīhwa ew yūuk cielute tejkapkaçx txā'sna, Teofxilo, idxna pta'sxna adx libru nyafxte fxi'th. ²Txā' cielun u'jmey, piçthē'jwe'sxtxi txhitxhku jxkaajxa', sa' ma'wēçxah yūuwa'ja'swa kaapiya'kh Dxus Espiritu pu'çxte. ³Sa' uuniijū ki' itxi kiiteçxa', nyafxī na'wēyçxáak petx kakwe yā'jçxa txāawe'sxtxi vxyaana ūsu' kuarenta entepkaçx. Txā'wē itxi yuuyuhga sūhna ew jiyukahnku txā'wē vxyaana ūsu', sa' Dxus ma'wē jxkaahwa'ja'swa pta'sxnak ūsu'. ⁴Sa' cielun u'jya'waçxa', txajx txhitxhnisawe'sx yakh nee ūsī, Jesusa' neewe'wek Jerusalen çxhabuh u'jmée ūskahn na'jīna:

—Mūyhaswe, adx Tata kaajxa' neeyüuk txā's jxpa'gapkaçx, adx i'kwe'sxtxi pta'sxthu txā'sna. ⁵I'kwe'sxa' jii i'kwe Juana' naasáa yu'teçxáak akhna bautisaī'. Nawa i'kwe'sxa' Dxus Espiritute yuu bautisāyñi yuune'kwe jxukaysa ja'daçxah txaçxmeyna jīnak we'we.

Jesus cielun sxawedni

⁶Txajū' Jesus txhitxhnisawe'sxa' txāa yakh ūsçxa', paapējxtxi:
—Äçxha' idx wáa naa ensu Israelwe'sxtxi romanowe'sx kuseju nwe'wewa'jsane'ga jīte', ⁷Jesus paççxa':

—I'kwe'sxa' jiyuwa'jsamée i'kwe Israelwe'sxtxi nwe'wewa'j en bagaçxtewa. Dxus kwe'sx Tata yuuçxáa txā'wē yūuwa'j ena's jīia'. ⁸Nawa Dxus Espiritu kīhte', txāa yu's jxpa'gawa'jsa yuji'kwe, kīhtewa jxuka ājaya'. Sa' txā'wē yūuniijū kasehçxa u'jwene'kwe adxa's tuuthe'jya' Jerusante, Judea kiwesu, vxite' Samaria kiwesu mtee mtee maa kiwetewa jxuka jīnak jxkaah.

⁹Txā'wē we'wena jxā'jnijū txaçxmeyna, txāawe'sx thegna ūsiyna Jesusa' ēete kiisnik yuu cielun pe'jna u'jya'. Naapkaçxha' táaph kūhçxa aphku, aça' peena yu' vxyaame'. ¹⁰Txā'wē Jesusa's cielun pe'jna u'jweçte', txāawe'sxa' cielute pagayna ūsiyna, e'z piçthē'j ropa çxihmesa athçxa txāawe'sx pukatetx vxyaa. ¹¹Txā'wē vxyaaçxa', na'wētx we'we:

—Galileajuwe'sx, çkîh yuupa'ga cielute pagayna ũskwe? Jesusa' i'kwe'sx ksxavxyuh ma'wê cielun u'jweçtektewe uy, txã'wëyçxáa ki'kin kîijana txãafiçxáa jînatx pta'sx.

Judas pa'gate Matias txhitxhni

¹² Txajü' thã'j Oliwos yaasesaju u'jtx Jerusalen çxhabna sxawedna. (Txãa Oliwos vxîça' Jerusalen utxak yu' teeçx kilometroçxáak âh jxu'j neeyü'.) ¹³ Jerusالente pa'jçxa', txãawe'sx paadeeni êe yatte tejkatx Pedro, Jakobo, Juan, Adres, Fxelipe, Tomás, Bartolomé, Mateo, Jakobo Alfxeo nçxi'k, Simon kananista ju'gusa, vxite' Judas Jakobo nyakh txãawe'sxtxi yu'. ¹⁴ Txãawe'sxa' kxteetx tahtatey pkhaakhe' Dxus yakh puutx we'weya' jxukaysa yakh, Jesus nyakhwe'sx vxite' nji'j Maria, txã'wëy vxite u'ywe'sx yã'jçxa.

¹⁵ Txãn ensuk Pedro' kxtee pkhaakhesawe'sx ciento weinte ksxavxyte yujuçxa na'jî:

¹⁶—Yakhthê'jwe'sx mjiyuwe: Judas ewmêe yûuwa'ja's Davxida' fxi'kh Dxus Espiritu kaaüusuthe'jni's Dxus librute txã' kxtey yuwa'jsa yuh yu'ne'. Txajîk Judasa' Jesusa's preesu'jwa'jsatx pe'jna kühçxa dukh.

¹⁷ Judasa' kwe'sx yakh u'jusak yu', txãasak kwe'sx na'wëy mjîiwa'jsa yu'.

¹⁸ Nawa Jesusa's txweyni vxyuju kiwek wey, sa' kxteek têekhêe dxiktheju sutenus wete, aç'a' meetu'ja' jxuka ubuk. ¹⁹ Txajü' Jerusالentewe'sxa' txã'wë yûuni's jiyuçxa', txãa kiwe's Akêldama yasetx ki'p, txãawe'sx yuwete yu' Ee pkawni kiwe jînik yu'. ²⁰ Judas uuwa'ja's we'weçxak Salmo librute na'jî:

Txãa yatte u'pwa'jsa kim yuhwa neeyüumeetxna,

Aç'a' txajx yata' namu ji'phmêe peekx neeyüuna jî'k.

Vxite ajkhêwa na'wë fxi'jni':

Txajx mjîiwa'ja's vxite tee mjîi jîna fxi'jni'.

²¹ Txãa pa'ga kwe'sx ksxavxyte piçthê'j üsta' kwe'sxtxi jxpe'jsa Jesus makwe txaçxne' kwe'sx yakh üsu' txagaçxhîi txutemêe pi'kxna u'jusa.

²² Txãawe'sxa' Jesusa's Juan bautisäynijüjx uyya' takhçxa cielun u'phkaçx uysaata' txãatx teeçx txhitxhiga, Jesus îtxi yuuni's tuuthe'jna kwe'sx yakh fxi'zewa'jsa jîk.

²³ Txajü' e'ztxi pakweçxa ki'p, José Barsabás yaasesa's txã'sna îiçxáa Justo jînatx kxsuusuu', vxite' Matiasna. ²⁴ Sa' na'wëtx Dxus yakh puutx we'we:

—Idxa' maa maa nasa üus yaakxni'swa jiig. Kwe'sxtxi meen mkhiyu'j naa e'zsatx maaçxahtxga txhitxh, ²⁵ Judas pa'gatewe'sx, na'wë Judas txajx mjîia's nvxihtçxa vxituk txajx pkalpa'ga txãa mjîia's jxpa'gawa'jsa jînatx Dxus yakh puutx we'we.

²⁶ Txajü' swerte kaahxt kiim yase kasehtewa jiyuya', aç'a' Matias yasek kaseh. Txajüjx Matiasa' oncesawe'sx yakh utxaak pi'kxna u'juya'.

Dxus Espiritu kiini

2 ¹Pentekostes fxiesta en ähte!, jxukaysa kxteeçxaçxáatx pkhaakheçxa üsu!. ²Naapkaçxha' cieluju wejxaa wala na'wë susna kiñçxa txäawe'sx üsni yatte jxuka utak. ³Naapkaçxha' ipx beeni na'wësatx jxukaysa kajkwesu vxjaa. ⁴Aça' jxukaysa ja'daçxah txäawe'sx üuste Dxus Espiritu yuuçxaçxáa jxuka khéete!, txä'sna jxpa'gaçxa maa nasa we'weni yuwe'swa we'weya' äjatx, Dxus Espiritu maa yuweju we'wewa'ja's jxkaathe' txäaju.

⁵Txän ensu! Dxus jxkaahni's nwëese'jsa judiuwe'sx maa maa kiwejúwa pa'jçxatx üsu! Jerusalente. ⁶Txajü' txäa seena' susni's wëse'jçxa', nasa jxukaysa pkhaakhetx. Sa' txä'wë teeçxsa na'wëçxah txäawe'sx we'weni yuweju we'weni's jiyuçxa', wala kuh yajkxna neeyüutx ⁷¿Ma'wëçxaki'tx txä'wë yüu? sühna. Sa' txäawe'sx pwe'sx na'jīnatx puutx paapëyi':

—Na'wë we'wena üsta' txäawe'sxa' jxukay ¿Galileajuwe'sxmeetxná'? ⁸Sa' ¿ma'wëçxata nasa iisa kwe'sx yuweju we'weya' äja'? ⁹Ayte üstha'w Partiajuwe'sx, Mediajuwe'sx, Elamjuwe'sx, Mesopotamiajuwe'sx, Judeajuwe'sx, Kapadociajuwe'sx, Pontojuwe'sx, Asia kiwejúwe'sx, ¹⁰Fxrigia vxite' Panfxilia kiwejúwe'sx, Egipto vxite' Afxrika Cirene kiwetewe'sx, txä'wëy Romajuwe'sxwa ayte üstha'w. Maafi' yu' upxhī judiuwe'sxtha'w, aça' vxite' judiimeeçxawa judiuwe'sx na'wëy Dxus jxkaahni's nwëese'jsa üstha'w. ¹¹Txä'wëy Kretajuwe'sx vxite' Arabiajuwe'sxwa üstha'w. Nawa jxukaysa Dxus yuwe zhiçxkwesa'stha'w wëse'je!, kwe'sx we'weni yuweju pta'sxpa'ga jī'tx. ¹²Txä'wë yūuni's jxukaysa wala kuh jwed we'wena üsu'tx na'jīna:

—¿Kīh yūuya' txä'wë yuuçki? jī'tx. ¹³Naapkaçxha' vxite yu' açewe'wena npeevxysxijkana na'jī'tx:

—Naawe'sxa' vxino pus tudxçxa tüuçxa txä'wë we'wen üsta' jī'tx.

Pedro nyafxçxah nasatx we'weni

¹⁴Txajü' Pedro' Jesus jxkaahnisawe'sx oncesa yakh yujuçxa sus we'wena na'jik:

—Judeatewe'sx vxite' Jerusalentewe'sx i'kwe'sxa' ew jiyuçxa neeyüuya' ew mwëese'jwe adx pta'sxya'wath txä'sna: ¹⁵Naa piçthē'jwe'sxa' tüunitxna jī'i'kwe nawa txä'wë meeta!. Kusī las nweweçxá' aça' ¿ma'wë tüuni yuukxtha'w? ¹⁶Na'wë yuuk txä' Dxus yuwe pta'sxsa Joel we'wek txäak kxtey yuu. Txä' na'jī'k:

¹⁷Dxus we'weçxa':

Nmeh ensu!, adx Espiritu's naa kiwete nasa jxukaysatx makwewa üsu'nja,
Aça' i'kwe'sx nçxi'k i'kwe'sx niisa txäawe'sxa' adx yuwe's pta'sxitxna.

Naapkaçxha' piçtakxwe'sxa' cieluju zhiçxkwesa vxyaani's uyuutxna, Aça' thē'jsawe'sxa' ewsa ksxa'utxna.

18 Sa' adxa's selpisaaawe'sxtxi piçthē'j ma'k yuu meeçxa' u'y ma'k yuu nawa txāawe'sxtxi adx Espiritu's makwewa ūsu'nja, adx yuwe's pta'sxkahn.

19 Txajū' cielujū kim yuhwa uynimeesa zhiçxkwesa kaavxya'ja'ja'nja: Sa' naa kiwete' ūukhūukhsa kaavxya'ja'ja'nja: ee, ipx wala, aah wala txā'wēsatsx.

20 Aça' seka' kus na'wē çxhi'dxina, a'tewa ee na'wē beh yuuna. Nawa kwe'sxtxi nwe'wesa kīwa'j en zhiçxkwesa āhmeyna txā'wē yuuna.

21 Aça' maawa jxukaysa Dxusa's neewe'wena fxi'zesa' txāa ente' nwe'weni yuutxna jī'k.

22 Āçxha' Israelwe'sx mwēese'jwe na'jīya'wath: Jesus Nasarethūwe'sx Dxus kaahnisa i'kwe'sx ksxavxysu kījkiħwa ewsaçxaçxáanak kaavxya'ja'j āçā'satsx nuykatxhina, uusaatx itxi vxitna Dxus pu'çxte, Jesukristo' txā'wēk yūu. Txā'wē yūuni's jīiyā'jne'kwe. ²³Nawa txā'sa' kluuste fxuççxa ikhkahn i'kwe'sxa' dukhi'kwe nasa ewmeesa kusete. Txā'wē uuwa'ja's Dxusne' txhitxçxa nvxiht txāniitey, txāa pa'ga i'kwe txā'wē yūu. ²⁴Nawa Dxusa' ki' itxi vxitçxa uunfi seena' ūukhūukhsaju kutxi'kh, txāa pa'gately ikhsa' bagaçxtewa uuniixçaa jī'phuya' yu' ājawa'jsameek yu' naa pa'ga. ²⁵Jesus uuçxa ki' itxi yuuwa'ja's Davxida' na'jīnak pta'sx:

Adxna jxpe'jsa' bagaçxte yuhwa pu'vxitumée adx yakh nesku yu'. Txā' adx pukate ūsa' paçu ju'gte, kīħ yuhnawa ūukhkahmén adxa's nwe'wena.

26 Txāa pa'gak adx ūuste txakwe wala weçxweçxa ūusuthe', aça' weçxaawa'j yuuçxá'sthu we'we'.

Txāa pa'ga adx kakwe' ki' itxi kiiteena sūhnaçxáa skhēwu'nja,

27 Txāa pa'gately idxa' adx ūusa's uusaawe'sx ūsnite nvxihtmeene'ga, Sa' idxa's selpisáa kakwe'swa suweepkaçx yu' khikhmeene'ga.

28 Pçuwa'jmée itxi ūswa'the pa'jwa'ja's kaapiya'jg,

Sa' iidx ūsnite weçxana ūswa'ja's yuuçxáa ūsune'ga jīna fxi'jñi'.

²⁹Yakhthē'jwe'sx ew mjīyuwe: Na'wē kwe'sx yaçgawe'sx Davxid we'wek txā' peekx uuwa'ja'siíçxáa txā'jī'çme'. Txā'wēmeete íçxáa Davxid uute' pedaatx, aça' txajx kakwe' txkaa ūsa' pedaní āçxpkaçx. ³⁰Nawa Davxida' Dxus yuwe pta'sxsak yu'. Txāasak jii yu' Dxusa' teeçx ūsya' puutx we'wek txajx jī'thewe'sx txā' Kristok yu' Davxid na'wēy jxkaahwa'jsa txā'snak jii yu'. ³¹Kristo uuçxa itxi kiiteeçte uyna ūssa na'wēk pta'sx Davxida'. Txāasak na'jī: txajx ūusa' uusaawe'sx ūsnite neeyūumeena, aça' txajx kakwe kha'txwa suweemeena. ³²Davxid we'we'k Jesus txā'snak Dxusa' uuniijūwa ki' itxi vxit, aça' kwe'sxa' jxukaysa uysaatha'w, txāasa ew jiitha'w. ³³Sa' txāa Jesúsíik Dxus pukate paçu ju'gte kāhpkaçx pe'jna u'jñi

yuu. Sa' kxte! Ney ũsya' neeyũuk txajx Espiritu's txã'sa' jxpa'gaçxak txãa Espiritu's kwe'sxtxi makwewa ũs. Aça' txã'si'kwe i'kwe'sxa' jxuka uyna wëse'j. ³⁴Davxid txã'wë cielute tejkame!, txajjik Davxidíwa na'jji':

Dxusa' adxna jxpe'jsa's na'jik:

Adx pukate paçu ju'gte mkaaçx,

³⁵Idxna açesatx idxçxaçxá's nwëese'jwa'ja's vxitna jxã'phkaçx jik.

³⁶Israelwe'sx jxukaysa ew mjiyuwe: Naa Jesusa's i'kwe'sxa' kluuste kaafxuçu'ji'kwe txã'snak Dxusa' Kristo jxkaahwa'jsa vxit.

³⁷Txã'jina pta'sxte wëse'jçxa', ũuste wala nxus yajkxtxi. Sa' Pedrowe'sxtxi pëjxtxi:

—Yakthê'jwe'sx, açxha' çma'wë yũukxtha'w? jite!, ³⁸Pedro pasçxa':

—I'kwe'sx pkaltxi nvxihtçxa, Dxus tasxte misxawedwe, sa' Jesukristo's ũuste jxpa'gaçxa yu'tewa ya'bautisäywe, kxah i'kwe'sx pkaltxi peltunäyni yuuna. Txã'wë yũute!, i'kwe'sxtxiwa Dxusa' txajx Espiritu's ũsuna.

³⁹Txãa pa'gatey Dxusa' txajx Espiritu's ũsya' neeyũuk txã' i'kwe'sx jii petx i'kwe'sx luuçx jii yã'jçxa', sa' maazkuëesa majũwe'sxwa ũstxna Dxus pa'yanisa txãawe'sxwa jxpa'gaxna jik.

⁴⁰Txã'wë we'wena wala yu'kxpejk Pedro' na'jina:

—Nasa ewmeesa ksxavxyte jxpubana fxi'zemée Dxus tasxte mutxaawe ewte neeyũuya' jinak pta'sx. ⁴¹Aça' Pedro pta'sxni's nwëese'jçxa yu'te ya'bautisäytxi. Txãa ente' tekh mil ähtx Kristo's jxpa'ga. ⁴²Sa' Pedrowe'sx kaapiya'jni's piyaçxa', jxukaysa Dxusa's çxhãçxha yajkxnax neeyũu. Sa' txutemée kxteeçxaxt pkhaakhena fxi'ze!, Dxus yakh puutx we'wena, ũ'wa'ja'swa kxteeçxah ũ'na.

Puutx kxteeçxah ewçxáa fxi'zeni

⁴³Txajũ' nasa jxukaysa wala kuh yajkxna ũsu'tx, naapkaçxha' Pedrowe'sxa' aça'satx nuykatxhina kim yuhwa äjanimeesa'swa kaavxya'ja'jnatx ũsu'. ⁴⁴Jxukaysa Kristo's jxpa'gasa' txutemeetx kxteeçxah fxi'ze!, sa' kih ji'phuni'swa ja'daçxaçxáatx puutx peesu'sna fxi'ze!. ⁴⁵Sa' txãawe'sx ji'phuni's txweyçxa vxyu's kxteeçxah pkhakhçxatx peejiina fxi'zesatx peesu' txãawe'sx peejini's pu'çxna. ⁴⁶Een isatx dxuus yatte pkhaakhe!, sa' ũ'wa'ja's yu' yat iisatx pi'ki' ũusuh jxuka weçxana, ⁴⁷sa' Dxusnawa txã'wëy weçxana. Txã'wë yũute!, nasa' txãawe'sxtxi' wala ew we'we'tx. Aça' Dxusa' een isak txajx luuçxtxi' nuypehnana u'jwe' ewte neeyũuwa'jsatx.

U'juya' äjäsamée dxuus yat vxitxte katxhini

3 ¹Teeçx ente' Pedro Juan yakhtxi dxuus yatte küjuç yu', kusuçte las treste Dxus yakh puutx we'wewa'j orate. ²Kxte! teeçx piçthê'j upxhí çxida puuple u'juya' äjasameek u'p yu'. Txã'sa' een isatx yakhna kũhçxa dxuus yat Vxixt Zhiçxkwesa jínisa pukate ki'pu' kxtee nasa u'kasatx

Imusxnu pe'wna u'pkahn. ³Txãa puuple' Pedro Juan yakh dxuus yatte u'kaya' kūjuçte uyçxa', Imusxnu thãasku. ⁴Aça' Pedrowe'sxa' txãa puuple dxi'pte ew thegçxa', Pedro' na'ljik:

—Mtheg kwe'sxtxi jite', ⁵txãa puuple' çkîh peesya'watxki? sũhna ewku txãawe'sx dxi'pte theg. ⁶Aça' Pedro we'weçxa':

—Vxyu yu' kîh yuhwa ji'phmeeth. Nawa adx ji'pthu txã'sçxáawa peesu'nja: Jesukristo Nasarethũwe'sx idxa's açxhíi nuykatxhina aç'a kiiteçxa ew mneeyũ jĩna'wa, ⁷Pedro' paçu kusete uwena' pu'kisku, aç'a naa dudtey fxidxa' ku'lete', çxida' jxuka ewtxi neeyũ. ⁸Txajũ' txãa aç'a'sa' ũphçxak kiite, sa' u'juya' ajaçxa txãawe'sx yakhĩi dxuus yatte u'kak, ũphũuphna Dxusna weçxana tuuthe'jna. ⁹Txajũ' txãa çxida puuple' txã'wẽ ũphũuphna Dxusna weçxana yuute nasa jxukaysa uyçxa', kuh yajkxna ũukhtxi. ¹⁰Txãa nasa' çxida puuple's jiitx yu' txã'wẽ dxuus yat Vxitx Zhixkwesa jĩnisa pukate kaççxa Imusxnu thãasna u'psate.

Dxus yuwe's Pedro pta'sxni

¹¹Çxida puuple u'juya' ajasameeçxawa katxhiyã'jçxa', Pedrowe'sxtxi uweçxa txhweetemée u'jute', nasa jxukaysa wala kuh yajkxna Pedrowe'sxtxi thegya' seena' wala kuh pkhaakhetx dxuus yat pwa' Salomon jii jĩ'tx kxtee. ¹²Txã'wẽ nasa pkhaakhete', Pedro' na'ljik:

—Israelwe'sx, çkîh yuupa'gakwe i'kwe'sxa' txã'wẽ ũukh we'wena kuh yaaki'? Naa piçthẽ'ja's kwe'sx txã'wẽ Dxus na'wẽ nuykatxhiçxa ew u'juwa'ja's peesuçthas i'kwe yajkxna kwe'sxtxi thegu'. ¹³Mwẽese'jwe: Kwe'sx yaçgawe'sx Abrahan, Isaak, Jakob txãawe'sx Dxusa' txajx Nçxi'k Jesusa's cielute seena' jxtulthesa vxitku na'wẽ i'kwe'sx yu' ahççxa jxkaahsa Pilato kusete dukhi'kwe. Aça' Pilato yu' txhweeteya' yajkxtewa, i'kwe'sx yu' kaatxhweete'jmée i'kwe, ¹⁴wejxwa kîhwa yuuwemeesa', mitxhwete jipkaçxte, i'kwe'sx yu' teeçx piçthẽ'j wala yuuwesa ewmeesaçxá's i'kwe txhweete kaah. ¹⁵Txã'wẽ yũuçxa i'kwe'sxa' Jesus itxi kaafxi'ze'jwa'jsa yu'sa' kiikhe'ji'kwe. Nawa Dxusa' txã'sa' ki' itxi vxitni's kwe'sxa' uysaatha'w, txãasa jiitha'w. ¹⁶Txãasatha'w Jesusa' nuykatxhina sũhçxa txajx yase's kxsusna pi'kx, naa piçthẽ'j i'kwe'sx jiyunisa's nuykatxhikahn. Txãa Jesus nuykatxhipa'ga yuuçxáa naa piçthẽ'ja' jxuka ew katxhite', i'kwe'sx jxukaysa uyna ũsi'kwe.

¹⁷Yakthẽ'jwe'sx, txã'wẽ yũui'kwe nawa jiimeeçxane'kwe txã'wẽ yũu sũju'th, txã'wẽy jxkaahsawe'sxwa jiimeene'ta yu'. ¹⁸Nawa i'kwe'sx txã'wẽ yũuwa'ja's Dxusa' yaçtey pta'sxku txajx yuweet pta'sxsawe'sxtxi na'ljina: Kristo' wala pxthaa pa'ga yuuna jĩna aç'a' txã' kxtey yuukahn i'kwe txã'wẽ ikh. ¹⁹Txã'wẽ yũupa'ga Dxus tasxte sxawedçxa i'kwe'sx pkalpa'ga perdon mpẽjxwe txãa pkaltxi khũkhni yuuya'. Txã'wẽ yũuçxa' weçxana ũswal'j ena's ji'phune'kwe, ²⁰Dxus kaahni Kristo Jesus jxkaajxa' kũhte. Txã' i'kwe'sxtxi ew yũuwa'jsa' jĩnik yu' txãni' entey. ²¹Açxhíi

yu' Jesukristo' cieluteçxáa ũswa'jsa', Dxus naa kiwete kīhnawa jxuka pheu'phkaçx. Nyafx entey Dxus yuwe pta'sxsawe'sx txã'wēt̃x Kristo' naa kiwete jxkaajxa' kīiwa'jsa' jīna pta'sx naa pa'ga txã' kxtey yuuna. ²²Txã'wēy Moiseswa na'jik: Dxusa' i'kwe'sx jī teeçx kaajxa'wa' i'kwe'sx ji'thewe'sx txajx yuwe's pta'sxwa'jsa, adxa's ma'wēga kaah txã'wēy. Txã's mwēese'jwe, ma'wē jxkaathewa jxuka kxtey yuuna. ²³Txã'wēme', maawa Dxus yuwe pta'sxsa's nwēese'jsame', Israelwe'sx tasxuh txudeni neeyūuçxa jxukaysa vxituwa'tha' jik.

²⁴Ew mjiyuwe: Dxus yuwe pta'sxsa Samwel fxi'zenijūjxwe'sx jxukaysatx açxh naa ensu Kristo kīiwa'ja'sçxaçxáa we'wena pta'sx. ²⁵Aça' i'kwe'sxa' Dxus yuwe pta'sxsawe'sx ji'jī'kwe, sa' txã'wēy Dxusa' txāniitey Abrahan yakhwa puutx we'wek i'kwe'sxtxi ew yūuwa'ja's na'jīna: Naa kiwete nasa' jxukaysa bediciona's jxpa'gatxna iidx ji'l pa'gate jīna we'wek txã'snawa jxpa'gasai'kwe. ²⁶Txajíik Dxusa' txajx Nçxi'ka's nyafxte' i'kwe'sx tasxte khuē'yku kaah i'kwe'sxtxi nwe'wekahn, kxah i'kwe'sxa' teeçxsa na'wēçxah ewmēe yūuni's nvxiitkahnku txã'wē yūu jik.

Pedro Juan yakh judiu npiičthē'jwe'sx tasxte kuutxa'jni

4 ¹Pedro Juan yakh nasatx we'wena ũsiyna, sacerdotewe'sx vxite' dxuus yatte thegsawe'sx npiičthē'j vxite' saduceo txāawe'sx pa'jtx tud-ya'. ²Txã'wē Jesuswa ma'wēga itxi yuu txã'wēy uusaawe'sxwa itxi yuuwa'ja' jīna Pedrowe'sxa' nasatx kaapiya'jna ũste jiyuçxatx wala ũusaçxana pa'jçxa, ³preesu'jçxa karcelte kxuuph kusuuspkçaçx, kusuçyā'kh yu' naa pa'ga. ⁴Nawa Pedrowe'sx pta'sxni's wēse'jçxa Kristo's jxpa'gasa yu' seena' wala kuh yu'tx, piçthē'jçxáatx isani cinko miltxi yu'.

⁵Kusuus enkhē' judiuwe'sx npiičthē'jwe'sx vxite' judiu nthē'jsawe'sx vxite' Dxus ley kaapiya'jsa ⁶vxite' sacerdotē npiičthē'j Anas vxite' Kaifxas, Juan, Alejandro vxite' jxukaysa sacerdotē npiičthē'j nwe'sxwa pkhaahetx Jerusalente. ⁷Sa' Pedrowe'sxtxi pe'jya' kaahçxa txāawe'sx ksxavxyte txahçxa paapējxtxi:

—¿Kim pu'çxtekwe na'wē yūuya' āja'? meeçxawa ¿kimga jxkaah? jīte', ⁸Pedro' txajx ũuste Dxus Espiritu's jxuka ji'phçxa', na'wēk pas:

—Judiu npiičthē'jwe'sx, Israel nthē'jsawe'sx: ⁹I'kwe'sxa' paapēyi'i'kwe kwe'sx ma'wē yūuçxa naa aça'sa's nuykatxhitewa jiyuya'. ¹⁰Aça' i'kwe'sx dxi'pte teehwed āate pta'sxiçtha'w, kxah Israelwe'sx jxuka jiyutxna. Naa piçthē'j ayte i'kwe'sx dxi'pte ũsa' txã' Jesukristo Nasarethūwe'sx nuykatxhini ũsa'. Txāa Jesukristo's i'kwe'sxa' kluuste kaafxuçu'ji'kwe, nawa Dxusa' uunijū ki' itxi vxitku. ¹¹Txāa Jesusa's i'kwe'sxa' ahçei'kwe yat txaahsawe'sxwa ma'wēta: Naa kweta' selpime' jīçxa wāatahtewa txāaíi wejx selpisáa yuu txã'wēysak yu'. ¹²Kim yuhwa txāa na'wēy nasatx nwe'weya' ājawa'jsa yu' mee' naa kiwete, naasáa Dxus kaahni Jesus yuuçxáa kwe'sxtxi nwe'wewa'jsa' jik Pedro'.

¹³Pedrowe'sxa' kim yakh yuhwa piyana ũssamée naasáa Jesus yakh yuuçxáa piyana u'jusaçxawa weh yuhwa ũukhna sxiigmée we'wete', judiutx jxkaahsawe'sx wēse'jçxa' kuhtx yajkx. ¹⁴Txāapkaçxha' katxhisa piçthē'ja' txāawe'sx yakh ijk ũsu', aça' ewmée yūuna ũsi'kwe jīya' ājameeta'. ¹⁵Txajū' Pedrowe'sxtxi' eka kaseh kaahtx txāawe'sx pwe'sxçxáa puutx we'weya'. ¹⁶Sa' na'wēt̄x puutx we'we:

—¿Kīh yūukxtha'w naa e'z piçthē'jwe'sxtxi'? Txāawe'sxa' naa āça'sa's txā'wē nuykatxhini's maa maawa Jerusalentewe'sx jxuka jiita', aça' kwe'sxa' txā'wē nuykatxhimeeta' jīya' ājame'nja'w. ¹⁷Nawa mtee mteewa nasatx jwee tuuthe'khamen juuna' we'we'nja'w, kxah peena yu' Jesus kaapiya'jni's pta'sxmeetxna jīçxa', ¹⁸Pedrowe'sxtxi' ki' pa'yaçxa, wala juuna' we'wēt̄x:

—Āçxha' peena yu' багаçxte yuhwa Jesus kaapiya'jni's kaapiya'jmeene'kwe jīte', ¹⁹Pedrowe'sxa' na'wēt̄x pas:

—I'kwe'sx ũus miiyajkxwe. ¿I'kwe'sx jxkaahnixçá's nwēese'jçxa', Dxus jxkaahni yu'sa' nwēese'jmeete wáa ewna? ²⁰Kījkīhwa kwe'sx yafxju yuu uyna wēse'jna yuuni's weh yuhwa sxuuna' yuuya' ājame'nja'w jīte', ²¹judiutx jxkaahsawe'sxa' ma'wē yuhwa kaapeçxukwe'jya' ājameeçxa', juuna' we'weçxaxçáa kaatxhweete'jtx. Txā'wēme', nasa' jxukay Dxusçxáanatx tuuthe'jna ũsu' txā'wē āça'sa katxhipa'ga. ²²Txāa katxhisa' kuarenta anxu jxthaakwek ji'phu'.

Dxus yuwe's ũukhmée pta'sxwa'ja's pēyni

²³Txajū' Pedrowe'sxa' txhweetení yuuçxa', u'jtx txāawe'sxtxi pi'kxna u'jusawe'sx tasxna. Kxte pa'jçxa', jxuka pta'sxtxi judiutx jxkaahsawe'sx ma'wē we'wete txā'wēy. ²⁴Aça' txā'jīni's wēse'jçxa', jxukaysa Dxus yakh na'jīnatx puutx we'we:

—Cielu, kiwe, ĩkh wala, kxte kījkīhçxah ũstxna txāatx jxuka vxit-sa Dxus, ²⁵na'wēg kwe'we'j idxna selpisáa Davxida's:

¿Kīh yuupa'gata vxite nasa majūwe'sxwa txakwe ũusaçxana suste', nasa' kxulçxáawa ma'wē yūuwa'ja'swa pakwé'?

²⁶Naa kiwete jxkaahsa' weeçxi'tx,

Aça' çxhabte npiiçthē'j pkhaakheçxa, Dxusa's ahçeçxa txā'wēy Nçxi'knawa açe'tx jī'k.

²⁷Txā'jīni kxtey yuuk. Txāa pa'gatx Herodes vxite' Poncio Pilato kxtee Israelwe'sx petx vxite nasa yā'jçxa iidx Nçxi'k Jesus kīh pka' yuhwa ji'phmeesa's kaag txā'sna ahçeçxa naa çxhabte pkhaakhe, ²⁸ma'wē yūuwa'ja'swa idx ma'wēne'ga vxitçxa nvxiht txānii entey txā'sa' jxuka kxtey yuuya'. ²⁹Nawa idxa' txāawe'sx ewmée yūuya' yaakxnijū nwe'weçxa kwe'sxtxi meen kçxhāaçxha'j, kxah iidx yuwe's kihte yuhwa ũukhmée pta'sxi'nja'w. ³⁰Sa' idx pu'çxte', āça'satxwa nuykatxhiçxa kījkīhwa kaavxya'ja'ja'nja'w iidx Nçxi'k Jesusa's pi'kçxaxa.

³¹Txã'jĩna Dxus yakh puutx we'wena jxã'jaçpkaçxha', txãawe'sx pkaakhenite' ehd u'kh, naapkaçxha' Dxus Espiritu' txãawe'sx ũuste khēete', Dxus yuwe's ũukhmēetx pta'sxi'.

Txãawe'sx ji'phuni's kxteeçxah ji'phuni

³²Kristo's ũuste jxpa'gasa' teeçxsa ma'wē yūuwa'ja's yajkxte', jxukaysa txã'wēçxaçxáa yūuwa'ja'sçxáatx yaaki'. Maa yuhwa na' adx jĩ' jĩmeetx fxi'ze'. Kĩhwa ji'phuni'sa' jxukaysa ja'daçxaçxáatx jxtxude'. ³³Jesus jxkaahnisawe'sxa' jweeíçxáatx ũukhmée pta'sxi' Jesus uuçxawa ki' ĩtxi yuuni's, aça' Dxusa' jxukaysatx wala pu'çxhi'k. ³⁴Txãawe'sx ksxavxyte kim yuhwa jxpeejsameetx yu'. Txã'wē maawa txãawe'sx kiwe vxite' yat txã'wēsax txweyçxa vxyu's jxūna pa'jçxa, ³⁵Jesus jxkaahnisawe'sx kusetex dukhe', aça' txãawe'sxa' maaçxah jxpeejtewa txãawe'sxtxi txudeede'tx. ³⁶Txãn ensu' teeçx piçthē'j levxita José yaasesa ũusu'k, Çxipre kiwete upxsa. Aça' Jesus jxkaahnisawe'sxa' Bernabé yasetx ki'p. Txãa yase yu', Kvxii'sax'ja jĩni'. ³⁷Txãa piçthē'ja' txajx kiwe's txweyçxa vxyu's jxūna pa'jçxa Jesus jxkaahnisawe'sxtxi dukhku.

Ananiaswe'sx ptam ĩsxiini

5 ¹Txã'wēy Ananiaswe'sx ptamwa txãawe'sx kiwe's txweytxi. ²Ananiasa' kiwee txweyni vxyu's pxãhnçxáak jxūna ul'çxa jxuka dukheçthu jĩna Jesus jxkaahnisawe'sx kusete nvxiht. Txã'wē ĩsxiwa'ja's ptamí puutx we'weçxatx txã'wē yūu. ³Aça' Pedro' na'wēk we'we Ananiasa's:

—Eçxthē'ja's çkĩjxa'ga iidx ũuste ka'ga'jna ũusu', txã'wē kiwee txweyni vxyu's pxãhnçxáa dukheççxa jxuka dukheçthu jĩna Dxus Espiritu's ĩsxiikahn? ⁴Kiwe' iidx jĩine' yu', aça' txweyte' vxyuwa iidx jĩine' yu'. Aça' çkĩjxa'ga tehwed isasaçxá's pta'sxmée ĩsxiia' yajkx? Kwe'sxtxiçxáa ĩsxiimée, Dxusnawa ĩsxiig jĩk. ⁵Txã'jĩni's wēse'jna'wa, Ananiasa' uuniik wete. Aça' txã'wē yūuni's nasa maawa jxuka jiyusa' seena' wala ũukhwa'ja's ji'phutx. ⁶Txajū' piçtakxwe'sx kühçxa, txãa uuní kakwe's yapçxa pedaaya' jxūna ul'jtx.

⁷Txã'wē yūuni tekh ora skhēuuçpkaçxha', Ananias nyu Safxirawa pa'kh, nmi' uuni's jiiimée. ⁸Aça' Pedro' pējxku:

—Mpeeta'sxwe, çi'kwe'sx kiwe's kxaz pa'gateçxáa dxih txweykwē? jĩna pējxte', txãa u'y pasçxa':

—Isa, txã'wēteçxáa yuh txweytha'w jĩnak pas.

⁹Txajū' Pedro' na'jĩnak we'we:

—I'kwe'sxa' çkĩjxa'kwe Dxus Espiritu's ĩsxiwa'ja's ptamí puutx we'we? I'kwe nmi'a' txã'wē ĩsxiipa'ga uute', txã'sna pedasáa açhçxáa kũjuçta', sa' i'kwenawa jxūna ul'jwetxna pedaaya' ¹⁰jĩçpkaçxha', txãa u'ywa Pedro tasxga uuniik wete. Aça' Ananiasna pedasáa piçtakxwe'sx

kühçxa, Safxirawa uuní ũste uyçxa', jxūna u'ljçxa nmi' pukasuy pedaatax.
 11 Aça' Dxus yakh fxi'zesawe'sx txā'wēy vxite nasawa txā'wē seena'
 yūuni's jiyuçxa', wala ũukhwa'j ji'phutx.

Kim yuhwa ājanimeesatx wala kaavxya'ja'jni

12 Jesus jxkaahnisawe'sxa' kim yuhwa ājanimeesa's kījīhwa
 kaavxya'ja'jnatx ũsu' çxhabte nasaa ksxavxysu. Sa' Dxus yakh fxi'zesawe'sx
 txāawe'sx pwe'sx yu' dxuus yat pwa'tetx pkhaakhe' Salomon jī ji'tx kxtee.
 13 Nawa Dxus yakhmēe fxi'zesa yu' kim yuhwa txāawe'sx yakh pkhaakkena
 utxa'çmeeta', txā'wē seena' yūute ũukhçxa. Nawa txāawe'sxa' ekaju yu'
 Dxus yakh fxi'zesatx wala ewçxāa we'wena fxi'ze'tx. 14 Txā'wētewa piçthē'j
 petx u'y yā'ljçxa Kristo's txāawe'sx ũuste jxpa'gasa jwee'īçxāatx seena'
 wala pehnana u'j. 15 Txājū' āça'satx aadaste kutxi'ljçxa Pedro skhēuwa'jsutx
 khikhe', kxah Pedro psxū'ju'niçxá'swa jxpa'gasa' katxhitxna sūhçxatx txā'wē
 yū'. 16 Jerusalem peeku'jsuwe'sxwa nasa seena' wala pa'jtx, txāawe'sx āça'satx
 pe'ljçxa vxite' eçx iyamunisatxwa pe'ljçxa, sa' jxukay nuykatxhinitx neeyū'.

Pedro Juanwe'sxtxi ahçeçxa ikh wēeni

17 Txājū' sacerdote npiçthē'ja' kxtee ũssa saduceowe'sx yakh seena'
 wala ahçeçxa 18 Jesus jxkaahnisawe'sxtxi' tudçxa karcelte txahtx. 19 Nawa
 Dxus angel kus kühçxa karcel vxitxa's phaadeçxa na'ljçxak eka kutxi'lj:

20—Dxus yatna ki' u'ljçxa nasatxi' pta'sxine'kwe Dxus yakh fxi'zewa'ja's
 jīte', 21 wala kusītey Dxus yatna u'ljçxa pta'sxya' takhtxi. Naapkaçxha'
 sacerdote npiçthē'j vxite' kxtee ũssa judiu nthē'jsawe'sx jxukaysa
 pkhaakheçxa Jesus jxkaahnisawe'sxtxi' karceluh kutxi'ljya' kaahntx. 22 Aça'
 policiawe'sxa' karcelte uymeeçxa', pta'sxya' ki' sxawedtxi:

23—Karcel vxitxa' wala ew aphni ũsa', aça' kxtee thegsawa vxitxte
 lajxkméetx ũs yu'. Aça' kwe'sx kühçxa vxitxa's phaadete', Pedrowe'sxa'
 meetx yu' jītx.

24 Txā'jīna pta'sxte', sacerdote npiçthē'jwe'sx vxite' kxtee dxuus yatte
 thegsawe'sx npiçthē'j jxukaysa na'wēttx yaaki': Naa yuwe' çma'wē
 yūuwa'jsaxk? sūjuçpkaçxha', 25 teeçx piçthē'j pta'sxna kījīk:

—Karcelte ktxaja'ji'kwe txāawe'sxa' dxuus yatte yā'j ki' kaapiya'jna
 ũsta' nasatx jīk.

26 Txājū' dxuus yatte thegsawe'sx npiçthē'ja' policia yakh u'ljçxa
 jxūna kūhtx kīhwa pkxumēe, Pedrowe'sx ju'gusa nasa' ũusaçxaçxa kwet
 wāatatahwe'sxte. 27 Sa' judiu nthē'jsawe'sx tasxte jxūna kūhte', sacerdote
 npiçthē'ja' na'wēk pējx:

28—Kwe'sxa' i'kwe'sxtxi' багаçxte yuhwa peena yu' pta'sx
 kaahmeetha'w Jesus kaapiya'jni's. Aça' i'kwe'sxa' çkījīkwe yuu? Naa
 Jerusalemte mtee mteewa jxuka i'kwe'sx kaapiya'jni's yuutaçxa kwe'sxtxi
 yuuwesa vxit ya'wai'kwe Jesus uuni's.

²⁹Txãljíte!, Pedrowe'sx pasçxa!:

—Kwe'sxa' nasaa jxkaahni yuutxi' nwēese'jwa'j ji'phmeetha'w, naasáa Dxusçxáana nwēese'jwa'jsatha'w. ³⁰Kwe'sx yaçgawe'sx txãawe'sx Dxusa' Jesusa's ki' itxi vxitku kluuskhê a'kxçxa i'kwe'sx ikhni's. ³¹Dxusa' txã'wê yũuçxa cielute txajx pukate paçu ju'gte ki'pçxa Jxkaahwa'jsak vxit, kxah Israelwe'sxa' txãawe'sx pkaltxi nvxihtçxa Dxus tasxte sxawedte, Jesusa' nwe'wena. ³²Txã'wê yũuni's kwe'sxa' jiitha'w, aça' Dxusa' txajx Espiritu's ũsku txã'sna nwēese'jsatx txãa Espirituwa jiia' jíte!, ³³judiu nthê'jsawe'sx jweeíçxáa ũsaçxaçxa Pedrowe'sxtxi ikhya'watx yu!. ³⁴Nawa kxtee txãawe'sx ksxavxyte teeçx fxariseo Gamaliel yaasesa u'pu'k, Dxus leya's kaapiya'jsa wala jxtuhtesa. Txã' Jesus jxkaahnisawe'sxtxi eka dudte kutxi'khaahçxa, ³⁵judiu nthê'jsawe'sxtxi na'wêk we'we yujuçxa:

—Israelwe'sx, naa piçthê'jwe'sxtxi na'wê yũuya'wai'kwe txã'sa' mpa'yajkxwe. ³⁶I'kwe'sxa' miyajkxwe: teeçx ente' vxyaak teeçx piçthê'j Teudas yaasesa wala çxhãçxhasath jīna, aça' txajx ju'gu u'jsa kuartocientos nasatx yu!. Nawa txãa npiçthê'ja's ikhnik yuu, aça' txajx nasa' jxuka pũsxite!, txãa yuwe' pçuuk. ³⁷Txã'wê yũuni e'su, nasatx eçte äsx ente!, teeçx piçthê'j txã'wêy vxyaak, Judas Galileajūwe'sx, aça' txajx ju'gusa nasa wala kuh utxaatx. Nawa txãa Judasa's ikhte!, txajx ju'gusawa jxuka pũsxitx. ³⁸Txãa pa'ga naa piçthê'jwe'sxtxi' kuçx yuunuwe. Naa yuwe' piçthê'jwe'sxçxáa we'weniçxa yu!, kīhwa yũumeetewa pçuuna. ³⁹Nawa Dxus jīi wána aça' txã'sa' i'kwe'sxa' ivxiituya' ajāmeene'kwe. Dxus yakh puiisáa yuuya'mée mpa'yajkxwe jíte!, ⁴⁰Isa yuh we'wek sūhnatx neeyũu jxukaysa. Txajū! Jesus jxkaahnisawe'sxtxi pa'yaçxa': Açxha' peena yu! Jesus kaapiya'jni's pta'sxmeene'kwe jīna we'weçxa, wala peçxujkweçxaçxáa txhwetex. ⁴¹Aça' Jesus jxkaahnisawe'sxa' judiu nthê'jsawe'sx tasxuh wala weçxana kasehtx txã'wê Jesus kaapiya'jni's pta'sxpa'ga pxthaa yuuwa'ja's ji'phutha'w sūhna. ⁴²Maa ente yuhwa sxuuna' fxi'zemée een isa Dxus yuwe's kaapiya'jna txã'wêy Jesukristo itxi yuuni'swa pta'sxna pekūhna nestxi yu' yat-su vxite' dxuus yatte.

Dxuus yatte thegwa'jsa siete nasa txhitxhni

6 ¹Txãa ensu' Kristo's jxpa'gasawe'sx wala pehnate!, kxtee griego yuweju we'wesawe'sxa' judiu yuweju we'wesawe'sxtxi ũusçxa we'wewa'j uytxi kwe'sx jil'j vxiuda yuutxi' ew sãljimée ũsta' een isa peesni ũ'a's jíte!, ²Jesus jxkaahnisawe'sx docesa jiyuçxa!, Kristo's jxpa'gasawe'sxtxi jxuka pkhakhçxa na'jīttx:

—Dxus yuwe's pta'sxmée, sãljīwa'jçxá's jxthaa'kwe pa'pçxuya' yu' ajāme'nja'w kwe'sxa'. ³Txã'wê yũuya'mée i'kwe'sx yakh ũssa yakhtê'jwe'sx siete piçthê'j mtxhiitxhwe, Dxus dxi'pte ew fxi'zesa, Dxus Espiritu's ũuste jxpa'gasa, ma'wê yũuwa'ja'swa ew jiisatx. Txã'wê yuuçxa txãawe'sxtxi dukhe'nja'w sãljīna ũswa'j mjīia's. ⁴Aça' kwe'sxa'

Dxus yuwe's kaapiya'jwa'jçxá's thegu'nja'w, Dxus yakh pu'vxitumée puutx we'wena jíte', jxukaysa txã'wē yūuwa'ja's yajkxtxi. ⁵Sa' Dxus yakh jxpubamée fxi'zesa Estebana'stxi txhitxh Dxus Espiritu's ūuste ji'phsa. Vxite' Fxelipe, Prókoru, Nikanor, Timón, Parmenas, Nikolas Antiokía çxhabuwe'sx txãawe'sxtxi txhitxhnisa neeyūu. Txãa Nikolasa' judiumeçxawa judiuwe'sx na'wēy yuuna fxi'zeya' utxasaak yu'. ⁶Txãa piçthē'jtx txhitxhçxa', pe'jna u'jtx Jesus jxkaahnisawe'sx tasxte, açá' txãawe'sxa' dxikthesu peekizeçxa Dxus yakh puutx we'wetx txãawe'sx pa'gate.

⁷Txajū' Dxus yuwe' walaana u'kh, açá' Kristo's jxpa'gasawa Jerusallente seena' wala pehnak, txãa pa'ga kxtee judiuwe'sx sacerdote yuhwa Jesus kaapiya'jni's jxpa'gatx wala kuhsa.

Estebana's preesu'jni

⁸Açá' Estebana' Dxus pu'çxte', kim yuhwa ajanimeesa'swa kaavxya'ja'jnak fxi'ze' txãa çxhabte. ⁹Txã'wē yūute', judiu vxite kiwejuwe'sx Cirene, Alejadría, Cilicia, Asia txãa kiwesuwe'sxa' Esteban yakh ūusçxa we'wena kasehtx. Txãawe'sxa' karceluh txhweetenisa txãawe'sx pwe'sxçxáa fxiitx pkhaakheni yat ji'phu'. ¹⁰Nawa txãawe'sxa' pasya' aja'çmeeta' Estebana' Dxus Espiritu kaaūusuthe'jni's we'wete'. ¹¹Txajū' vxitetx vxxy dukhtxi txã'wē Moisesa's açewe'wena Dxusnawa açe'k jīna īsxiina pāatxhī'khkahn. ¹²Txã'wē yūuçxatx kaaūusçxa'j nasa ekajuwe'sx vxite' judiu nthē'jsawe'sx vxite' Dxus leya's kaapiya'jsawe'sxtxi. Sa' Estebana's tudçxa jxūna u'jtx judiu nthē'jsawe'sx tasxte. ¹³Sa' pakwetx na'wē īsxiina pta'sxwa'jsa: Naa piçthē'ja' een isa dxuus yata's açewe'wena txã'wēy Dxus leya'swa açewe'wena nesku yu'. ¹⁴Jesus Nasarethūwe'sxa' naa dxuus yata's ivxiituçxa, Moises kaapiya'jni'swa ivxiituwa'jsa' jīna kaapiya'jni's kwe'sxa' wēse'tha'w.

¹⁵Txã'jīna īsxiite', judiu nthē'jsawe'sx vxite' kxtee pkhaakheçxa ūssa' Esteban dxi'pte thegçxa' Dxus angel na'wētetx uy.

Esteban pasni

7 ¹Txajū' sacerdote npiiçthē'ja' Estebana's pējxku: —¿Na'wē pta'sxilitx txã' jxuka isa yuhna'? jíte', ²Estebana' pta'sxya' takhku:

—Yakhthē'jwe'sx, na's mwēese'jwe: Kwe'sx Dxus cielutewe'sxa' yaçgathē'j Abrahana's vxyaak Harán kiwete u'pxa' u'jmey nee Mesopotamia kiwete ūsiyna. ³Sa' na'wēk jxkaah: Iidx kiwe petx iidx nwe'sx jxuka nvxihtçxa mel'j kiwe ūsya'wath kxtee. ⁴Txã'jíte', Abrahana' Kaldea kiweju kasehçxa Harán kiwetek u'pxa' u'j. Txajū' Abraham neya' Harán kiwete uute', Dxusa' Abrahana's pe'jna yuwe'k naa kiwete açxh ūsi'kwe kxtee. ⁵Nawa Dxusa' Abrahana's naa kiwete nuypal'çxa', kiwe

le'çxkuẽçxáa yuhwa txagaçxhíi yu' úsme'. Nawa idxa's e'suçxáawa naa kiwe's úsu'nja, açá' idx uute!, iidx luuçx jii neeyüuna jík. Txã ensu' Abrahana' luuçx ji'phmeetewa txã'wëk iidx luuçx jii jina puutx we'we. ⁶Abraham ji'lj ma'wë fxi'zewa'ja'swa Dxusa' pta'sxku: Iidx ji'ljwe'sxa' vxite kiwesu pkxuuna jxpe'ljni kuartrocientos anxu fxi'zetxna. ⁷Txã'wëtewa txãa pkxuusawe'stxxi' kastigai'nja, kxah iidx ji'lja' txajü kasehçxa naa kiwete adxa's selpiiya' yuwetxna jík. ⁸Dxusa' Abraham yakh puutx we'weçxa', txãa puutx we'weni's peçxkanaya'mée jičxa cirkuncidäy kaakh txajx luuçxtxi'. Txãa pa'gak Abrahana' txajx nçxi'k Isaak upxhni oçxo en äjaçpkaçxha', cirkuncidäy. Txã'wëy Isaakwa txajx nçxi'k Jakoba's cirkuncidäyku. Açá' Jakobwa txajx nçxi'kwe'sx docesatx txã'wëyçxaçxáak yuu. Txãa Jakob nçxi'kwe'sx txã'wë Israelwe'sx ji'lj docesa neywe'sxta'.

⁹Txãa Jakob nçxi'kwe'sxa' nyakh Jose's ahçeçxa txweytxi, Egipto kiwen jxüna u'khan. Nawa Dxusa' José yakh txuteméek úsu' nxuste fxi'zeçtewa nwe'wena. ¹⁰Txãasak Egiptote jxkaahsa Fxaraon dxi'pte ew fxi'zewa'ja's ús. Txã'wë yüute!, Fxaraona' Jose's Egiptote ne'ljwe'sx ki'pçxa jxkaahsa yata's thegwal'sak nvxiht.

¹¹Txã ensu' Egipto kiwete jxuka Kanaan kiwete yã'lçxa wala wëje pa'kh kxüusu'ljwa'jsa, açá' kwe'sx yaçgathë'ja' ü'walj uymeeta'. ¹²Nawa Jakoba' Egipto kiwete skuutxh txweywalj úsa' jini's jiyuçxa', txajx nçxi'k kwe'sx yaçgawe'stxxi kaakh. Txãa entetx nyafçxah Egipto kiwen ulj. ¹³E'su ki' u'the', Jose' pta'sxku: Adxa' i'kwe'sx nyakhthu jina. Açá' Egipto kiwete jxkaahsa' jiyuk Jose' kiim ji'thewa. ¹⁴Txajü' Jose' txajx ney Jakob petx nwe'sx jxukaysatx yuukaakh. Txãawe'sxa' setenta y cinco ähtx yu'. ¹⁵Txã'wë yüupa'gak Jakoba' Egipto kiwen u'pxa' uljçxa kxtee uu, açá' kwe'sx ji'lj nyafxtewe'sxwa txãa kiwete uux. ¹⁶Nawa e'su txaçxte!, José dxi'thtxi jxüna yuhçxa Sikem kiwetetx pedáa, Abrahana' Hamor nçxi'kwe'sxtxi kiwe weyku uusaatx pedawalj jičxa kxtee.

¹⁷Dxusa' Abrahana's kiwe úswal'j en äjaçte!, Israelwe'sx Egiptote üssa wala pehnatx. ¹⁸Naapkaçxha' Egipto kiwete jxkaahwa'jsa' Jose's jiimeesak u'ka. ¹⁹Txãa jxkaahsa' kwe'sx yaçgawe'sxtxi ahçena pkxuuya' takhku, luuçx u'se upxsatx kthegu'jmée uukahn. ²⁰Naapkaçxha' txãa ensu' Moiseswa upxku Dxus peeygãani wala zhiçxkwesa. Açá' neywe'sxa' yatte tekh al'te jxpe'ljtx. ²¹Nawa jwee yu' jxpe'ljya' äjameeçxa', yu'wala pukaga süthte!, jxkaahsa niisa uyçxa', txãak nuywala txajx luuçx na'wë vxitçxa. ²²Txãa pa'gak Moisesa' kihtewa jxuka kaapiya'ljni yuu Egipto kiwetewe'sx na'wëy, sa' kihtewa jxtuhthesak yu'.

²³Moisesa' kuarenta anxu ji'phuçxa', txajx nwe'sx Israelwe'sx úsnite thegya' uljya' yajkxku. ²⁴Kxtee úsçxa uyku teeçx Egiptotewe'sx txã'wë Israelwe'sx teeçxa's pkxuuna úste, açá' Moisesa' ähmeekwesa ju'gu yuuçxa Egiptotewe'sxa's ikhku. ²⁵Israelwe'sxa' Dxusne! kaah kwe'sxtxi nwe'weya' süjkahnku txã'wë yüu Moisesa', nawa txãawe'sxa' txãa

sũhmeeta'. ²⁶Kuskuskhẽ' Moisesa' uyku e'z Israelitawe'sx puiina ũste, sa' na'ljĩnak nwe'we wẽe: I'kwe'sxa' pxakhsai'kwe, sa' ȷkĩjxa'kwe pui'? jĩte!, ²⁷vxite's uyisá' Moisesa's ȷxatxȷxa na'ljĩk: ȷKinga idxa's npiĩȷthẽ'jsa kwe'sxtxi nwe'wewa'jsa na'wẽ vxitȷxa nvxiht? ²⁸Jũ'na ma'wẽga Egiptotewe'sxa's ikh ȷtxã'wẽy adxnawa ikhe'nja sũjuwá'ga? jĩte!, ²⁹Moisesa' txãa kiweju ũphna u'ljȷxa Madian kiwenku u'lj. Kxteek txajx kiwemeete pa'ljȷxa u'pu', sa' e'z luuȷxku ji'phu.

³⁰Txãa kiwete Sinai vxiȷ utxasu nasa u'pnimeete kuarenta anxu fxi'zeȷte', ȷhũȷh tasxte ipx behnak vxxya. Txãa pxãhte Dxus angela'sku uy. ³¹Txã'wẽ uyȷxa', Moisesa' kuh yajkxna utxaak ew thegya'. Naapkaȷxha' Dxus we'weni na'wẽk pthũuse: ³²Adxa' iidx yaȷgawe'sx Abraham, Isaak, Jakob txãawe'sx Dxusthu jĩte!, Moisesa' ũukhna yayaȷxa thegme!. ³³Aȷa' Dxusa' Moisesa's we'weȷxa': Iidx pelgatxi's mpahde, ayte' kĩh pkal yuhwa ji'phmeesa ũsthu naa pa'ga. ³⁴Sa' Egiptote adx nasa pxthaa yuuni's uythu, sa' pxthaa we'weni'swa wẽse'th. Txãasath yuwé' nwe'weya'. Aȷa' adx jxkaahni's nwẽese'ljȷxa Egipto kiwen u'ljwene'ga jĩk. ³⁵Israelwe'sxa' nyafxĩ' Moisesa's na'ljĩnatx ahȷe: ȷKinga idxa's npiĩȷthẽ'jsa kwe'sxtxi nwe'wewa'jsa na'wẽ vxitȷxa nvxiht? Txã'ljĩna ahȷetewa, Dxusa' ȷhũȷh tasxte ipx ksxavxyuh vxxyaȷxa', Moisesa's kaakh npiĩȷthẽ'jsa na'wẽ nwe'weya'. ³⁶Moisesku txã'wẽ kwe'sx yaȷgawe'sxtxi Egipto kiwejuh kutxi'lj txãa kiwete kĩjkiħwa seena'sa kaavxya'ja'ljȷxa. Txã'wẽy Īkh Wala Behsajuwa kutxi'kh sa' nasa u'pnimeesu kuarenta anxuk txã'wẽ kim yuhwa ajãnimeesa's kaavxya'ja'ljna ũsu!. ³⁷Txãa Moisesĩȷxãak Israelwe'sxtxi na'wẽ pta'sx: I'kwe'sx ji'lj teeȷxa'sa kutxi'ljȷxa Dxusa' kaajxa'wa' txajx yuwe's pta'sxkahn, na'wẽk adxnawa kaah txã'wẽy. Aȷa' txã'sa' nwẽese'ljwa'lj ji'phi'kwe jĩk Moisesa!. ³⁸Moisesku txã'wẽ nasa u'pnimée kiwete ũsu! kwe'sx yaȷga Israelwe'sx yakh. Sa' Dxus angel yakhwa Sinai vxiȷ walate puutx we'weȷxa kwe'sx yaȷgawe'sxtxi pta'sxku. Sa' Dxus jxkaahna kwet taplate fxi'ljnitxwa jxpa'gak kwe'sxtxi ũsya'.

³⁹Txã'wẽ yũutewa, kwe'sx yaȷga Israelwe'sxa' Moisesa's nwẽese'jmée ahȷeȷxa, Egipto kiwenĩ sxawedxa'watx yu!. ⁴⁰Txajũ' Aarona's na'wẽtx we'we: Kwe'sxtxi pe'ljna u'ljwa'jsa dxus na'wẽsa mpheulj. Txã'wẽme' Moises Egipto kiweju kwe'sxtxi kutxi'jsa kĩhne' yuu nawa vxxyaame!. ⁴¹Txã'ljĩȷxa' txãawe'sx kuseju klaa luuȷx na'wẽ pheuljȷxa txã'snatx wala weȷxana tajkx ikhȷxa kab. ⁴²Txã'wẽ yũute!, Dxusa' txãawe'sx tasxuh txuteek, ěe wasasu estrelxa ũsta' txãaȷxãatx neewe'wekahn. Txã'wẽ yũuwa'lja's Dxus yuwe pta'sxsawe'sx librute na'wẽ fxi'ljni!:

Israelwe'sxa' nasa u'pnimée kiwete kuarenta anxu ũsȷxa',
ȷadxna weȷxaya'kwe tajkx ikhȷxa kabna ũsu'á'?

⁴³Weh yuhwa txã'wẽ yũumée adxna weȷxapkaȷxte,
Naasáa dxus ĩtximeesa Molokȷxãana'i'kwe txaja',
Txã'wẽy estrelxa Renfxán yaasesa's i'kwe neewe'we' i'kwe'sx kuseju
pheuljnisatx.

Txãa pa'ga i'kwe'sxtxi naa kiwejũ kutxi'jçxa Babilonia kiwen kaajxa'wath jïna fxi'jni'.

⁴⁴Kwe'sx yaçgawe'sxa' nasa u'pnimée kiwete ũsçxa', Dxusna weçxana ũsni yat ji'phu'tx, Dxusa' ma'wêne' Moisesa's vxitkaah txã'wëy vxitçxatx ji'phu'.
⁴⁵Aça' txã'snatx kwe'sx yaçgawe'sx Joswé yakh yuusa' jxpa'gaçxa jxúna yuwé'. Sa' judiu ji'jmée vxite nasa ũsni kiwete ka'ga'jçxa, Davxid entepkaçxtxi ji'phu'. Txãa kiwe's Dxus pu'çxte vxite nasatx kutxi'jçxa txãawe'sxtxi iiyamu. ⁴⁶Dxus peeygãanisa Davxida' teeçx dxuus yat txaahwa'j pheu'kh kxtee Jakob ji'jwe'sx Dxus ũswa'j. ⁴⁷Nawa txãa dxuus yata's Salomonku txah. ⁴⁸Txã'wëtewa, Dxus cielutewe'sxa' piçthê'jwe'sx txaahni yatte yu' ũswa'jsa yu'çme'. Txã'wëçxaíik Dxusa' txajx yuwee pta'sxsa's na'wë kwe'we'j:

⁴⁹Cieluçxáa adx jxkaahna ũswa'ja',

Aça' kiwe' adx çxida txahwa'jçxáa vxitnisa'.

Txã'wëte', çma'wë adx ũswa'j yat txajaki'kwe naa kiwete?

çTeeçx ahte adx jxkaasewa'j adx vxitnimeesa ũsmanx?

⁵⁰Nakwe seena' kïjkïhwa ũsta' nawa txã' jxuka adx vxitnisaçxaçxáata' jï'k Dxusa'.

⁵¹Txã'wëtewa, Dxus yuwe's i'kwe'sx ũuste jxpa'gaya' wa'lçxa thü'wë's aphçxa i'kwe fxi'ze' Dxusa's jïimée na'wë. Bagaçxtewa Dxus Espiritu's ahçenaçxáa ũsi'kwe i'kwe'sx yaçgawe'sx na'wëy. ⁵²I'kwe'sx yaçgawe'sx çmaaçxa' Dxus yuwe pta'sxsawe'sxtxi pkxuusamée ũstxmanx? Teeçx yuja' kïh pkal yuhwa ji'phmeesa jïna pta'sxsawe'sxtxi ikhtxi. Açxha' i'kwe'sxa' txãa pkal ji'phmeesa's ahççxa ikhi'kwe. ⁵³Dxus angel i'kwe'sxtxi Dxus leya's ũstewa, nwëese'je'çmée i'kwe jïte', ⁵⁴txãawe'sxa' wëse'jçxa', ki'thtxi ksuusu'jnax ũusaçxa Estebana's.

Estebana's ikhni

⁵⁵Txã'wëtewa, Estebana' Dxus Espiritu's ũuste jxukak ji'ph yu', sa' cielute pagayçxa Dxus u'pni seena' zhiçxkwesa's uyku, txã'wëy Jesuswa Dxus pukate yujuçxa ũstek uy. ⁵⁶Sa' txã'wësa's uyçxa' na'jïk:

—Mthegwe, adxa' uyna ũsthu cielutewe'sx Dxus Nçxi'k Nasa Yúusa' Ney pukate ũsa' jïçpkaçxha', ⁵⁷txãawe'sxa' thü'wëtx yaaphçxa, sus weyçxa jxukaysa Estebana's äaphtxi ikhya'. ⁵⁸Sa' çxhabuh kutxi'jçxa Estebana's açesawe'sxa' kwet wäatatahtx, txãawe'sx atxhtxi teeçx piçtakx Saulo yaasesa's kthegu'jçxa.

⁵⁹Kwet wäatatajaçpkaçxha', Estebana' na'jïnak Dxus yakh puutx we'we:

—Jesus, adx ũusa's miipa'ga jïna'wa, ⁶⁰peejxükweçxa susku we'we na'jïna:

—Meen peltunaï na'wë yüuçta' txãawe'sxtxi'.

Txã'wë we'wena'wa uuk Estebana'.

Dxus yakh fxi'zesawe'sxtxi Saulo ahççxa pakwení

8 ¹Estebana's ikheçte', Saulo' weçxanak ũsu'.

Isa txãn entetx iiméh seena' ahçeya' takh Dxus yakh fxi'zesa Jerusalentewe'sxtxi. Txã'wë yüute', jxukaysa püsxitx Judea kiwesu vxite!

Samariasu, naasáa Jesus jxkaahnisawe'sxçxáatx neeyũu Jerusamente.
²Estebana's ikhte', pedaaya' jxũna u'jtx Dxus yakh fxi'zesa yakhthê'jwe'sx wala ũ'nena. ³Naapkaçxha' Saulo' Dxus yakh fxi'zesawe'sxtxi ahçeqça yat iisak pakwena u'j txajũ juuna' yuuna kutxi'jçxa karcelte ktxaaaja'jya' piçthê'j petx u'y yã'jçxa. ⁴Nawa Jerusalen çxhabu ũphna u'jsa yu', Dxus yuwe's mteewa iipta'sxtxi u'jwe'.

Dxus yuwe's Samariate pta'sxni

⁵Txajũ' Fxelipe' Samaria kiwete teeçx çxhabte pa'jçxa Kristo' kimtewa pta'sxku. ⁶Aça' kxtee nasa pkhaakhesa' Fxelipe we'weni's wala jxpa'yajkx wêse'jtx, sa' kim yuhwa ãjanimeesa's kaavxya'ja'jni'swa uytxi. ⁷Txã'wê maazkuêe nasawa katxhinitx neeyũ' txã'wê txãawe'sx ũuste eçx ewmeesa sus weyna kasehte. Sa' txã'wêy êseya' ãjasamée vxite' çxida puuple u'jyua' ãjasameewa katxhitx. ⁸Txã'wê yũute', txãa çxhabte nasa jxukaysa wala weçxana ũsu'tx.

⁹Txãa çxhabte' teeçx dxixjuusáa Simon yaasesa' Samariate nasatx wala kaypuba'jna ũsu'k, adxa' kíhtewa jxuka jiisath jina. ¹⁰Aça' txã'snaçxaxçáatx nwêese'jna weçxana ũsu' luuçx ma'k yuu thê'jsa ma'k yuu nawa jxuka na'jina:

—Naa piçthê'ja's Dxusne' pu'çxhi' jĩ'tx. ¹¹Sa' txajx jxkaahni's jxukatx nwêese'je', txã'wê txajx dxixjuuni yakh wala txaçxyã'j kaypuba'jna ũsu'ne' naa pa'ga. ¹²Nawa Fxelipe' Dxus jxkaahwa'ja's pta'sxna pa'jçxa, Jesukristo' Dxus kaahnisa' jite' jiyuçxa', piçthê'j petx u'y yã'jçxa yu'te ya'bautisãytxi. ¹³Aça' txã'wê txãa dxixjuusaawa Fxelipe pta'sxni's jiyuçxa', yu'te ya'bautisãyçxa Fxelipe yakh u'ju'k. Sa' txã'wê kijkihwa kaavxya'ja'the' txã'sna uyçxa' kujk yajkxna u'ju'.

¹⁴Txajũ' Jesus jxkaahnisa Jerusamente ũssa' txã'wê Samariatewe'sxwa Dxus yuwe's txãawe'sx ũuste jxpa'gaçxa ya'bautisãytxi jini's jiyuçxa', kaatx Pedro's Juan yakh. ¹⁵Aça' kxtee txãawe'sx pa'jçxa', Dxus yakh puutx we'wetx Dxus yuwe's jxpa'gasa Samariatewe'sx pa'gate, Dxus Espiritu's jxpa'gakahn. ¹⁶Txã'wême', nyafxii yu' Dxus Espiritu's jiphmeetx yu', naasáa Jesusa'sçxáatx jxpa'gaçxa yu'te ya'bautisãysa yu'. ¹⁷Txajũ' Pedrowe'sxa' txãawe'sx dxikthesu peekizeçxa Dxus yakh puutx we'wete', Dxus Espiritu's jxpa'gatx.

¹⁸Aça' txã'wê yũuteçxáa Dxus Espiritu kijaçte uyçxa', txãa dxixjuusáa Simona' vxyu ũs wêek ¹⁹na'jina:

—I'kwe'sx txã'wê ãjani's adxnawa mahwe, kxah adxwa dxikthesu peekizeteçxáa maawa Dxus Espiritu's jxpa'gatxna jite', ²⁰Pedro pasçxa':

—Iidx vxyu' idx yakh ja'da vxituna, Dxus peesni's vxyu yakhgu wey wêje' naa pa'ga. ²¹Idxa' kwe'sx na'wêy yuuwa'j yu'sa' le'çxkwe yuhwa jxpa'gawa'j jiphmeeg, Dxus dxi'pte ewmeeg yaaki' naa pa'ga.

²²Txã'wê ewmée yũuwa'jçxá's yaakxni's nvxihtçxa, Dxusa's mneewe'we.

Txã'wẽ yũute!, peltunaĩwáana. ²³Txã'wẽme! iidx ũuste iwejçx iwejçx yaakxwa'ljçxáana uta ji'phgu, açá! txã'wẽ yaakxnisa! jxuka idxa's tudçxa ji'pha! jíte!, ²⁴Simon pasçxa!:

—I'kwe'sxa! adx pa'gate Dxus yakh meen puutx we'wewe. Txã'wẽme!, Dxusa! peltunãywe'sxmeeta! adxa's jík.

²⁵Txajü! Jesus jxkaahnisawe'sxa! Dxus yuwe's pta'sxçxa txajü kasehtx Samaria kiwesu vxite! çxhabkuẽsu Dxus yuwe's pta'sxya!. Sa! txã'wẽ yũuçxatx Jerusalenna ki! sxawed.

Fxelize! Etiopiajuwe'sx yakh puutx we'weni

²⁶Txãa e'su! Dxus angela! Fxelize's na'jínak jxkaah:

—Ajyju kasehçxa me'j Jerusalenu Gasa çxhabna u'jni dxi'jsu.

Txãa dxi'ja! nasa u'pnimeesuk skhẽwna ũsu!. ²⁷Txã'jíte!, Fxelize! txãa dxi'the u'ljweççxa! teeçx piçthê'j eunuko Etiopía kiwejuwe'sx u'ljweçtek uy. Txãa piçthê'ja! Etiopía kiwete reina Kadace tasxte vxyuu jxaawsak yu!. Sa! Dxusa's weçxaya! pa'jsak yu! Jerusalente. ²⁸Txãasak txajx kiwení sxawedna txajx u'jni kaçxetilxate kaçççxa Dxus yuwe pta'sxsa Isaias libru's lëeyna u'ljweç yu!. ²⁹Txajü! Dxus Espiritu! Fxelize's we'wek: Kaçxetilxate u'ljsa's kpajkxya! me'j jíte!, ³⁰Fxelize utxaana sêhçxa! Isaias librute na'jína lëeyni's wẽse'jçxa! pëjxku:

—¿Jiyu'gá! iidx lëeyni's? jíte!, ³¹txãa piçthê'ja! na'jík:

—¿Ma'wẽ yũuçxa jiyuki'th? kimwa pta'sxmeete! jĩçxa!, Fxelize's kaçxetilxate tejkaçxa pukate kaççkaakh. ³²Sa! Dxus librute na'wẽ fxi'jni'sku lëeyna u'ljweç yu!:

Piisxakuẽ na'wêk ikhya! jxũna u'jni yuu.

Piisxakuẽwa ma'wêga khas wakaçte! pebe'çmée, txã'wëy txãawa pebeeme!.

³³Åhmeekwesa na'wẽ yuupa'ga, nwe'wenimeek uu,

Açá! txajx luuçx jínisa kim yuhwa neeyũumeeta!.

Txã! naa kiwete txaçx fxi'zemeyna ikhnik yuu naa pa'ga.

³⁴Txajü! txãa piçthê'j lëeyna u'ljsa! pëjxku Fxelize's:

—Adxa's meen peeta'sx, Dxus yuwe pta'sxsa ayte we'we'k txã! ¿kimnaga we'we'? ¿Peekx uuwa'ja's wá! we'we'? meeçxa! ¿vxitesa uuwa'ja's wá! pta'sxi'? jíte!, ³⁵Fxelize! txãa lëeyni's pta'sxku: Na! Jesus uuwa'ja'sku we'we' jína. ³⁶Txajü! teeçx ahte yu'te pa'ljçxa!, txãa piçthê'j Etiopiajuwe'sxa! na'jík:

—Ayte yu! u'pa! açá! adxa! açxhí ya'bautisãy wëewaça!, ¿ãjãma'th? jíte!, Fxelize! na'jík:

³⁷—Iidx ũusuh jxuka txã'wẽ Jesusa! Dxus Nçxi'kne! yu! sũhçxa yu!, ya'bautisãyya! ãjane'ga jína pta'sxte!, txãa piçthê'j pasçxa!:

—Jesukristo! Dxus Nçxi'k yuh yu'ne! sũju'th adxa! jík.

³⁸Txajü! kaçxetilxa's kxuujuljçxa, e'zii yu'te kĩhçxa Fxelize! bautisãyku txãa Etiopiajuwe'sxa's. ³⁹Txãa yu'ju kasejçpkaçxha!, Dxus Espiritu!

Fxelipe's jxūna u'kh, aça' txāa Etiopijawu'e'sxa' peena yu' uymeeçxawa txajx dxi'the wala wēt̄wēt̄ weçxana u'kh. ⁴⁰Txajū' Fxelipe! Azoto çxhabte pa'ljçxa', çxhab iisak Dxus yuwe's pta'sxna u'lj, Cesarea çxhabte pa'phkaçx.

Saulo' Dxus yakh fxi'zey'a' utxani

(Hch 22.6-16; 26.12-18)

9 ¹Naapkaçxha' Saulo yu' ikhwēena nesku yu' Jesusa's nwēese'jsawe'stxxi. Txāasak sacerdote npiiçthē'lj tasxna u'lj, ²karta pějxya' Damasko çxhabna u'ljçxa judiuwe'sx pkhaakheni yat-su Jesusa's nwēese'jsatx pakweçxa' piçthē'lj petx u'y tudçxa Jerusalenna preesu jxūna u'ljya'. ³Damaskote pa'ljya' utxaana u'ljweçpkaçxha', txajx dxi'pte uymeenusku cieluju eena'sa kweeth. ⁴Aça' Saulo' weteçxa' wēse'kh na'wē we'weni's:

—Saulo, Saulo, çkīh yūupa'gaga adxa's ahçeçxa pkuuuya' pakwé'? jīte', Saulo' pějxku:

⁵—Idxa' çkimga? jīna. Sa' na'wē we'weni'sku wēse'j:

—Adxíi Jesusthu, idx na'wē ahçeçxa pkuuuya' pakwe'g txāath. Idxa' peekíçxáa ya'kpā'yuuwa'ja's pakwena ūsgu jīte', ⁶Saulo' ūukhnite yayana na'ljīk:

—Idxa' çkīhga yūu jxthāasu' adxa's? jīte', na'wēk pas Jesusa':

—Kiiteçxa me'lj çxhabna. Kxtee pa'the ya'pta'sxina kīh yūuwa'ja'swa jīk.

⁷Txā'wē yūute', Saulo yakh u'jsa' wala ūukhtxi, txā'wē puutx we'wetewa kimnawa uymeeçxa. ⁸Txajū' Saulo' kiiteçxawa uyya' ājame'. Aça' pu'kisçxa jxūna u'ljtx Damaskon. ⁹Kxte' tekh en uyya' ājamée, txā'wēy kīhwa ū'meek u'pu'.

¹⁰Damaskote' Jesusna nwēese'jsa Ananias yaasesak u'pu'. Txā'sa' Jesus vxyaaçxa na'wēk we'we:

—Ananias jīna pa'yate', Ananias paççxa':

—çKīh kaajxa'waga? jīte', ¹¹Jesus we'weçxa':

—Teeçx klxiikhun Ku'le yaasesate me'lj. Kxtee pa'ljçxa Judas yatte pēyine'ga: Teeçx piçthē'lj Tarsojuwe'sx Saulo yaasesa's peejxthu jīna. Txāa piçthē'ja' Dxus yakh puutx we'wena u'pa'. ¹²Sa' teeçx piçthē'lj Ananias yaasesa pa'ljçxa kī' uyya' ājakahn txajx kakwete peekizeeçtek ksxa'w.

¹³Txā'ljīna we'weni's wēse'ljçxa' Ananiasa' na'ljīk:

—Adxa's maawa wala iipta'sxta' Jerusalente idx yakh fxi'zesawe'stxxi txā'wē wala pkuuusa' txāa piçthē'ja' jī'tx. ¹⁴Sa' āçxwa naa çxhabte yuja' sacerdote npiiçthē'ljwe'stxxi karta pějxçxa idxna yaakxsawe'stxxi preesu jxūna u'ljya' jīte', ¹⁵Jesus paççxa':

—Idxa' me'ljçxáa. Txāa piçthē'ja' adx txhitxhnisa' adx yuwe's pta'sxwa'jsa nasa vxite kiwejuwe'stxxi, jxkaahsawe'stxxi, sa' Israelwe'stxxiwa pta'sxwa'jsa'. ¹⁶Adxa' txāa piçthē'ja's pta'sxi'nja adxna

selpiina u'jupa'ga makwe pkuuuni yuwa'ja'swa jíte', ¹⁷Ananiasa' Saulo u'pni yatna u'lçxa', txajx kakwete peekizeçxa na'ljik:

—Yakthê'j Saulo, dxi'the idx yuhte Jesus vxyaane' txâak adxa's kaah idx ki' uyya' âjaçxa Dxus Espiritu's ûuste jxuka jxpa'gakahn jîçpkaçxha', ¹⁸yafxte aphsa ubute!, ki' uyya' âjaçxa', kiiteçxa ya'bautisâyku. ¹⁹Txajû' û'wa'ja's ki' jxpa'gaçxa çxhâçxhak, sa' Damaskotee ûsu'k maz enwa Jesusa's nwêese'jsawe'sx yakh.

Saulo' Damaskote Dxus yuwe's pta'sxni

²⁰Txajû' Saulo' Dxus yuwe's pta'sxya' takhku judiuwe'sx pkaakheni yat-su Jesusa' Dxus Nçxi'ka' jîna. ²¹Aça' wêse'jsa jxukay kuh yajkxna na'wêtx we'we':

—¿Naa piçthê'jîi txâ'wê Jerusalente Jesusa's neewe'wesatx ikh wêena fxi'zesameenâ'? Sa' çtxâ'wêy aytewe'sxtxiwa preesu jxûna u'lçxa sacerdote npiçthê'jwe'sx kusete dukhya' sühçxa yuusa yu'çmeenâ'? jî'tx.

²²Txâ'jîçtewa Saulo yu' jwee'îçxâak çxhâçxha pta'sxi' Jesusa' Dxus tasxu yuusa Kristo yuh yu'k jîna, sa' kxtee Damaskote judiuwe'sxtxi ma'wê paswa'ja's yuhwa ji'phmeek nvxiitu'.

Judiuwe'sx ikhya'watewa Saulo iyuni

²³Txâa e'su txaçxte', judiuwe'sxa' Saulo's ikhya' puutx we'weçxa ²⁴çxhabu kasehni vxitxte en kuswa yupna nestxi yuu. Aça' txâ'wê yûuni's Saulo' jiyuk. ²⁵Aça' Saulo's pi'kxna u'jusawe'sxa' kusçxâa Saulo's kanasta walate akhçxa çxhab peeku'lj uphnikhêtx ekaju spajkx açesa kusejû nwe'weya'.

Jerusalente Saulo pa'jni

²⁶Txâa e'su' Saulo' Jerusalente pa'lçxa', Jesusa's nwêese'jsawe'sx yakh pkaakhe wêek. Nawa kxteewe'sx jxukaysa ûukhtxi Jesusa's nwêese'jsameewâana sühçxa. ²⁷Txâ'wêtewa Bernabé yu' pe'ljna u'lçxa Jesus jxkaahnisawe'sx tasxte nuypa'lçxa na'wêk pta'sx:

—Saulo's Jesus vxyaak Damasko dxi'the u'ljweçte, sa' txâa yakh puutx we'wek. Aça' Saulo' Damaskote pa'lçxa Jesus kaapiya'jniçxaçxá'sku pta'sxna ûsu' jîna pta'sxte', Saulo's ûukhmée jxpa'gatx. ²⁸Aça' Jerusalente ûsu'k txâawe'sx yakh pkaakhena. ²⁹Sa' judiuwe'sx griego yuweju we'wesa yakh ûukhmeek puutx we'we' Jesus kaapiya'jni's pta'sxna. Nawa txâawe'sx yu' ahççxa ikhya'watx yu'. ³⁰Aça' txâ'wê yûuni's yakthê'jwe'sx jiyuçxa', Saulo's pe'ljna u'ljtx Cesarea çxhabna. Txajû Tarso çxhabnatx kaah.

³¹Txajû' Dxus yakh fxi'zesa Judea, Galilea, Samariasuwe'sxa' kim yuhnawa ûukhmée jwee'îçxâatx çxhâçxhana u'lj Dxusçxâana nwêese'ljna. Aça' Dxus Espiritu pu'çxte', jwee'îçxâatx pehnana u'lj.

Eneas katxhini

³²Txajü' Pedro' yakhthê'jwe'sxtxi Dxus yuwe's pta'sxya' kasehçxa', Lida çxhabte Jesusa's nwêese'jsawe'sxtxiwa thegya' u'kh. ³³Kxte' teeçx piçthê'j Eneas yaasesa oçxo anxuk âça'na üsu' êseye' âjameeçxa. ³⁴Aça' Pedro' na'jik:

—Eneas, idxa's Jesukristo nuykatxhina. Aça' kiiteçxa iidx deeni's mkiis jïçpkaçxa', txâa piçthê'ja' naa dudtey kiitek. ³⁵Aça' kxtee Lida çxhabte vxite' Sarón kiwete üssa jxukaysa uyçxa', Jesusa's nwêese'jya' utxaatx.

Dorkas ki' itxi yuuni

³⁶Txân ensu' Jope çxhabte Jesusa's nwêese'jsa teeçx u'pu'k Tabita yaasesa. Txâ' griego yuwete' Dorkasku yaase yu'. Txâa u'ya' wala pu'çxna fxi'ze'k maawa peejsatxi'. ³⁷Txâa ensu' Dorkasa' âça'çxa uuk. Aça' uunî kakwe's kpêeu'jçxa êe yatgatx khikh. ³⁸Pedro üsni Lida çxhaba' Jope çxhab yakh utxak yu'. Aça' Jope çxhabte Jesusa's nwêese'jsawe'sxa' Pedro' Lida çxhabte üsa' jîni's jiyuçxa', e'z piçthê'j kaatx Pedro's na'wê pta'sxya':

—Jxthêeyuumée Jope çxhabna myuh jite', ³⁹Pedro txâawe'sx yakh u'jçxa kxte pa'the', pe'jna u'jtx uusâa üsniga. Aça' vxiudawe'sx jxukaysa ü'nena pkhaakheçxa pta'sxtxi Dorkas nee itxiy kmiisa umçxa peesnitx. ⁴⁰Txajü' Pedro' jxukaysatx eka kutxi'jna'wa, peejxükweçxa Dxus yakh puutx we'wena'wa uusâs thegçxa na'jînak we'we:

—Tabita, mkiitewe jïçpkaçxa', txâa uusâ' thegçxa Pedro's uyna'wa kiiteçxa kaçxku. ⁴¹Txajü' Pedro' pu'kisçxa kxuujü'jna'wa, Dxus yakh fxi'zesawe'sx vxite' vxiudawe'sxtxi pa'yaçxa, itxik dukh. ⁴²Txâ'wê yüuni's Jope çxhabtewe'sx jxukaysa jiyuçxa', wala kuhsa Jesusa's nwêese'jya' utxaatx. ⁴³Txajü' Pedro' Jope çxhabte kuh enku üsu' kha'tx weysâa Simon yatte.

Pedro Kornelio yatte pa'jni

10 ¹Cesarea çxhabte teeçx soldau kpiitan Kornelio yaasesa u'pu'k. Txâ' Italiajuwe'sx soldautx jxkaahsak yu'. ²Txâa piçthê'ja' Dxusna weçxana fxi'zesak yu', txajx yattewe'sx jxukaysa yäl'jçxa. Sa' Dxus yakh pu'vxituméek puutx we'wena fxi'ze', txâ'wêy vxyuuwa wala pu'çxhi'k judiuwe'sxtxi. ³Teeçx ente kusuçte las treste' Dxus angel txajx tasxte u'kaçxa na'jîna we'weçtek uy:

—¡Kornelio! jîna pa'yate', ⁴txâa piçthê'ja' wala üukhna Dxus angela's thegçxa' na'wêk pas:

—¿Kîh pe'jxga? jite', Dxus angel we'weçxa':

—Idxa' txâ'wê peejsaatx pu'çxna Dxus yakh pu'vxitumée puutx we'wena fxi'zeni's Dxusa' wêse'kh. ⁵Aça' idxa' Pedro's pe'jya' mkaah

Jope çxhabna. ⁶Txãa Pedro' kha'tx weysáa Simon yatte paadehna ũsa' ìkh wala pukate. Aça' Pedro pa'ljçxa pta'sxina idx ma'wē yūuwa'ja'swa jīte', ⁷txãa angel u'ljweçpkaçxha' Kornelio' e'z selpisáa vxite' teeçx soldau Dxus dxi'pte ew fxi'zesa txãawe'sxtxi pa'yaçxa, ⁸jxuka pta'sxna'wa Jope çxhabna kaakh.

⁹Txãawe'sxa' kuskuskhē Jope çxhabte utxaana pa'jaçpkaçxha', ēepxāh yuuçte' Pedro' tejjak ēe yat pwa'te Dxus yakh puutx we'weya'. ¹⁰Sa' Pedro' wala wēek, aça' txajx ũ'wa'lj pheu'juçtxi yu'. ¹¹Naapkaçxha' Pedro' uyku cielukhē tela wala na'wēsa puutx vxiçte tudçxa nuykījaçte. ¹²Kxte yu' niimal yu'kh eçx, ul, vxiçxakwe kazxsatx jxuka äsxnisak ji'phu'. ¹³Txajū' na'wē we'weni'sku wēse'j:

—Pedro, kiiteçxa naa niimaltxi' ikhçxa mē' jīte', ¹⁴Pedro pasçxa':

—Adxa' bagaçxte yuhwa na'wē niimal kazxsa yuutxi' ũ'wa'jsameeth jīk.

¹⁵Aça' ki' we'weni wēse'kh:

—Dxus yaatenisatxi' idxa' kazxsata' jīwa'lj ji'phmeeg açxha'.

¹⁶Txã'wē tekh uswa vxyaaçxak, txãa tela wala na'wēsa' ki' cieluní pu'kisni yuu. ¹⁷¿Kīh yūukahnki'k txã'wē vxjaa? sūhna Pedro u'ppkaçxha', Kornelio kaahnisa' pa'ljtx Simon yata's paapējxna. ¹⁸Sa' sustxi pa'yana kūh:

—¿Naa yatte paadeesa Simon Pedro yaasesa ũsmeená'? jīna.

¹⁹Pedro' txã'wē uyni's ũus yajkxna u'piyna, Dxus Espiritu' we'wek:

—Tekh piçthē'j idxa's paapējxna ũsta'. ²⁰Aça' kiiteçxa txãawe'sx yakh me'lj kuh yajkxmēe. Txã'wēme', txãawe'sxa' adx kaahni yuhta' jīte', ²¹Pedro sa'ljçxa Kornelio kaahnisawe'sxtxi pējxku:

—¿Ma'jīya'kwe yuwé'? I'kwe'sx pakwenisa' adxthu jīte', ²²txãawe'sxa' pta'sxtxi:

—Soldau kpiitan Kornelio kaahni yuhtha'w. Txãa piçthē'ja' wala ew zhiçxkwe fxi'ze'k Dxusna nwēese'jna, aça' txã'sa' judiuwe'sx jxukaysa wala wedxi'tx. Sa' teeçx ente' Dxus angel vxyaaçxa' idxa's pa'yakahn yuwe nvxihtga. Kxah Kornelio' jiyuna kīh pta'sxwa'lj ji'phne'ga txã'sna.

²³Txã'jīte', Pedro' txajx deenite ka'ga'ljçxa, kxte dehçxa kuskuskhē' Pedro' u'kh txãawe'sx yakh, aça' kxte Jope çxhabte yakthē'jwe'sxwa u'ljtx pi'kxna.

²⁴Kuskuskhē' Cesarea çxhabte pa'ljtx, aça' kxte' Kornelio' ũythasnak ũsu' txajx nwe'sx vxite' txajx namiku yakh pkhaakheçxa. ²⁵Pedro pa'jaçpkaçxha', Kornelio' jxpa'gaya' kasehçxa Pedro tasxte peejxūkwek weçxana. ²⁶Nawa Pedro' pu'kiççxa na'wēk we'we:

—Adxa's peejxūkwenu. Adxa' idx na'wēysa íçxáath jīçxa', ²⁷Kornelio yakh puutx we'wena dxiite u'kaççxa', kxte yu' wala kuh pkhaakheçxa ũstek uyna kūh. ²⁸Sa' Pedro' na'jīk:

—I'kwe'sxa' jīine'kwe, judiuwe'sxa' pkhaakhena puutx we'wewa'jsameeta' vxite nasa judiumeesa yakha'. Nawa Dxusa' adxa's

pta'sxçxa', kim yuhnawa açekaahme!. ²⁹Txãa pa'gath pa'yaçpkaçxha', wa'lmée yuwé!. ãçxha' adxa's mpeeta'sxwe kīya'kwe yuukaah jīte', ³⁰Kornelio' pta'sxku:

— ãçxha' pahz en yuuça' naapkaçxha' naa oratey las treste naa yattey kīhwa ũ'mée Dxus yakhçxáa puutx we'wena u'pu'th. Naapkaçxha' teeçx piçthē'j athni ropa kwentetesa ji'phsa vxyaak. ³¹Sa' na'wēk we'we: Kornelio, idxa' txã'wē peejisaatx pu'çxna Dxus yakh puutx we'wena fxi'zeni's Dxusa' wēse'kh. ³²Aça' Jope çxhabna mkaah, Simon Pedro yaasesa's pe'jya'. Txãa Pedro' kha'tx weysáa Simon yatte paadehna ũsa' íkh wala pukate. Aça' txã' aye pa'jçxa puutx we'wena idx yakh jīnak we'we. ³³Txã'wē jxkaah yã'the', jxthēeyuumée pakweya' kaath. Aça' weçx yuwe'ne'ga. ãçxha' aye Dxus dxi'pte jxukaysa pkhaakheçxa ũstha'w, sa' wēse'jya'watha'w ma'wēne' Dxus we'wekaah txã'sna.

Kornelio yatte Dxus yuwe's Pedro pta'sxni

³⁴Txajū' Pedro' pta'sxku:

— ãçxha' jiyuth Dxusa' kim yuhnawa ahçemée, ³⁵maa kiwejuwe'sxçxawa txã'sna nwēese'jna ew yūuna fxi'zesa yuutxi' jxpa'ga'çxáak. ³⁶Dxusa' Israelwe'sx ji'jtx yuwe kaakh Dxus yakh fxi'zewa'ja's Jesukristo yuuçxáa ũsuna sa' txãa'íçxáa naa kiwetewe'sx jxukaysatx jxkaajana jīna. ³⁷I'kwe'sxa' jīne'kwe na'wēk yuu: Galileajū takhçxa judiuwe'sx kiwete jxuka tuuthe'jnik yuu, Juan Dxus yuwe's pta'sxçxa yu'te bautisāynijū. ³⁸Dxusa' Nasarethuwe'sx Jesusa's txajx Espiritu's ũste', Jesusa' kīhtewa nuykatxhinak fxi'ze eçxthē'j kusete ũssatx. Dxusa' txãa yakhku ũsu' naa pa'gak txã'wē yūu. ³⁹Jesusa' txã'wē Judea kiwesu vxite' Jerusalente kīhtewa ew yūuna fxi'zeni's kwe'sxa' jxuka uysaatha'w. Txã'sa' kluuskhē a'kxçxa ikhtxi. ⁴⁰Nawa Dxusa' tekh ente ki' itxi vxitçxa kaavxya'ja'kh kwe'sxçxáatx, nasa jxukaysatx yu' mée. ⁴¹Dxusa' maaçxahtxne' kwe'sxtxi txhitx txãaçxáatxku vxya. Aça' kwe'sxa' txãa yakh pkhaakhena ũ'na fxi'zesatha'w uuçxa ki' itxi yuunijū. ⁴²Txajū' txã' kwe'sxtxi kaakh txajx yuwe's nasatx na'wē pta'sxkahn: Dxusa' txãa Jesusa's txãaçxaxáa kastigāywal'jsak vxitçxa ki'p naa kiwete itxisa ma'tx yuu uusáa ma'tx yuu nawa jxukaysatx. ⁴³Txã'wēy Dxus yuwe pta'sxsawe'sxwa yaçkhēy we'wetx Jesusa' na'wē yūuwal'jsa' jīna: Maawa jxukay txã's nwēese'jsa' txãawe'sx pkaltxi peltunāyni yuutxna jīnatx we'we.

Judiu ji'jmeeçxawa Dxus Espiritu's jxpa'gani

⁴⁴Pedro' txã'wē pta'sxna ũsiyna, kxte wēse'jna ũssawe'sx kakwete Dxus Espiritu kīhte', jxukaysa jxpa'gatx. ⁴⁵Aça' Jesusna nwēese'jsawe'sx judiu Pedro yakh yuusá' wala kuh yajkxna neeyūutx txã'wē judiuwe'sxmée vxite nasawa Dxus Espiritu's jxpa'gaçxa, ⁴⁶txã'wē vxite yuweju we'wena Dxusa's tuuthe'jna ũste.

⁴⁷Txajū' Pedro' na'jīk:

—Naa nasawa kwe'sx na'wēy Dxus Espiritu's jxpa'ga yā'the', yu'te bautisāywa'ja's ħkimçxá' yupxa' ājama'k? jīçxa', ⁴⁸ya'bautisāy kaakh Jesukristo yasete. Txajū' Pedro's neevxisxatx txāawe'sx yakh maz en kxtee ūskahn.

Dxus ma'wē yūuni'swa Jerusalente pa'lçxa Pedro pta'sxni

11 ¹Jesus jxkaahnisa vxite' yakthē'jwe'sx Dxus yakh fxi'zesa Judea kiwete ūssa' jiyutx txā'wē judiu jil'mée vxite nasawa Dxus yuwe's jxpa'gatz jīni's. ²Sa' Pedro Jerusalen çxhabte sxawedna pa'the', kxte judiu cirkuncidāynisawe'sxa' ūsçxawe'wetx Pedro's na'jīna:

³—ĤKijxa'ga judiumée vxite nasa tasxsu ul'çxa txāawe'sx yakh pkhaakheçxa ū'we'?

⁴Txajū' Pedro' pta'sxku ma'wē yūuni'swa jxuka:

⁵—Adxa' Jope çxhabte Dxus yakh puutx we'wena u'pçxa uythu tela wala na'wēsa puutx pahz vxiçte tudçxa ēe walakhē kaahni kījk adx tasxte pa'j. ⁶Aça' ew thegte', dxiite yu' niimal yu'kh eçx, ul, vxiçxakwe kazxsak jī'ph yu'. ⁷Txajū' na'jīni'sthi wēse'j: Pedro, kiiteçxa ikhçxa mē' jīte', ⁸na'wēth pas: Adxa' bagaçxte yuhwa na'wē niimal kazxsa yuutxi' ū'wa'jsameeth. ⁹Txajū' ki' pthūusek cieluju we'weni: Dxus yaatenisatxi' idxa' kazxsata' jīwa'j jī'phmeeg jīk. ¹⁰Txā'wē tekh uswa vxyaaçxak ēe walate ki' pu'kisni yuu. ¹¹Naapkaçxha' Cesareaju kaahnisa tekh piçthē'j pa'ljtx adxa's pakwena. ¹²Aça' Dxus Espiritu' adxa's u'khaakh txāawe'sx yakh wa'lmée. Txajū' Jope çxhabtewe'sx seis yakthē'jwe'sx yakh ul'çxa' jxukaysa Kornelio yatte u'katha'w. ¹³Aça' txāa piçthē'ja' pta'sxku Dxus angel vxyaaçxa na'wē we'weni's: Jope çxhabna Simon Pedro yaasesa's pa'yaya' mkaah. ¹⁴Aça' txāa pa'lçxa pta'sxina iidx yatte jxukaysawe'sx Dxus yakh fxi'zewa'ja's. ¹⁵Txā'wē pta'sxte', adx we'weçpkaçxha', Dxus Espiritu' txāawe'sx kakwete kījk, kwe'sx kakwetewa ma'wēga nyafxīi kīh txā'wēy. ¹⁶Txajū' yajkxthu kwe'sxtxi jxpe'jsa Jesukristo na'wē we'weni's: Juana' yu'teçxáak akhna bautisai'. Nawa i'kwe'sxa' Dxus Espiritute yuu bautisāyni yuune'kwe jīni's. ¹⁷Kwe'sxa' Jesukristo's nwēese'pha'ga Dxusa' ma'wēga txajx Espiritu's ūs, txā'wēyku txāawe'sxtxiwa ūs. Aça' adxa' ħma'wē yūuçxa Dxus wedxni's wa'lina ūsuki'th?

¹⁸Txajū' Jerusalente ūssa yakthē'jwe'sxa' wēse'lçxa', peena yu' pasmée Dxusçxáanatx na'wē tuuthe'j:

—Judiuwe'sxmée vxite nasatxwa Dxusa' ūsne' pkaltxi nvxihtçxa Dxus tasxte pçuwa'jmée fxi'zewa'ja's jīnatx weçxá'.

Antiokía çxhabte Dxus yakh fxi'zesawe'sx

¹⁹Āçxha' nyafxīi na'wē Estebana's ikhçxa vxite neeyūsáa yuutxi' ahçeçxa pkxuute', txāawe'sxa' ūphna ul'çxa' maai' yu' Fxenice kiwen,

vxite! Çxipre kiwesu, vxite! Antiokía çxhabsu kxsû pa'lçxa vxite nasa yuutxi! pta'sxmée judiu jil' pwe'sx yuuçxáatx pta'sxi! Dxus yuwe u'sesa's. ²⁰Nawa Dxus yakh fxi'zesa Çxipre vxite! Cirene kiwejuwe'sx maafi' yu' Antiokía çxhabte pa'lçxa', judiuwe'sxmeetxwa pta'sxtxi Jesus kaapiya'jni ewte fxi'zewa'ja's. ²¹Aça' Dxus pu'çxte!, txāawe'sxa' nyafxí jxpubana fxi'zeni's nvxihtçxa Jesus kaapiya'jni's nwēese'jtx.

²²Txā'wētx Dxusa's nwēese'j jīni's Jerusalente pkhaakhena ūssa' jiyuçxa', Bernabea's kahtx Antiokía çxhabna. ²³Aça' Bernabea' kxte pa'lçxa' wala weçxak Dxus txā'wē pu'çxni's uyçxa. Sa' jxukaytxi yu'kxpejk jxpubamée ew Dxus yakh fxi'zekahn. ²⁴Txāa pa'gately Bernabea' Dxus Espiritu's txajx ūuste jxuka jxpa'gaçxa Dxus yakh yuuçxāa fxi'zesak yu'. Txajū' nasatx wala ya'knayku Dxus jii.

²⁵Txā'wē yūuçxa', Bernabea' Tarso çxhabna Saulo's pe'jya' u'lçxa', Antiokía çxhabte nuypa'kh. ²⁶Sa' kxte teeçx anxutx pkhaakhena ūsu' nasa ma'wēsaxwa jxuka kaapiya'jna. Antiokíatetx nyafxçxah kristiano jina kxsusnisa yuu Kristo's nwēese'jsawe'sxtxi.

²⁷Txān ensu' Dxus yuwe pta'sxsawe'sx Jerusalenu yuusa pa'jtx Antiokíate. ²⁸Teeçxa Agabo yaasesa' Dxus Espiritu kaajiyu'the', yakhthē'jwe'sx ksxavxyte yujuçxa: Judiuwe'sx kiwete jxuka wēje en pa'jana jīnak pta'sx. (Txā'wē pta'sxni' kxtey yuuk jxkaahsa Klaudio ente.) ²⁹Txā'wē wēje en pa'jana jīni's wēse'lçxa', Dxus yakh fxi'zesa Antiokíatewe'sxa' txāawe'sx ji'phuni yakh pu'çxya' yajkxtxi yakhthē'jwe'sx Judea kiwetewe'sxtxi. ³⁰Txajū' peeswa'ja's pkhakhçxa kahtx Bernabé Saulo yakh Judeate ancianowe'sxtxi dukkhahn.

Jakobo's ikhçxa Pedro's karcelte txaahni

12 ¹Txān ensu' jxkaahsa Herodesa' pkxuuya' yajkxku Dxus yakh fxi'zesatx. ²Sa' kçxilxuh kiikhe'kh Juan nyakh Jakobo's. ³Txā'wē yūute' Jakobowe'sxtxi açesa judiuwe'sxa' weçxatx jxkaahsa Herodesa's, aça' Pedronawa preesu'khaakh kiikhe'jya'. Pan lewadura ji'phmée ū'wa'l'j fxiesta entek txā'wē yūu. ⁴Herodesa' Pedro's preesu tudçxa' karcelte ktxaaja'kh. Kuste pahz us yu'pthehna pe'tewa'jsa soldau txajk, yu'ptheh iisa pahz pahz yujukahn. Paskua fxiesta en skhēwte nasaa ksxavxyte kutxi'jya' sūhçxak txā'wē yūu. ⁵Aça' Pedro' karcelte wala ew yupni ūsu'k, nawa Dxus yakh fxi'zesawe'sx yu' Dxus yakh pu'vxituméetx puutx we'wena ūsu' Pedro pa'gate.

Dxusa' Pedro's karceluh kutxi'jni

⁶Herodesa' Pedro's nasaa ksxavxyte kutxi'jwa'l' en ājaçte', txāa kuste Pedro' dejk e'z soldau pxāhte, e'z kadenaju tudni. Naapkaçxha' vxite e'z soldau yu' karcel vxixtetx yupna ūsu'. ⁷Txāa dudte Dxus angel vxyaaçxāa yuute', karcelte jxuka eena'k kweeth. Txajū' angela' nal'jīnak tu'kakana Pedro's fxītx:

—Dud yuh mkiite j̄çpkaçxa', çam kadena' çxukwetetx Pedro kuseju.
 8 Aça' ki' we'wek txāa angela':

—Iidx jxtudni's ya'jytudçxa, pelgatxi's mpaath j̄ite', Pedro' txā'wēy yūuk. Txajū' txāa angela' ki' we'wek:

—Atxha's jxkaaççxa myuh adx e'stey j̄ite', 9 Pedro' angel e'stey kasejk, isa angela' eka kutxi'jiçtewa ksxa'wnawāa ūsne'tka sūhnaççāa yajkxna. 10 Nawa nyafx vxitxte soldau yupna ūsnite skhēwçxa', e'ste vxitxte soldau yupna ūsnitewa skhēwtxi. Sa' eka kasehwa'j çam vxitxte sējeçpkaçxa', txāa vxitxa' peekxçxāa phaatek. Aça' kasehçxa u'jtx klxiikhunsu. Txajū' angela' Pedroçxāana nvxihtçxa u'kh. 11 Txajū' Pedro' naasūjk: Ksxa'wnimeega yu', isa Dxusne' txajx angela's kaah Herodes kuseju adxa's nwe'weya', vxite' judiuwe'sxwa nakwe wala ewmēe yūuya' ūyhasu'tx txāaju nwe'wekahn sūhnak yajkx.

12 Pedro' txā'wē ew jiyuçxa' u'kh Juan Markos njī'j Maria yatna. Kxte' wala kuh pkhaakheçxa Pedro pa'gate Dxusa's neewe'wenatx ūsu'. 13 Kxte kūhçxa vxitxte uka'kate', teeçx luuçx u'y Rode yaasesak thegya' kaseh. 14 Nawa Pedro we'weni's jiyuçxa', vxitxa's phaademēe weçxana ki' sxawedku dxiigay wuwuuçxāa:

—Pedro' vxitxte ūsa' jīna pta'sxya'.

15 Aça' na'jīnatx we'we:

—Luuku we'wena ūsi'çxa j̄itewa:

—Īsxiija'çmeeth, isa yuja' j̄ite':

—Pedromēe, txāa yakh pi'kxna u'jusa angelçxāana j̄itx.

16 Txā'wētewa, Pedro yu' vxitxte uka'kana nesku yu'. Aça' vxitxa's phaadeya' u'jçxa', Pedro's uyçxa wala kuh yajkxtxi. 17 Nawa sxuuna' yuukahn Pedro' kuseju pta'sxçxa', Dxus ma'wē karceluh nwe'weni's jxuka pta'sxku. Sa':

—Jakobo vxite' kwe'sx yakthē'jwe'sxtxi mpeeta'sxwe txā'jīna'wa, txāa yu' kasehna u'kh vxite ahte.

18 Kuskuuskhē khikhynite', wala kuh yajkxna ūukhtxi soldauwe'sxa' txā'wē Pedro ma'wē yūutewa jiyumeeçxa. 19 Txajū' jxkaahsa Herodesa' pakweya' kaakh, nawa uymeete' kxte karcelte thegsa soldautxku ikh kaah. Txāa e'suçxāa Herodesa' Judea kiweju kasehçxa Cesarea kiwetek u'pxa' u'j.

Herodes uunī

20 Herodesa' wala puiina ūsu'k Tiro Sidón kiwete nasa yakh. Txāa pa'gatx txāa nasa' Herodes tasxte mjīisa Blasto yaasesa's vxyu dukhçxa txāa yakh u'j jxkaahsa tasxte utxaaçxa puiimēe fxi'zewa'ja's puutx we'weya'. Txā'wē yūumeete', txāa nasa' jxkaahsa kiwejuçxāatx ū'a's jxpaga'fana fxi'zesa yu'. 21 Aça' jxkaahsa Herodesa' pta'sxku kīh ente txajx tasxte utxaawa'ja'swa. Sa' txāa en āhte', Herodesa' jxkaahsa athni ropatx

athçxa txajx u'pnite kaççxa we'wek. ²²Txajü' nasa' na'jînatx weçxana sus we'we:

—Na'wē we'wesa' naa kiwete nasamée, Dxusa' jîçpkaçxha', ²³txāa dudtey Dxus angela' akasa ūsku Herodesa's, aça' jxuka wes ū'te' uuk, txā'wē nasaa weçxani's weçxana yaakxpaga.

²⁴Nawa Dxus yuwe yu' jweeîçxáak walaana u'j mtee mteewa pta'sxni.

²⁵Txajü' Bernabé Saulowe'sxa' mjîia's jxā'jçxa Jerusalenuh ki' sxawedtxi Juan Markosa's pe'jçxa.

Bernabé Saulo yakh Dxus yuwe's pta'sxya' nyafçxah kasehni

13 ¹Antiokía çxhabte pkhaakhena ūssa yakh ūsu'tx Dxus yuwe pta'sxa vxite' Dxus leya's jîisawa: Bernabé, vxite' khūçx Simon jînisa, vxite' Lucio Cirene çxhabuwe'sx, vxite' Manaén Galileate jxkaahsa Herodes yakh ih walaasáa, vxite' Saulo'. ²Txāawe'sxa' teeçx ente' Dxusna selpiina yūunaana ūste', Dxus Espiritu' na'wēk we'we:

—Saulo Bernabé yakh mkaahwe adxa's selpikahn, txāawe'sxa' adx pa'yanisata' mjîiwa'jsa jîk.

³Txajü' yūunaana jxā'jçxa', txāawe'sx dxikthesu peekizeçxa Dxusna neewe'wena' kaahtx.

Bernabewe'sxa' Çxipre kiwete Dxus yuwe's pta'sxni

⁴Dxus Espiritu kaathe', Bernabé Saulowe'sxa' Seleucia çxhabna u'jçxa txajü' barkote khēeçxa îkh pxāhte Çxipre kiwentxi u'j. ⁵Txāa kiwete Salamina çxhabte pa'jçxa', judiuwe'sx pkhaakheni yat-su Dxus yuwe's pta'sxya' takhtxi. Sa' Juan Markosnawa iipe'jtx yu' pu'çxwa'jsa. ⁶Çxipre kiwe's pekūhna jxā'jaççxa', Pafxos çxhabtetx pa'j. Sa' kxte' teeçx judiu dxijxuusáa Barjesus yaasesa'stxi uy. Txāa piçthē'ja' wala îsxiisa yu'k Dxus yuwe pta'sxsath jîna îsxiina. ⁷Txāa dxijxuusá' kxte ne'jwe'sx wala jîisa Sergio Paulo tasxte mjîisak yu'. Txāa ne'jwe'sxa' Dxus yuwe's wēse'j wēeçxa Bernabewe'sxtxi pa'yak. ⁸Nawa txāa dxijxuusáa Elimasa' Bernabewe'sxtxi' kwe'wel'j wēeme', ne'jwe'sxa' Dxus yuwe's jiyukahmen. ⁹Txā'wē yūute', Dxus Espiritu's ūste jxuka jî'phsa Saulo Pablo yaasesa' dxijxuusáa dxi'pte ūusçxa thegçxa', na'jîk:

¹⁰—Îsxiina fxi'zesa, ewmeesa, eçxthē'j luuçx, ewsa yu'sa' jxuka ahçena fxi'zesa ¿mjîitega Dxus yuwe ewsa's yupmée fxi'ze'çmée? ¹¹Txāa pa'ga Dxusa' idxa's âçxhîi kastigaîna, aça' uyya' âjamée fxi'zene'ga naa ensu' jîçpkaçxha', txāa dudtey uyya' âjameeçxa' maaçxáatxwa pakwek pu'kisçxa pe'jna u'khan. ¹²Txajü' kxte ne'jwe'sxa' txā'wē yūuni's uyçxa', Jesus kaapiya'jni's isa yuhna sūhna ūste jxpaga'g.

Pablowe'sx Pisidia kiwesu pekūhni

¹³Pablo vxite' txāa yakh pi'kxna u'jusa yā'jçxa barkote khēeçxa Pafxos çxhabu kasehtx Panfxilia kiwete Perge çxhabte pa'jya'. Nawa

Juan Markos yu' Perge çxhabte pa'jçxaçxáa ki' sxawedku Jerusalennay. 14 Pablowe'sxa' Perge çxhabu kasehçxa Pisidia kiwete Antiokía çxhabnatx u'j. Kxte pa'jçxa', jxkaase ensu' judiuwe'sx pkhaakheni yatte u'katx. 15 Aça' pkhaakheni yatte npiichê'ja' Dxus ley vxite' Dxus yuwe pta'sxsa fxi'jni's lëeyna jxã'jçxa', na'wêtx we'we:

—Yakthê'jwe'sx, kîh we'wewa'j ji'phçxa', myu'kxpehwe nasatx âçxhîi jîte', 16 Pablo' kiitena'wa kuseju sxuuna' yuuwa'ja's pta'sxna'wa we'wek:

—Israel ji'jwe'sx, vxite nasawa Dxusna nwêese'jsa, jxpa'yakx mwêese'jwe: 17 Israelwe'sx Dxusa' kwe'sx yaçgawe'sxtxi txhitxhçxa wala kpeena'kh Egipto kiwete nee üsiyna, sa' txãa kiwejü kutxi'kh kîhwa seena'sa kaavxya'ja'jçxa. 18 Dxusa' nasa u'pnimée kiwete kuarenta anxu wantäyku nasa ähmée yüuna fxi'ze'çtewa. 19 Sa' Kanaan kiwete nasatx jxuka ivxiituk txãa kiwe's kwe'sx yaçgawe'sxtxi üsya'. 20 Txajü' kuartocientos cinkwenta anxu ähpkaçx jxkaahwa'jsa ji'phmée kwe'sxtxi thegwa'jsa khuêçxáak nvxiht, Dxus yuwe pta'sxsa Samwel entepkaçx. 21 Txajüttx txãawe'sxíi pëjx teeçx jxkaahwa'jsa, aça' Dxusa' üsku kuarenta anxu jxkaahwa'jsa Cis nçxi'k Saul yaasesa's. Txãa piçthê'ja' Benjamin ji'kh yu'. 22 Txãa e'su' Dxusíi Saula's jxkaahnijü kutxi'jçxa, Davxida'sku jxkaahwa'jsa ki'p. Sa' na'wêk we'we: Isai nçxi'k Davxid yuuçxáa adx jxkaahni's kxtey yuuwa'jsa uythu txã' adx wedxnisa' jîk. 23 Jesusa' Davxid ji'thewe'sxku yu', aça' txã'snak Dxusa' nvxiht Israelwe'sxtxi nwe'wewa'jsa, nyafxiitey Dxusa' ma'wêne' üsya' neeyüu txã'sa' kxtey yuuk. 24 Jesus pa'jmeyna Juana' Israel nasa jxukaysatx pta'sxku: I'kwe'sx pkaltxi jxuka nvxihtçxa Dxus tasxte misxawedwe yu'te ya'bautisâyna jîna. 25 Sa' Juana' txajx uu en utxaaçte', na'wêk we'we: Adxa' i'kwe'sx üythasu'i'kwe txãameeth. Adx e'ste teeçx yuja' txajx pelgatxi wesçxáa yuhnawa adxa' khihbxa' selpimeesath jîk.

26 Yakthê'jwe'sx Abraham ji'lj, vxite nasawa Dxusna nwêese'jsa i'kwe'sx ewte neeyüuwa'ja's pta'sxnik yuu. 27 Nawa Jerusalente üssa vxite' txãawe'sx npiichê'jsawa jiyumeeta' Jesusa' kimtewa. Sa' Dxus yuwe pta'sxsa fxi'jni'swa jiyumeeta' pkhaakheni yat-su jxkaase een isa lëeyçxawa. Sa' txãawe'sxiçxáa Jesusa's ewmeete nvxihtçxa', Dxus yuwe pta'sxsa fxi'jni txãawe'sx lëeyni's kxtey yuutx. 28 Txã'wê Jesus ewmée yüuni's uymeeçxawa Pilato's yuwe üstxi Jesusa's kiikhe'khan. 29 Txajü' Dxus librote ma'wêne' fxi'jni üsu' txã'sa' jxuka kxtey yuuçxa', Jesusa's kluusu spajkxçxa pedaatx. 30 Nawa Dxusa' uunijü ki' îtxi vxitku. 31 Aça' Jesusa' wala kuh en vxyaak Galileajuwe'sx Jerusalenna pi'kxna yuusatx. Txãasa txãawe'sxa' Jesus kimtewa pta'sxsata'.

32 Txãa pa'ga kwe'sxwa i'kwe'sxtxi pta'sxiçtha'w nyafxiitey kwe'sx yaçgawe'sxtxi Dxusa' üsya' neeyüuk txã'sna. 33 Kwe'sxa' yaçgawe'sx ji'tha'w, txãa pa'gak Dxusa' txajx üsya' neeyüuni's kwe'sx yakh kxtey yuuçxa, Jesusa's uunijüwa îtxi vxit, salmo doste na'wê fxi'jni üsa'

txā'wēy: Idxa' adx nçxi'kku. Aça' idxa's uunijūwa itxi vxitthu āçxha' jik. ³⁴Uute' txāa kakwe' suweekahmen itxi yuuwa'ja's Dxusa' pta'sxku txajx librute na'jina: I'kwe'sxtxi peeygāawa'ja's Davxid yakh puutx we'weth txā'sa' kxtey yu'nja jik. ³⁵Txāasak salmo vxite ajkhēwa na'jī': Idxna selpisāa peeygāanisa kakwe's nvxihtmeene'ga suweewe'sxte jī'k. ³⁶Txā'wē we'weni' isa kxtey yuuyujk. Txajjik Davxida' txān ensu' Dxus jxkaahni's kxtey yuuçxa e'su' uuk, aça' txajx kakwe's yaçgawe'sx pedaniitey pedaate', txajx kakwe' kxtee jxuka pçuuk. ³⁷Nawa Dxusa' Jesusa's uunijūwa itxi vxitku, aça' txāa kakwe' pçuume'. ³⁸Āçxha' yakhthē'jwe'sx i'kwe'sxa' mjiyuwe: I'kwe'sx pkaltxi peltunāywa'ja's pta'sxi'tha'w, nawa peltunāywa'jsa' Jesus yuuçxá'. ³⁹Nyafxíi Moises leya's nwēese'jçxawa, perdona's uymeei'kwe. Nawa Jesusna yajkxçxa nwēese'jçxa', perdona's uyuune'kwe maawa. ⁴⁰Mpa'yajkxwe, txā'wēme', nyafxíi Dxus yuwe pta'sxsa na'wē we'wetx txā' kxtey yuuwe'sxta':

⁴¹Weeçxsawe'sx, mpa'yajkxwe. I'kwe'sx vxituwa'ja's müukhwe.

Txā'wēme', adxíi Dxusthu na',

Txā'wē yūuwa'j en āhte', kīhwa seena'çxāa yu'nja.

Txā'wē yūuwa'ja's pta'sxtewa, i'kwe'sxa' jxpa'gameene'kwe jinatx we'we jik Pablo'.

⁴²Txajū' Pablo' txā'wē pta'sxçxa', txāa yakh pi'kxna u'jusa yakh judiuwe'sx pkhaakheni yatu kasejeçte', kxte üssa judiu jil'jmeeçxawa Pablowe'sxtxi ki' pi'kxtxi vxite jxkaase ente txā'wēy pta'sxya' yuukahn.

⁴³Kxte pkhaakheni pçuute', judiuwe'sx wala kuhsa vxite' judiu jil'jmeeçxawa judiuwe'sx kaapiya'jni's jxpa'gasa Dxus yuwe's wala ew nwēese'jçxa', Pablowe'sx kaapiya'jni's nwēese'jsatx yuu. Aça' Pablowe'sxa' wala yu'kxpehtx Dxus peeygāanite wa'lmée fxi'zekahn.

⁴⁴Vxite ki'su jxkaase ente', çxhabte nasa jxukay pkhaakhetx Dxus yuwe's wēse'jya'. ⁴⁵Nawa txā'wē nasa wala pkhaakhete', kxte judiuwe'sxa' wala üusaçxaçxa Pablowe'sxtxi açewe'wena wēesxutx.

⁴⁶Txā'wētewa, Pablowe'sxa' üukhmeetx na'jina we'we:

—Dxus yuwe's nyafxte i'kwe'sx judiu jil' khu'lytxi pta'sxwa'kh yu', kxaltha'w pta'sx. Nawa jxpa'gameeyā'jil'kwe pçumée itxi fxi'zewa'ja's, aça' āçxha' u'ljweçtha'w judiumée vxite nasatx pta'sxya'. ⁴⁷Dxusa' kwe'sxtxi na'wēk we'wena kaah:

Nasa ksxavxysu eena' kweethwa'jsath nvxiht i'kwe'sxtxi',

Sa' txā'wēy maa kiwetewa ewsa's pta'sxwa'jsa jik.

⁴⁸Aça' judiu jil'jmée vxite nasa txā'jīni's wēse'jçxa', Dxus yuwe' wala ewsa yu'ga jina weçxaçxa maaçxahne'ta bagaçxte yuhwa pçumée itxi fxi'zewa'jsa yu' txāa yu' jxukay Dxus yuwe's jxpa'gatx. ⁴⁹Txā'wēk Dxus yuwe's pta'sxni yuu txāa kiwete jxuka. ⁵⁰Nawa txāa çxhabte judiuwe'sxa' nasa jxtuhthesa petx u'y yā'jçxa kxteeçxah puutx we'weçxa, Pablowe'sxtxi pkxuuya' yajkxtxi txāa kiwejū kutxi'phkaçx. ⁵¹Txā'wē

yūute', Pablowe'sxa' txāawe'sx çxidate kiwe tuhda's sakweekweçxa u'jtx Ikonio çxhabna. ⁵²Nawa kxte nasa Dxus yuwe's nwēese'jsa yu', wala weçxana neeyūutx, Dxus Espiritu's ūuste jxpa'gaçxa.

Ikonio çxhabte Pablowe'sx pa'jni

14 ¹Pablowe'sxa' Ikonio çxhabte pa'jçxa', judiuwe'sx pkhaakheni yatte u'kaçxa, Dxus yuwe zhiçxkwesa's pta'sxte', wala jxpa'gatx judiuwe'sx vxite' judiuwe'sxmeesawa. ²Nawa judiuwe'sx Jesus kaapiya'jni's açesa yu' judiu jil'mée vxite nasatx ewmée yu'txwe'weçxa yakhthē'jwe'sxtxi açeyaakxwa'ja's vxittxi. ³Txā'wē açepa'gáiçxáatx Pablowe'sxa' jweefiçxáa kxte txaçx ūsu', Dxusa' pu'çxhina sūhna ūukhmée pta'sxna. Aça' Pablowe'sx txā'wē Dxus peeygāani's pta'sxte', Dxusa' kxte nasa wēse'jsa yuutxi' ewku kaajiyu'j Pablowe'sxtxi kīhwa seena'sa's kaavxya'ja'jya' ājawa'ja's ūsçxa. ⁴Aça' txāa çxhabte'we'sxa' txuteetx, vxite' judiu açesawe'sx ju'gu, vxite' Pablowe'sx ju'gu. ⁵Txajū' judiuwe'sx vxite' judiuwe'sxmeesawa khuēswe'sx yakh puutx we'wetx Pablowe'sxtxi wēesxuna kwet wāatatahçxa ikhya'. ⁶Nawa Pablowe'sx jiyuçxa', ūphna u'jtx Likaonia kiwete Listra Derbe çxhabna kxsū jxuka pekūhçxa ⁷Dxus yuwe ewte nvxiitwa'jsa's pta'sxya'.

Listra çxhabte Pablo's kwet wāatatahçxa ikh wēeni

⁸Sa' Listra çxhabte pa'the', kxte' teeçx piçthē'j çxida āça'sak u'pu'. Txā' upxhīi txā'wē yā'kh yu', sa' bagaçxte yuhwa u'juya' ājasameek yu'. ⁹Txāa piçthē'ja' Pablo pta'sxni'sku wēse'jna u'pu'. Aça' Pablo' txajx dxi'pte thegçxa' jiyuk nuykatxhina sūhni's. ¹⁰Sa' susku we'we:

—Ku'le myuju jīna. Naapkaçxha' txāa piçthē'ja' ūphçxa yujuna'wa ew yā'kh u'juya' āja. ¹¹Pablo txā'wē yūuni's nasa uyçxa', na'wētçx Likaonia yuweju weyna we'we:

—jNasa na'wē yuuçxa dxuswe'sx kwe'sx tasxte kīhtx! jīçxa', ¹²Bernabea's Jupiter jīnatx kxsusu', sa' Pablo's Merkurio jīnatx we'we', wejx thaakwe we'wesa yuupa'ga. ¹³Txāawe'sx dxus Jupiter jī'tx txā'sna neewe'wena ūsni yata' çxhab peeku'thek ūsu', aça' kxte selpisāa sacerdote' kla jxūna pa'kh kite zhiçxkwesa khyū'jū'jçxa. Aça' nasa' Pablowe'sxtxi weçxana peejxūkweçxa neewe'weya'watx yu' txāa klatx ikhna. ¹⁴Nawa Pablowe'sx jiyuçxa' txā'wē yūute nxusçxa peekx athni ropatx sudena'wa nasaa ksxavxyte kūhçxa na'jīnatx sus we'we:

¹⁵—I'kwe'sxa' çkījxa'kwe txā'wē yū? Kwe'sxa' nasa i'kwe'sx na'wēysa fiçxáatha'w. Sa' txā'wē yūuna fxi'zenisa' seelpimeesa' naa pa'ga nvxihtçxa Dxus itxīsa cielu's pheu'kh, kiwe, ikh wala kxte kīhçxah ūstxna txāatx jxuka txā'snaçxāa selpiina neewe'wewa'ja' jīna pta'sxya' yuusaçxáatha'w. ¹⁶Txāa Dxusa' nyafxīi ensu' nasatxi' nvxihtku ma'wēwa yūuna fxi'zekahn. ¹⁷Nawa Dxus ūsyuhna sūjkahn kaajiyu'jna nesku yu', nus kaapa'ja'jna,

uuthasxtxi ew kçxhãaçxha'jna, û'wa'ja's peejxmée peesna, wēt fxi'zewa'ja'swa ūsna jīnak pta'sx. ¹⁸Txã'wē pta'sxçxak wala thēyçxáawa pejka nasatx knay, txãawe'sxtxi weçxana kla ikhna peejxūkwekahmen.

¹⁹Txãa e'su' judiuwe'sx Antiokía Ikonio çxhabuwe'sx pa'lçxa kxte nasatx ewmée yu'txwe'weçxa kwet wāatatahtx Pablo's. Txã'wē yūuçxa', uuyā'jne' sūhçxa wezxna u'lçxa çxhab ekahtx wāatāh. ²⁰Nawa kxteewe'sx Dxus yuwe's nwēese'jsa yu', Pablo's thegya' u'the', Pablo' ki' ūs ji'phuçxa kiiteçxa ki' çxhabtey u'kak. Sa' vxite kuskuskhē' Bernabé yakh Derbe çxhabnatx u'j.

²¹Derbe çxhabte pa'lçxa', Dxus yuwe ewte nvxiitwa'jsa's pta'sxçxa nasatx wala knaytxi Dxus jīi. Txã'wē yūuçxatx sxawed Listra, Ikonio, Antiokía çxhabsu iipa'j. ²²Txãa çxhabsu pa'lçxa', Dxus yuwe's nwēese'jsatx wala yu'kxpehtx Dxus jxkaahna ūsnite u'ka wēeçxa' Dxus yakh txutemée fxi'zewa'ja', makwe pxthaa nxuswa'j en pa'thewa jīna. ²³Sa' kxsū pkhaakhena ūsnisu jxkaahwa'jsa ancianowa pakweçxa ki'ptxi. Txã'wē yūuçxatx yūunaaçxa Dxus kusete neewe'weçxa nvxiht.

Pablowe'sx Antiokía çxhabnay ki' sxawedni

²⁴Txajū u'lçxa', Pisidia kiwesu skhēwçxa Panfxilia kiwetetx pa'j. ²⁵Txãa kiwete Perge çxhabte Dxus yuwe's pta'sxçxa Atalia çxhabnatx u'j. ²⁶Txajū' barkote khēeçxa u'jtx Antiokía çxhabna, majūne'ta Dxus kusete neewe'weçxa mjīiya' kaahnisa yuu txãa çxhabnay. ²⁷Antiokía çxhabte pa'lçxa', kxte pkhaakhena ūssa yakthē'ljwe'sxtxi pta'sxtxi Dxus ma'wēne' txãawe'sxtxi pu'çxçxa judiu ji'jmée vxite nasatxwa Dxus yuwe's kaajiyu'j txā'sna. ²⁸Sa' Pablowe'sxa' kxte wala txaçx ūsu'tx Dxus yuwe's nwēese'jsawe'sx yakh.

Pablo Jerusalentewe'sxtxi paapējxya' u'jni

15 ¹Txãa e'su' Judeajuwe'sx judiu Antiokía çxhabte pa'lçxa kxteewe'sxtxi na'wēt x kaapiya'jna ūsu': Ya'cirkuncidāywa'j ji'phi'kwe Moises jxkaahni's kxtey yuuna. Txã'wē yūumeeçxa', ewte neeyūuya' ājameene'kwe jīna. ²Aça' txã'wē kaapiya'the', Pablowe'sxa' wala juuna' puutx we'wetx txã'wē pta'sxsa yakh. Txajū' kxte pkhaakhena ūssa yakthē'ljwe'sxa' Pablowe'sxtxi vxite kaapi'ki'lçxa Jerusalenna kahtx Jesus jxkaahnisawe'sx vxite' anciano kxteewe'sx yakh txãa yuwe's paapējxna puutx we'wekahn.

³Antiokía çxhabte pkhaakhesa yakthē'ljwe'sx kaathe', Fxenicia Samaria kiwesu skhēwnatx u'j, judiu ji'jmée vxite nasawa Dxus yuwe's jxpa'gaçxa nyafxīi jxpubana fxi'zeni's nvxihttxi jīna pta'sxna. Aça' kxsū yakthē'ljwe'sxa' wala weçxatx txã'wē jiyuçxa'.

⁴Pablowe'sx Jerusalete pa'the', kxte pkhaakhena ūssa vxite' Jesus jxkaahnisawe'sx ancianowe'sx yālçxa jxpa'gatx. Aça' Pablowe'sxa' jxuka

pta'sxtxi txã'wê judiu jil'mée vxite nasatxwa Dxusa' ewte neeyũuwa'ja's ũsku jĩna. ⁵Nawa maafĩ yu' kxte ũssa fxariseowe'sx Jesus kaapiya'jni's jxpa'gasaçxawa na'wêtx we'we yujuçxa: Judiu jil'mée vxite nasa açxh u'se Dxus yuwe's jxpa'gasawe'sxtxi' cirkuncidâyçxa, Moises jxkaahni leya's jxuka nwêese'khan jxkaathe yuuna jĩtx.

⁶Txajũ' Jesus jxkaahnisa vxite' ancianowe'sx yakh pkhaakheçxa txãa yuwe's pheu'jya' puutx we'wetx. ⁷Txã'wê wala txaçx txãa yuwe's puutx we'wenijũ', Pedro' kiiteçxa na'wêk we'we:

—Yakthê'jwe'sx, i'kwe'sxa' jii i'kwe Dxusa' adxa's txhitxhku txajx yuwe ewte nvxiitwa'jsa's pta'sxkahn judiu jil'mée vxite nasatxwa, kxah txãawe'sxwa jiyukahn. ⁸Dxusa' jiia' maaçxah nwêese'jwa'jsatewa, txãasa fiik vxite nasawa txã'sna nwêese'jwa'jsa yuutxi's txajx Espiritu's ũs, kwe'sxtxiwa ma'wêga txajx Espiritu's ũs txã'wêy. ⁹Dxusa' maa yuhtxwa nasa fxisata' sũju'çme' kwe'sx yakh vxite nasa yakh. Txãasa'fĩçxáak vxite nasaçxawa Jesusa's yaakxa yuutxi's txãawe'sx pkaltxi' peltunây. ¹⁰Dxus txã'wê yũuçxa nwe'wenisatxi's çkijxa'kwe i'kwe'sxa' jweefĩçxáa thêysa's yuutxana jxkaah wêje'? Txãa thêysa's kwe'sx yaçgawe'sx yuhwa kxtey yuuya' ajameeta', aça' kwe'sx yu' wejxtha'w ajámée. ¹¹Txã'wê kwe'sxa' txãa thêysa's kxtey yũuya' ajámeetewa, Jesusa' peeygãhçxa yuuçxáane' kwe'sxtxi' nwe'we sũju'tha'w. Txãasane' vxite nasatxwa txã'wêyçxáa nwe'we.

¹²Pedro txã'wê we'wete', jxukaysa xsuuna'tx yuu, Pablowe'sx pta'sxni's wêse'jya'. Aça' txãawe'sxa' pta'sxtxi Dxusa' txã'wêk kim yuhwa ajãnímeesa's kaavxya'ja'jya' ajãwa'ja's kwe'sxtxi ũsçxa judiu jil'mée vxite nasatxwa jxuka pu'çx jĩna. ¹³Txãawe'sx pta'sxna jxã'the', Jakobok we'we:

—Yakthê'jwe'sx, mwêese'jwe. ¹⁴Simon Pedro na'wêk pta'sx judiu jil'mée vxite nasatxwa Dxusa' nyafxçxah peeygãhçxa txãawe'sxtxi txhitxhku txajx luuçx yuuwa'jsa. ¹⁵Txã'wê yuuwa'ja's Dxus yuwe pta'sxsawe'sx fxi'jtx txã' kxtey yuuk. Txãa fxi'jni' na'jĩ'k:

¹⁶Txã'wê yũunijũ sxawedçxa, ki' txaja'nja Davxid txaahni yat wetenisa's.

Txãa wetenisa's pheu'jçxa u'se vxitçxa nvxiitu'nja.

¹⁷Kxah maawa jxuka Dxusa's pakweya' ajatxna,

Maa kiwejuwe'sxwa adxa's jiyusa yu' jxuka.

¹⁸Txã'wê yũuwa'ja's Dxusa' nyafxĩ enteyku txã'wê we'wena kaajiyu'j.

¹⁹Txãa pa'gath adxa' naasũju': Judiu jil'meeçxawa Dxusna nwêese'jya' pakwesaatxi' kuçx kwe'sx leytxi nwêese'jwa'ja's jxkaahmée, ²⁰naasáa na'wê pta'sxna fxi'theçxáa ewna: Naa kiwega dxus itximeesa's weçxaya' tajkx ikhni çxiçxa's ũ'wa'jme'. Sa' ptammeesa pkaal yuuna fxi'zewa'jme'. Txã'wêy tajkxnawa thukçxa ikhnisa çxiçxa's ũ'wa'jme', eenawa ũ'wa'jme'. ²¹Txã'wê yũumeete', Moises leya's nyafxĩ enteytxi txãasu we'wena pta'sxna yuhna ũsu' çxhab iisa judiuwe'sx pkhaakheni yat-su jxkaase ensu jĩk Jakobo'.

²² Txajü' Jesus jxkaahnisawe'sx vxite' ancianowe'sx kxtee üssa jxukaysa puutx we'wetx Pablowe'sx yakh Antiokía çxhabna kaajxa'. Sa' txhitxhtxi Judas Barsabás yaasesa's vxite' Silas txāawe'sx wala jxtuhthesatx.

²³ Txāawe'sx yakh karta na'ljina fxi'ljçxa kaahtx:

Jesus jxkaahnisawe'sx vxite' ancianowe'sx weçxana yuwe kajaçtha'w ayte üssa yakhthē'jwe'sx jxukaysa yā'ljçxa judiu jiljmée vxite nasa Antiokiate üssa i'kwe'sxtxi, vxite' Siria Cilicia kiwetewe'sxtxiwa.

²⁴ Kwe'sxa' jiyutha'w kwe'sx yakh üssa judiu maafi yu' kwe'sx jxkaahmeetewa u'ljçxa txāawe'sx kaapiya'jni yakh i'kwe'sxtxi kaypuba'jna üsu'ne'ta Moises leya's nwēese'ljçxa ya'cirkuncidaïne'kwe jina. ²⁵ Txā'wē yūupa'ga kwe'sx jxukaysa na'wē yūuya' puutx we'weçxa kwe'sx yakh üssatx txhitxhçxa i'kwe'sxtxi thegya' kajaçtha'w kwe'sx yakhthē'j Pablowe'sx ²⁶ na'wē nxus knaytxi kwe'sxtxi jxpe'lja Jesukristo kaapiya'jni's pta'sxpa'ga txāawe'sx yakh. ²⁷ Aça' kwe'sx kaahni Judas vxite' Silas txāawe'sx pa'ljçxa i'kwe'sxtxi pta'sxitxna ma'wē yūuwa'ja'swa ew äate. ²⁸ I'kwe'sxtxi' jwee yu' thaakwe jxkaahmée na'wēçxāa yūuwa'ja'sku Dxus Espiritu' kwe'sxtxi kaaüusuthe'j: ²⁹ Naa kiwega dxus itximeesa's weçxaya' tajkx ikhni çxiçxa's ü'wa'ljme', eenawa ü'wa'ljme', tajkxnawa thukçxa ikhnisa çxiçxa's ü'wa'ljme'. Ptammeesa pkal yuuna fxi'zewa'ljme'. Na'wē neewe'we'tha'w txäatx kxtey yuuteçxāa ewna. Dxus yakh txutemée mfxi'zewe.

³⁰ Txā'wē kaathe', Silaswe'sxa' Antiokiate pa'ljçxa kxteewe'sx yakh pkhaakheçxa karta's dukhte', ³¹ txāa karta's lēeyçxa wala weçxatx txā'wē zhiçkwe yu'kxpehna fxi'jni's uyçxa. ³² Txāa Silaswe'sxa' Dxus kīh yūuya'watewa dxiikhēy pta'sxya' ājasatx yu', txāasa kxte yakhthē'jwe'sxtxi yu'kxpehna wala kçxhāaçxha'ljtx. ³³ Txāawe'sxa' kxte maz en üsçxa ki' sxaweduuçte', kxte yakhthē'jwe'sxa' yuwe wala weçxaa kaahna kaahtx kimne'ta kaah txāawe'sx tasxnay. ³⁴ Nawa Silas yu' kxte neeyūuya'k yajkx. ³⁵ Txajü' Pablowe'sxa' Antiokiate Dxus yuwe's kaapiya'jna nestxi yuu vxite yakhthē'jwe'sx yakh.

Pablo' Bernabé yakh txuteeçxa Dxus yuwe's pta'sxya' ki' kasehni

³⁶ Txāa e'su' Pablo' Bernabea's na'ljik:

—Yakhthē'jwe'sxtxi ki' thegya' u'ljwega maa çxhabsuçxah ne'tka'w Dxus yuwe's pta'sx kxsü jxuka, ma'wē üstewa uyya' jite', ³⁷ Bernabea' Juan Markosna pe'ljçxak u'lj wēe. ³⁸ Nawa Pablo yu' pe'ljna u'ljya' wa'lku, txā'wē mjii pu'çxna jxā'jmée Panfxiliajüçxāa sxawedsa' sühçxa. ³⁹ Txajü' puutx üusçxa we'weçxa txuteetx. Bernabea' Juan Markosna pe'ljçxa Çxipre kiwenku u'lj, ⁴⁰ naapkaçxha' Pablo' Silasnak txhitxh, txāa yakh u'juwa'lja. Aça' kxte yakhthē'jwe'sxa' txāawe'sxtxi Dxus kusete neewe'wena jxā'ljaçpkaçxha', kasehtx. ⁴¹ Sa' u'ljçxa Siria Cilicia kiwesu yakhthē'jwe'sxtxi kçxhāaçxha'ljtx Dxus yuwe's pta'sxna.

Pablowe'sx yakh Timoteo u'jni

16 ¹Pablo Silas yakh Derbe Listra çxhabsu pa'ljçxa kxte puutx uytxi Jesukristo's jxpa'gasa Timoteo yaasesa yakh. Txajx njî'ja' Jesukristo's jxpa'gasa judiu jî'thewa, Timoteo ney yu' judiu jî'jmée griegok yu'. ²Listra Ikonio çxhabsu u'psa yakhthê'jwe'sx maawa jxukatx txâa Timoteo's wala tuuthe'je'. ³Txajû' Pablo' txâa Timoteo's pe'ljçxa u'jya'k yajkx, sa' kaacirkuncidaî'kh txâ'wê griego nçxi'ka' jîna kxsû judiuwe'sx açewe'wekahmén. ⁴Sa' Jerusalente Jesus jxkaahnisa vxite' ancianowe'sx fxi'jni karta's jxukatx pta'sxna u'jwe' maa çxhabsuwa yakhtê'jwe'sxtxi. ⁵Txâ'wê jiyuçxa', kxsû pkhaakhesawe'sxa' jweeíçxáatx çxhâçxha Dxus yakh fxi'ze', açà' nasa yu' een isatx pehnana u'jwe' Jesus kaapiya'jni's nwêese'jna.

Pablo ksxa'wte teeçx piçthê'j Macedoniajüwe'sx pi'kxni

⁶Txajû' Pablowe'sxa' Fxrigia Galaciasutx ktejkana u'j, Dxus Espiritu' Asia kiwesu jwee yu' Dxus yuwe's kaapta'sxi'jme' naa pa'ga. ⁷Sa' Misia kiwete utxa kühçxa', Bitinia kiwen u'jwe'nja'w sühtewa, Espiritu' u'khaahme'. ⁸Txâ'wê yüuyâ'the', Misia kiwen teehwed u'ljçxa, Troas çxhabetx pa'j îkh wala pukate. ⁹Kxte üsçxak Pablo' teeçx kuste ksxa'w teeçx piçthê'j Macedoniatewe'sx na'wê pxthaa we'wena üste: Macedoniate ktejkaçxa, kwe'sxtxi myuh pu'çxya' jîna. ¹⁰Pablo ksxa'wte txâ'wê pa'ya yâ'the', Macedonia kiwen u'jya' pheu'tha'w, kwe'sxtxi' Dxus txâ'wê kajaçna Macedoniatewe'sxtxi txajx yuwe ewte nvxiitwa'jsa's pta'sxya' sühçxa.

Pablo Silas yakh Fxilipos çxhabte kxuuphni

¹¹Troas çxhabuh barkote khêeçxa u'tha'w îkh pxâhte Samotracia kiwen. Sa' vxite kuskuskhê' Neapolis çxhabte pa'tha'w. ¹²Txajû ki' u'ljçxa', Fxilipos çxhabte pa'ljçxa maz en üsu'tha'w. Txâa çxhaba' romanowe'sx iiyamunisa wala jxtuhtesa yu'k Macedonia kiwete. ¹³Teeçx jxkaase ente' çxhab eka kasehtha'w yu'wala pukate Dxus yakh puutx we'weya' pkhaakhenite, sa' Dxus yuwe's pta'sxtha'w kxte u'y pkhaakhesatx. ¹⁴Aça' kxte pkhaakhesa teeçxsa' Lidiak yaase yu', Tiatira çxhabuwe'sx, tela zhiçxkwesatx txweysáa. Txâa u'ya' Dxusna nwêese'jsak txâ'wê Pablo pta'sxni's wêese'jna u'pu'. Aça' Dxusa' txajx üuste kaajiyu'kh Pablo pta'sxni's. ¹⁵Txajû' txajx yattewe'sx yâ'ljçxa jxuka yu'te ya'bautisâyçxa', na'jînak kwe'sxtxi pxthaa we'wena pi'kx:

—Ü'kwe' Dxus yakh fxi'zewa'jsate i'kwe'sxa' ew jiiçxa', ü'kwe yatte myuhwe dejxa' jîçxa' äadxi'jimeeçxa pe'jna u'kh.

¹⁶Teeçx ente nyafxii üsnitey u'ljweççxa', puutx uytha'w teeçx kna'sa's eçxthê'j txajx üuste kaajiyu'the pta'sxna u'jusa yakh. Txâa kna'sa' patron

jxpe'jnisa ku'ga yu', sa' patronwe'sxtxi wala vxyu kaaknayu'ju'ku'ga txā'wē kīhnawa ūuste jiyuçxa nasatx pta'sxna. ¹⁷Txāa kna'sa' kwe'sx e'stey yuwe'k Pablo's na'wē sus we'wena:

—Naa piçthē'jwe'sxa' cielute Dxusna selpisaata', txāasatx i'kwe'sxtxi' pta'sxi' ewte u'jwa'j dxi'ja's jīna.

¹⁸Maz enwa txā'wē yūute', nmehte' Pablo' kuçxçxa na'wēk we'we txāa kna'sa ūuste u'psa eçxthē'ja's:

—Jesukristo jxkaahni's nwēese'jçxa, txāa kna'sa ūusuh mkaaseh jįçpkaçxha', eçxthē'ja' kasejk.

¹⁹Nawa patronwe'sxa' txāa kna'sa pa'gaçxāa vxyu knayna fxi'zeni's ivxiituyā'jçxa', Pablowe'sxtxi uweçxa çxhab pxāhte jxūna u'jçxa ²⁰kxte khuēswe'sxtxi na'jīnatx pāatxhī'kh:

—Naa piçthē'j judiuwe'sxa' wala kuçx yuuna ūsta' kwe'sx çxhabte.

²¹Kīhwa kwe'sxtxi selpiwa'jmeesaçxāanatx kaapiya'ja', aça' txā'sa' kxtey yuuya' ājāme'nja'w, kwe'sxa' romano nasatha'w naa pa'ga jīte', ²²nasa' wala ūusaçxana ahçetx. Aça' khuēswe'sxa' Pablowe'sxtxi ksūupi'jçxa peçxuukwe kaahtx. ²³Txā'wē wala pkxuuçxa', karcelte ktxaaja'jçxa kxte thegna ūssa's wala jxpa'yakx theg kaathe', ²⁴kxte thegsa' karcel dxiite jwee dxiiu pe'jna u'jçxa telte çxidatx se'wçxak ki'p.

²⁵Nawa Pablowe'sx kuspçāh Dxus yakh puutx we'wena memna u'pte', vxite preesu' wēse'jna u'ppkaçxha', ²⁶ehd seena' çxhāçxha u'the', karcel vxitxa' jxuka phaateçx, aça' preesu tudni kadenawa çxuktetex. ²⁷Txajū' karcelte thegsa yajkçxa', karcel vxitx jxuka phaateçxa ūste uyçxa', kçxilxa's kutxi'jçxa peekíçxāa ya'ikhya'wak yu', preesu' jxuka kasehçxa u'jne'ta sūhna ūukhçxa. ²⁸Aça' Pablo' na'wēk we'we:

—Txā'wē yūunu. Jxuka ūstha'w aye jīte', ²⁹karcelte thegsa' bela pki'taçxa ūukhna wuwuuçxāa kūhçxa, Pablowe'sx tasçte peeçxūkwek.

³⁰Txajū' Pablowe'sxtxi kutxi'jçxa na'wēk pējx:

—I'kwe'sxa' mpeeta'sxwe, çma'wē yūuuçxa Dxusa's uyuuki'th? jīte', ³¹Pablowe'sxa' na'wētç pta'sx:

—Kwe'sxtxi jxpe'jsa Jesukristo's jxpa'gaçxa yuuçxāa Dxus yakh fxi'zewa'ja's uyuune'ga petx iidx yattewe'sx yā'jçxa jxuka.

³²Txajū' Dxus yuwe's pta'sxtxi txajx yattewe'sx jxukaysatx. ³³Sa' karcelte thegsa' txāa kustey Pablowe'sx kpā'tx pkhi'kxna'wa txajx yattewe'sx yā'jçxa jxukaysa ya'bautisāytxi. ³⁴Txajū' txajx yatna pe'jna u'jçxa puuçku, sa' wala weçxana ūsu'k Dxus yakh fxi'zewa'ja's ji'phutha'w jxukaysa jīna.

³⁵Txajū' khuēswe'sxa' kusíi policia kaahtx karcelte thegsa tasçna Pablowe'sxtxi' txhweetekahn pta'sxya'. ³⁶Aça' karcelte thegsa' pta'sxku Pablo's:

—Khuēswe'sxa' txhweetekaahtx i'kwe'sxtxi'. Aça' kasehçxa ūukhmée me'jwe jīte', ³⁷Pablo' na'wēk we'we policiawe'sxtxi:

—Kwe'sxa' romano nasatewa ahçeçxa nasa jxuka uyna ũste pkxuuçxa karcelte kxuuphtxi, kīh yūupa'ga yuuwetewa txā'sa' jiyumey. Sa' āçxha' paaçte kim yuhwa jiyunimeete txhweete'nja'w ¿sūjuwá'nta? Txā'wē yūuya' yu' ajameetxna. Kwe'sxtxi kutxi'jya' txāawe'sx yuu yuwetxna jīte', ³⁸policiawe'sxa' u'ljçxa khuēwe'sxtxi txā'wēy pta'sxte', txāawe'sxa' wala ũukhtxi, Pablowe'sxa' romano nasatewa jiyuçxa'. ³⁹Txajū' khuēwe'sxa' Pablowe'sx tasxna u'ljçxa jxpubane'tka'w jīna pxthaa we'weçxa karceluh kutxi'ljçxa çxhabuh kaseh kaatx. ⁴⁰Aça' Pablowe'sxa' karceluh kasehçxa', kxte çxhabte Lidia yatnatx u'lj. Sa' ũukhmée meswe jīna yakthē'jwe'sxtxi kvxiisxa'ljçxatx txajū kaseh.

Tesalonikate nasa ũusçxani

17 ¹Pablo Silas yakh Anfxípolis Apolonia çxhabsu ktejkana u'ljçxa, Tesalónika çxhabtetx pa'lj judiuwe'sx pkhaakheni yatte. ²Pablo' jxkaase ensu' tekh ki'supkaçku Dxus libru ma'wēne' we'we' txā'sna kaapiya'jna ũsu' judiuwe'sx pkhaakheni yatte. ³Sa' āatek pta'sx:

—Dxus tasxuh yuusa' wala pxthaa yuuçxa uuçxawa ki' itxi yuua'jsak yu', aça' adx i'kwe'sxtxi pta'sxi'th Jesus jīna txāafík Dxus tasxuh yuusa Kristo yu'.

⁴Txajū' judiuwe'sx maafí yu' txā'wē Jesusa' Dxus tasxuh yuusa Kristo yuh yu'ne' sūhçxa Pablowe'sx ju'gutx yuu. Txā'wēy wala kuh griego Dxusna nwēese'jsawa utxaatx, vxite' u'ywa wala kuh utxaatx jxtuhthesawe'sx. ⁵Txā'wē yūute', vxite' judiuwe'sx Pablo pta'sxni's açesa yu' wala ũusaçxaçxa nasa ewmeesatx pkhakhçxa çxhabte wala seena' ksuusu'tx kuçx yuuna. Sa' Jasón yatte Pablowe'sxtxi pakweya' u'ljtx txajū kutxi'ljçxa nasaa ksxavxyte dukhya'. ⁶Nawa txāawe'sxtxi uymeeçxa', Jasón vxite' yakthē'jwe'sx kxte ũsaçxáatxwa wezxna u'ljçxa çxhabte khuēs tasxte kuutxa'ljçxa na'wēt x wēesxu:

—Txāa nasa naa kiwe's jxuka kaypuba'jsawe'sx aytewa pa'tha, ⁷aça' Jasona' txajx yattega jxpa'ga. Txāawe'sxa' jxukaysa aç'e'tx Romate jxkaahsa leya's, txā'wē vxite' jxkaahsa Jesus yaasesa ũsa' jīçxa.

⁸Txā'jīna we'wete', khuēwe'sx nasa jxukaysa wala seena' sustxi. ⁹Nawa Jasón vxite' txāa yakh ũssawe'sxtxi vxxy kusa'ljçxaçxáa txhweetetx.

Pablo Silas yakh Bereate pa'jni

¹⁰Kxte yakthē'jwe'sxa' txāa kustey wala dud kaatx Pablowe'sxtxi' Berea çxhabna. Kxte pa'jna'wa u'ljtx judiuwe'sx pkhaakheni yatna. ¹¹Kxte judiuwe'sxa' wala ew yu'tx Tesalonikatewe'sx na'wēmée. Dxus yuwe's wala weçxana jxpa'gaçxa, een isatx Dxus librute pakwé' Pablowe'sx pta'sxni isa dxihtewa jiyuya'. ¹²Txā'wē kxteewe'sx wala kuhsa jiyutx Pablo pta'sxni' isa yuh yu'ga sūhna, vxite' u'y griego jxtuhthesa petx

piçthê'j yâ'jçxa. ¹³Nawa judiu Tesalonikatewe'sxa' txã'wê Pablo' Dxus yuwe's pta'sxna ũsa' Bereate jîni's jiyuçxa', Berea çxhabna u'lçxa kxte nasatx wala seena' kaaũsçxa'jtx. ¹⁴Aça' kxte yakhthê'jwe'sxa' jwee yu' kaajxthêeyu'jmée Pablo's kaahtx Atenas dxi'j. Naasáa Silas Timoteo txãawe'sxçxáatx neeyüu Bereate. ¹⁵Pablo yakh pi'kxna u'jsawe'sxa' Atenas çxhabna pa'jtx u'j. Sa' ki' Bereate sxawedna pa'lçxa', Pablo' i'kwe'sxtxi wala dud yuukaakh txãa yakh ũsya' jînatx pta'sx Silaswe'sxtxi'.

Atenas çxhabte Pablo pa'jni

¹⁶Pablo' Atenas çxhabte Silas Timoteo txãawe'sxtxi üythasna ũsçxa', wala kuh yajkxna fxi'ze'k txãa çxhaba' naa kiwete dxus ïtximeesaçxaçxáatxku txakwe wala ji'ph yu' naa pa'ga. ¹⁷Txãasak judiuwe'sx pkhaakheni yatte judiuwe'sx yakh vxite' judiimeeçxawa Dxusa's yaakxsawe'sx yakh puutx we'we', sa' çxhab pxãhsuwa een isak we'we' Dxus ïtximeesatx neewe'wesawe'sx yakh. ¹⁸Txajü' kxte epikúreo kaapiya'jni's piyana ũssawe'sx vxite' estóiko kaapiya'jni's piyana ũssawe'sx piçthê'ja' Pablo yakh puutx we'wetx, naapkaçxha' maaíi yu' na'jînatx we'we' txãawe'sx pwe'sx:

—Naa thê'ja' çkîjki'k txakwe wala we'we'? jî'tx. Naapkaçxha' vxite we'weçxa':

—Dxus jiyunimeesatx kxsusnak pta'sxi' jî'tx.

Pablo' Jesus uuçxa ki' ïtxi' yuuni's pta'sxpa'gatx txã'jîna we'we'.

¹⁹Txajü' Pablo's teeçx ahte Areópago yaasesate pe'jna u'lçxa paapêjxtxi: —Kwe'sxtxi meen peeta'sx na'wê yuwe u'sesa pta'sxi'g txã'sa' jiyu wêetha'w. ²⁰Na'wê kîhwa fxiysa pta'sxi'g txã'sa' ew áate mkaajiyu'j jîna.

²¹Txã'wê Atenastewe'sxa' jxukaysa pkhaakheçxa kîhwa u'se kaapiya'jni's wêse'jna puutx paapêjxnaçxáa fxi'zesatx yu', aça' vxite kiwejuwe'sx Atenaste u'p-ya' pa'jsawa txã'wêytxi yu'.

²²Txajü' Pablo' Areópagote txãawe'sx ksxavxyte yujuçxa we'wek:

—Atenastewe'sx i'kwe'sxa' dxusa's wala yaakxsane'kwe sūju'th.

²³Msuuwa i'kwe'sx dxusa's neewe'wenisu thegna u'ljuçxa', uythu teeçx altalte na'wê fxi'jnisa: Jiyunimeesa Dxusa' jînis. I'kwe'sx na'wê jiyunimeesa dxus jîna neewe'wene'kwe txãa Dxus jiyunimeesa'sthu adxa' áate kaajiyu'ju'. ²⁴Txãa Dxusku naa kiwe's vxitçxa kxte kîjkîhçxah ũstxna txáatxwa jxuka vxit. Txãa pa'ga txãaíi namu' naa kiwe, cielu yâ'jçxa. Txã' piçthê'jwe'sx txaahni yat-su ũsu'çme'. ²⁵Txã' naa kiwete nasa pu'çxni fxi'zewa'jsame'. Txãaíik kwe'sx jxukaysa ïtxi' fxi'zewa'ja's ũs, kîjkîhnawa jxuka. ²⁶Sa' nasa maazkuéesawa teeçx piçthê'j jil'çxaçxáa yuuwa'ja's vxitçxa, msuuçxah u'pwa'jsatewa pta'sxna ena'swa txuhdek nus pa'jn ki' sekna yuuwa'ja's. ²⁷Dxusa' ũsna sūhçxa pakweçxa' thêymée uykahnku txã'wê yūu. Aça' Dxusa's pakwete yu' kwe'sx yakh jxu'jmeete ũsa'.

²⁸ Kwe'sxa' Dxus ũste fiçxáatha'w itxi ěse'sena fxi'zeya' ģja'. Dxus ũste iitx i'kwe'sx ji'j wala fxi'jya' jiasawe'sx na'wē we'we: Dxus taki'nitha'w jīna. ²⁹ Txā'wē Dxus taki'niyā'jçxa', piçthē'jwe'sx ũus yajkççxa nasa na'wē piisani ũsta' vxyuu beh, vxyuu çxihme, kwet txā'wēsa' kwe'sxtxi taki'satxna sūhwa'j ji'phmeetha'w. ³⁰ Dxusa' nyafxí ensuy yu' ma'jīme' nasa' jimeeçxa ma'wēwa yūutewa. Nawa āçxha' jxukaytxi jxkaaja'k pkaltxi nvxihtçxa Dxusa'sçxáa pakwekahn. ³¹ Txā'wēme', Dxusa' teeçx ente naa kiwete yuuwesatx kastigāywa'jsa txhitxhku. Aça' txāa txhitxhnisa' kxtey yuuyujuna. Txā'wē yuuya' fiçxáak uuçxawa ki' itxi yuu.

³² Txā'wē uuçxawa ki' itxi yuuk jīni's wēse'jçxa', maafí yu' weeçtxti, naapkaçxha' vxite we'weçxa':

—Vxite enkhē ki' pta'sxine'ga, txagaçx ki' wēse'je'nja'w jī'tx.

³³ Txā'jīyā'the', Pablo' u'kh. ³⁴ Nawa maafí yu' Pablo pta'sxni isa yuhna sūhçxa txāa yakh utxaatx. Kxte utxaasaawe'sx teeçxsa' Dionisio Areópagote pkhaakhesatewe'sxku yu', sa' teeçx u'y Dámaris yaasesawa utxaak, vxite yā'jçxa.

Korinto çxhabte Pablo pa'jni

18 ¹ Txāa e'su', Pablo' Atenasuh kasehçxa Korinto çxhabnak u'j. ² Kxte' teeçx judiu Akila yaasesa yakhku puutx uy, Ponto kiwejuwe'sx. Akila txajx nyu Priscila yā'jçxa u'seçxáa Italiaju pa'jçxatx kxte ũsu', Romate jxkaahsa Klaudio' judiuwe'sxtxi txajū jxuka kutxi'pha'ga. Aça' Pablo' txāawe'sx yatna u'jçxa Akilawe'sx yattek yuju. ³ Txāawe'sx na'wēy tultu kaççxak txweyna fxi'zesa yu', txāasak kxte neeyūu txāawe'sx yakh mjīina. ⁴ Sa' jxkaase ensu' judiuwe'sx pkhaakheni yatna u'jçxa, kxte judiuwe'sx vxite' judiimeesatxwa Dxus yuwe's pta'sxi'k Dxus jīi knayya'.

⁵ Silas Timoteo yakh Macedonia kiweju pa'the', Pablo' vxite mjīia's nvxihtçxa, Dxus yuwe pta'sxwa'the yuuçxáak yuju een isa, Jesusa' Dxus tasxuh yuusa Kristo yuh yu'k jīna judiuwe'sxtxi kaajiyu'jna. ⁶ Nawa txāawe'sxa' txā'wē pta'sxni's jxpeejxmeetha'w jīçxa ahçena weeçxwa'ja's uytxi. Aça' Pablo':

—Adxa' yuuwemeeth, i'kwe'sxtxi pta'sx yā'th. Aça' yuuwesa' i'kwe'sxi'kwe peekx uuwa'ja's pakwena ũspa'ga jīna txajx athni ropa's ya'tatak. Sa' txā'wē yūupa'ga āçxha' u'jweçthu judiu ji'jmée vxite nasatx pta'sxya' jīk.

⁷ Txā'jīna'wa judiuwe'sx pkhaakheni yatuh kasehna'wa, teeçx piçthē'j Justo yaasesa yatnak u'j, judiuwe'sx pkhaakheni yat pukateyçxáa. Txāa piçthē'ja' Dxusna neewe'wena fxi'zesak yu'. ⁸ Txajū' judiuwe'sx pkhaakheni yattewe'sx npiiçthē'jsa Krispo' txajx ũuste Jesusa's nwēese'jya' yajkxku petx txajx yattewe'sx yā'jçxa jxuka. Txā'wēy

Korintotewe'sxwa wala kuhsa Kristo's jiyuçxa üuste jxpa'gatx yu'te ya'bautisâyna.

⁹Txãa e'su' Jesusa' teeçx kuste na'ljinak vxyaaçxa we'we Pablo's:

—Weh yuhwa üukhmée Dxus yuwe's mpeeta'sx. Txã'wême', naa çxhabte adxna nwëese'jwa'jsa wala üs íçxáata'. ¹⁰Txãa pa'ga adxa' idx yakh pi'kxna üsthu, açá' kim yuhwa idxa's ikhya' yu' ajameetxna.

¹¹Txã'jijyã'the', Pablo' Korinto çxhabte txãawe'sx ksxavxyte Dxus yuwe's kaapiya'jna üsu'k anxu y medio ahpaçx.

¹²Nawa Akaya kiwete ne'jwe'sx Galión ensu' judiue'sxa' Pablo's ahçeqxa khuës tasxte jxüna u'ljtx. ¹³Sa' na'ljinatx pta'sx ne'jwe'sxa's:

—Dxusa's nwëese'jwa'ja's ley jxkaaja'k txãa jxkaahnijü kasehçxa Dxusa's fxiy nwëese'jwa'ja'sku kaapiya'ja' naa piçthê'ja' jite', ¹⁴Pablo pasya'wagaçxha', ne'jwe'sx Galión khuê'y judiue'sxtxi we'wek:

—Yuwe ewmeesa's adxa's päatxhî'kheçwaça', pu'çxhiwá'nja i'kwe'sx päatxhî'khni's. ¹⁵Nawa i'kwe'sx pwe'sx fxi'zeni leyçxá' açá' txã'sa' i'kwe'sx pwe'sx mpheu'jwe. Adxa' txãasu' thegu ji'phmeeth jçxa, ¹⁶txajü eka kutxi'kh. ¹⁷Aça' judiue'sx pkhaakheni yatte npiçthê'jsa Sostenesa's uweçxa, päpatx griegowe'sx jxukaysa ne'jwe'sx dxi'pte. Nawa Galiona' kuçx ma'jime'.

Pablo Dxus yuwe's pta'sxya' ki' kasejk naa yakha' tekhs us

¹⁸Txã'wëtewa, Pablo' wala kuh en üsu'k kxte. Txãa e'suk kxte yakthê'jwe'sxçxáatx nvxihtçxa, Siria kiwen u'jwa'j ji'phu barkote khêeçxa Priscila Akila yã'ljçxa. Txãa dxi'j u'jweççxa', Cenkrea çxhabte pa'ljçxa barkote khêemey txajx dxkhasa's jxuka ktxiidxi'k. Dxus yakh yuuçxáa fxi'zewa'ja's Dxus yakh puutx we'wenak txã'wë yüu. ¹⁹Txajü' Efxeso çxhabte pa'ljçxa', Pablo' Priscila Akilawe'sxtxi nvxihtna'wa, judiue'sx pkhaakheni yatna u'kh, kxte judiue'sxtxi Dxus yuwe's kaajiyu'jya'. ²⁰Aça' txãawe'sxa' wala pthaa we'wetx kuh en üskahn. Nawa Pablo' kxtey yuumée, ²¹txajü ki' kasejk na'ljçxa:

—Jerusalente fxiesta u'puya'wa' kxte üswa'j ji'pthu. Nawa ki' sxawedu'nja i'kwe'sxtxi thegya', Dxus ma'wë jxthãaste' jina we'weçxa, Efxeso çxhabuh barkote khêeçxa u'kh. ²²Sa' Cesarea çxhabte pa'ljçxa', Jerusalemak u'j kxte pkhaakhesawe'sxtxi weçxaya'. Txajü' Antiokía çxhabnak u'j. ²³Kxte maz en üçxaçxáa, txajü ki' kasejk Galacia Fxrigia kiwesu nyafxií pta'sxnisu jxuka peküjxa', Dxus yakh fxi'zesawe'sxtxi kçxháaçxha'jna.

Efxeso çxhabte Apolos Dxus yuwe's pta'sxni

²⁴Txãa ensu' teeçx judiu Apolos yaasesa Alejadría çxhabuwe'sx pa'kh Efxeso çxhabte, Dxus libru Moises fxi'jni's ew jiisa kaapiya'jya' sxiigmeesa. ²⁵Sa' Jesukristo kimtewa pta'sxni jiik yu', txãasak Juan yu'te

bautisâyniçxáana jiiçxawa txajx jiyuni yu'sa' jxpubamée kaapiya'ja'.
 26 Apolosa' judiwe'sx pkhaakheni yatte u'kaçxa sxiigmeek pta'sxi'. Aça' Priscila Akilawe'sx jiyuçxa', txãa Apolos txã'sçxáa fxii pe'jna u'jçxa, jweeíçxáatx ew pta'sx Jesukristo yakh fxi'zewa'ja's jxuka. 27 Aça' Apolosa' Akaya kiwen u'jweçte', yakthê'jwe'sxa' u'jwa'ja's pu'çxçxa teeçx karta fxi'jtx Akayate yakthê'jwe'sx wa'lmée jxpa'gakahn. Txã'wê Akayate pa'jçxa', wala pu'çxku Dxus peeygâhçxa nwe'wenisatx na'wê yûuna: 28 Jesusa' Dxus tasxuh yuusa Kristo yuh yu'k, i'kwe'sx úythasni txã'sna i'kwe judiwe'sx jxpuba jînak pta'sxi', Dxus librute ma'wê fxi'jni úsna txãa yakh kaaja'da'jna.

Efxeso çxhabte Pablo pa'jni

19 1 Apolosa' Korinto çxhabte úspkaçxha', Pablo' yaçkhêy pekûhni kiwesu pa'jna u'jçxa Efxeso çxhabtek pa'j. Kxtea' Jesukristo's iiwêse'jsa yakh puutx uyçxa', 2 na'wêk pêjx:

—I'kwe'sxa' Jesukristo's jiyunijû' ¿Dxus Espiritu's jxpa'gakwe'? jîte', na'wêtx pas:

—Dxus Espiritu's naa kiwete kaahnik yuu jîniçxáa yuhnawa iiwêse'jmeetha'w kwe'sxa'.

3 Txajû' Pablo' pêjxku:

—I'kwe'sxa' ¿kîh yûuya' sühçxakwe ya'bautisây? jîte', txãawe'sx pasçxa':

—Juan pta'sxçxa': Ya'bautisâywa'ja' jîk aççxáatha'w ya'bautisây jîtx.

4 Txajû' Pablo' na'wêk pta'sx:

—Juana' yu'te bautisâyku pkaltxi nvxihtçxa peena yu' pkalte fxi'zemeene'kwe, Dxus tasxuh yuusa Kristo adx e'ste yuja' txã'sna jxpa'gaya' jîçxa bautisâysak yu' jîte', 5 txãawe'sxa' ya'bautisâytxi Jesusa's nwêese'jya' sühçxa. 6 Txajû' Pablo' txãawe'sx dxikthesu peekizeçxa Dxusa's neewe'wete', Dxus Espiritu' txãawe'sx úuste khêek. Aça' vxite yuweju we'weya' âjawa'ja's jxpa'gatx, sa' Dxus kîh yûuya'watewa dxiikhêy pta'sxya' âjatx. 7 Txã'wê yûusa' doce piçthê'jtx yu'.

8 Pablo' kxte úsçxa' judiwe'sx pkhaakheni yatna u'jna nesku yu' tekh a'tepkaçx. Sa' nasatx ewku kaajiyu'ju' Dxus jxkaahwa'j ena's. 9 Nawa vxite yu' txã'wê pta'sxni's wêse'j wêemeeçxa, açewe'wetx nasaa ksxavxyte. Aça' Pablo' txãawe'sx tasxuh txuteeçxa Jesukristo's jxpa'gasawe'sxtxi pe'jna u'kh Tiranno kaapiya'jni yatna, sa' kxte' een isak pta'sxi' e'z anxupkaçx. 10 Aça' Asia kiwesu u'psa jxukaysa jiyutx judiu vxite' judiimeesawa Jesus kaapiya'jni's. 11 Txajû' Dxus pu'çxte', Pablo' nuykatxhi'k kîh weete âça'satxwa jxuka. 12 Txã'wê yûuyá'the', Pablo ropa meeçxa' panxwelo kîhçxáanawa jxûna u'jwe'tx âça'sawe'sx jxa'dxkahn. Aça' txã's jxa'dxçxaçxáa kîh weejuwa katxhi'tx, txã'wêy eçxwa txãawe'sx úusuh kaseje'tx.

¹³Txã'wě yūute', judiuwe'sx dxijxuuxça eçxtxi nasaa ūusuh kutxi'jsawe'sxwa Jesus yase's kxsusçxa eçxtxi kutxi'jya' na'wětx we'we':

—Pablo kxsusnisa Jesus yasete jxkaajaçthu kasejkahn jīnatx we'we'.

¹⁴Txã'wě yūusa' sacerdote npiīçthē'j Escewa nçxi'k sietesatx txã'wě yu'.

¹⁵Makwe txã'wě we'wetewa, eçxa' na'wěk pas:

—Jesusa's jiith kimtewa, sa' Pablo'swa iuythu. Nawa i'kwe'sx yuutxi' jiimeeth kimtewa.

¹⁶Txã'jīna'wa txāa eçx iiyamunisa nasa' jxkaahna

we'wesawe'sx kakwete āaphçxa, txāawe'sx athni ropatx sudena

kpā'vxitna yūute', txāawe'sxa' ūphna u'jtx sūpçxçáa.

¹⁷Txã'wě yūuni's Efxeso çxhabte ūssa judiuwe'sx vxite' judiumesawa jiyuçxa' Jesus yase's

kxsusya' wala ūukhtxi, sa' Jesusa's weçxanaçxáatx fxi'ze'.

¹⁸Txajū' Pablo pta'sxni' ewsa yuhna sūhçxa maazkuēsawa utxaatx

txāawe'sx ewmée yūuna fxi'zeni's āate pta'sxna.

¹⁹Aça' txã'wěy dxijxuuna fxi'zesawa jxukay txāawe'sx libru ewmeesatx jxūna pa'jçxa', jxukaysa

dx'i'pte kabtxi. Txāa libru' jxukaçxah yu' cinkwenta mil peso āhtx pa'gasa

yu'.

²⁰Txã'wě yūute', Dxus yuwe' jweeíçxáak çxhāçxha walaana u'j.

²¹Txāa e'su', Pablo' Jerusalenna u'jweççxa', Macedonia Akaya kiwesu

pa'jna u'jya'k yajkx. Sa' Jerusalenuh Roma çxhabnawa u'jwe'nja sūhnak

yajkx.

²²Txajū' Macedonia kiwen kaakh txā'sna pu'çxna u'jusa Timoteo

vxite' Erasto txāawe'sx e'zsatx. Nawa txāa yu' nee Asia kiwete ūsu'k maz

en.

Efxeso çxhabte nasa ūusçxani

²³Txān ensu' wala seena' sustxi Dxus yuwe's ahçeçxaçxáa.

²⁴Txāa yuwe kiissa yu' Demetrio vxyuu çxihme's dxus Diana ūsni yat na'wě

pheu'jçxa txāa yakh mjīisatx wala vxyu kaaknayu'jsak txã'wě yūu.

²⁵Sa' txāa yakh mjīisa vxite' txāa na'wěy pheu'jsatxwa jxuka pkhakhçxa na'jik:

—I'kwe'sxa' jii i'kwe na'wě mjīiçxa' kīh yuhwa peejxmeetha'w

vxyu uyu'.

²⁶Nawa i'kwe'sxa' iiwēse'jne'kwe Pablo jīnisa' naa çxhab

Efxesoteçxáamée, Asia kiwete msuuwa nasatxi' jxuka txajx ju'gu

tuphiça', txã'wě piçthē'jwe'sx pheu'jni dxusa' itximeesata' jīçxa.

²⁷Na'sa' mpa'yajkxwe. Txã'wě yūumeete', kwe'sx mjīiniçxáa vxitumée, dxus Diana

ūsni yat txakwe wala jxtuhtesa yuu vxituna. Aça' Asia kiwetewe'sx

jwee vxite kiwetewe'sxwa dxus Diana txakwe zhiçxkwesa's jwee yu'

nwēese'jmeetxna.

²⁸Txã'jīna we'wete', wala ūusaçxaçxa na'jīnatx sus we'we':

—jEfxeso çxhabte dxus Diana yuuçxáa maatewa jxthaakwe jxtuhtesa'!

jīnatx sus.

²⁹Aça' txāa çxhabtewe'sx jxuka ūusaçxaçxa e'z piçthē'j

Macedoniajūwe'sx Pablo's pi'kxna yuusa Gayo Aristarko txāawe'sxçxáatx

uweçxa wezxnna u'jtx çxhabte txāawe'sx ūsnite.

³⁰Pablo' kxte u'ka wēek nasatx we'weya'. Nawa kxte yakhthē'jwe'sxa' ka'ga'jmeeta'.

³¹Txã'wěy Pablo namiku khuēswe'sx jxtuhtesawa Pablo's kuçx kxte

u'kakaahmeeta'. ³²Naapkaçxha' pkhaakhesa yu' kījkihwa ūsçxa we'wena seena'tx susna ūsu'. Nawa kxte pkhaakhe pu'çxsa jwee kuhsa yu' jiimeetx yu' kīh yūupa'ga txā'wē pkhaakhetewa. ³³Nawa kxte ūssa maafī yu' kīh yūupa'ga ūsaçxana ūstewa jiisa', teeçx piçthē'j Alejandro yaasesa's pta'sxçxa nasaa ksxavxyte ukapajxna nuykūhtx we'wewa'jsa. Aça' txāa piçthē'ja' sxuuna' yuwa'ja's kuseju pta'sxçxa judiuwe'sxa' yuuwemeetha'w jīna we'we wēek. ³⁴Nawa judiu fiçxáatewa jiyuçxa', jxukaysa ki' sus we'wetx e'z ora āhpkaçx na'jīna:

—jEfxeso çxhabte dxus Diana yuuçxáa maatewa jxthaakwe jxtuhthesa'! jīna.

³⁵Txajū' çxhabte sekretario' pejka sxuuna' vxitçxa' na'jik:

—Efxesotewe'sx mwēese'jwe. Naa çxhabte nasa' dxus Diana ūsni yata's wala jxpa'yakx thegna vxite' Diana's piisanisa cieluju kījk txā'snawa txā'wēy ew jxpe'jwa'jsatewa jxuka jiita' maa kiwetewe'sxwa. ³⁶Aça' çma'wē yūuçxa txā'sa' thegmée nvxiht-ya' ājatxki? Txā'wē yu' yuumeetxna. Txāa pa'ga wejx kuh yajkxmée sxuuna' myuuwe. ³⁷Txāa pa'gatey e'z piçthē'j i'kwe'sx jxūna kūji'kwe txāawe'sxa' i'kwe'sx dxus Diana's suwwameeta' sa' açewe'wenawa ūsmeeta'. ³⁸Meeçxa' Demetrio vxite' txāa yakh mjīisawe'sxçxáa maa yakh iipuisaçxawa, pāatxhī'khwal' jī'phta', txāa pa'gatey khuēswe'sx ūsta', aça' txāawe'sx tasxte pāatxhī'khyā' u'jwetxna, kxah kaapdxī'pu'jçxa yuwe's pheu'jutxna kīhteçxah yuuwesatewa. ³⁹I'kwe'sxa' khuēs tasxtemée i'kwe'sx pwe'sxçxáa puutx we'wewa'j jī'phçxawa, zhiçxkwe mpuutxwe'wewe txā'wē susmée. ⁴⁰Na'wē āçxh susni yuwe's gobierno' paapēyiwáana aça' seena' ewmeete neeyūuwa'the ūstha'w, kīhwa yuuwemeete suspa'ga.

⁴¹Txā'wē we'weçxa', kaapçu'juk txāa susni's.

Macedonia vxite' Grecia kiwen Pablo u'jni

20 ¹Yuwe susni pçuute', Pablo' Dxus yakh fxi'zesawe'sxtxi pa'yaçxa wala ew yu'kxpehçxak txāawe'sxtxi weçxaçxa Macedonia kiwen u'j. ²Txāa kiwesu jxuka pekūjk yakthē'jwe'sx ūukhwe'sxte kçxhāaçxha'jna. Sa' txajū' Grecia kiwenwa u'kh. ³Kxte tekx a'te ūsçxa', barkote khēeçxa Siria kiwen u'jya'wak yu'. Nawa judiuwe'sx ikhya'wata' txāa dxi'the jīni's jiyuçxaçxáa, barkote uljmée çxidaçxáa maa dxi'june' pa'j txā'wēyku sxawedxa' yajkx, Macedonia kiwejuy uykhēwna. ⁴Txāa yakh pi'kxna uljtx Sópater Bereajuwe'sx, Aristarko vxite' Segundo Tesalonikajuwe'sx vxite' Gayo Derbejuwe'sx vxite' Timoteo vxite' Tíkiko Trófximo txāawe'sxa' Asia kiwetewe'sxtxi yu'. ⁵Txāa yakthē'jwe'sxa' dxi'j pxājū yaçte u'jçxa Troas çxhabtetx kwe'sxtxi ūythas. ⁶Pan lewadura jī'phmée ū'ni fxiesta skhēwniitetha'w kwe'sxa' kaseh, Fxilipos çxhabuh barkote khēeçxa, sa' tahç ente' kpajkxtha'w Troas çxhabte. Kxte siete entha'w ūsu'.

Troas çxhabte Pablo weçxaya' pa'jni

⁷Ki'sen ente!, Dxus yakh fxi'zesawe'sx yakh pkhaakhetha'w kxteçxah pkhaakheçxa û'ya'. Naapkaçxha' Pablo! Dxus yuwe's kaapiya'kh. Txã'wê kuskuskhê' u'jwe ji'phçxa', txaçx kuspaxâhnpkaçxku pta'sxna ûsu', ⁸teeçx piesate êete wala kuh lampara pki'tanisa ûsu'tx kxtee. ⁹Aça' kxte teeçx piçtakx Eutiko yaasesak wentanate kaçxçxa u'pu'. Txã'wê Pablo' wala jxu'j we'wete!, txãa piçtakxa' dee wêeçxa dehna u'pîi saapajkxku yat êe walaju, aça' uuniisa'stxi kiis. ¹⁰Txã'wê yûute!, Pablo' sa'jçxa, txãa uusa's psxa'dçxa na'wêk we'we:

—Yakhthê'jwe'sx, nxusnuwe, ki' îtxi yuuk jînak pta'sx. ¹¹Txajü' Pablo' ki' êe yatte tejkaçxa Santa Cena's puuçku. Txã'wê yûuçxa khikhyna sêhpkaçx pta'sxçxak u'j. ¹²Txãa piçtakxa' ki' îtxi yuute!, pe'jna u'jçxa jxukaysa wala weçxana neeyûutx.

Troas çxhabu Mileto çxhabna u'jni

¹³Kwe'sxa' barkote khêeçxa yaçte u'tha'w Asón çxhabna, Pablo's kxte ûythasya'. Naapkaçxha' txã' çxidajk u'j. ¹⁴Asón çxhabujk kwe'sx yakh barkote khêe, aça' txajütha'w Mitilene çxhabna u'j. ¹⁵Txajü ki' kasehçxa vxite enkhê' Kîo kiwe pukasutha'w skhêw. Sa' vxite enkhê' Samos kiwetek barko' dudte utxaa. Txajü ki' u'jçxa', teeçx ahte Trogilio yaasesate pa'jçxatha'w jxkaase. Txajü' vxite enkhê' ki' u'jçxa' Mileto çxhabte pa'tha'w. ¹⁶Pablo' Asia kiwete jxthêeyuuya'mée, Efxeso çxhabte u'kame', Jerusalente dud pa'jçxa Pentekostes fxiestate ûsya' sühçxa.

Mileto çxhabu Efxesotewe'sxtxi pa'yani

¹⁷Sa' Mileto çxhabte pa'jçxa', Efxeso çxhabte ancianowe'sxtxi pa'yak na'wê we'weya':

¹⁸—Adxa' Asia kiwete nyafxçxah pa'jîi kihtka yûuna fxi'ze açxpkaçx txã'sa' i'kwe'sxa' jii i'kwe. ¹⁹Judiuwe'sx açepa'ga txakwe wala nxuswa'j en pa'thewa, Jesukristo's een isa selpiina bagaçxtewa i'kwe'sxtxi û'ne petx khakh pu'çxna nesthu yu' kim yuhnawa iieweçx we'wemée. ²⁰I'kwe'sxtxi selpiwa'jsa Dxus yuwe's pta'sxmée yu' yuumée, nasaa ksxavxysu yat-suwa kaapiya'jna nesthu yu'. ²¹Txã'wêy judiuwe'sx vxite' judiu ji'jmée txãawe'sxtxiwa jxukaysatx pta'sxthu: Dxus tasxte sxawedxa' pkaltxi nvxihtçxa kwe'sxtxi jxpe'jsa Jesukristo'swa ûuste miipa'gawe jîna. ²²Açxha' u'jweçthu Jerusalenna Espiritu kaahni. Nawa jiiimée u'jweçthu kxte jwee kîhçxa yuune'thewa. ²³Naasáa na'wê yuuçxáa jiith: maa çxhabte u'thewa Dxus Espiritu' pta'sxna nesku yu' karcelte kxuuphni wala nxuswa'j ji'phgu jîna. ²⁴Nawa txã'sa' yaaki'çmeeth, sa' adx uuwa'ja's yuhwa ûukhu'çmeeth. Jesukristo neewe'wek Dxus peeygãani's txã'sna uu entepkaçx weçxana pta'sxna fxi'zewaççxáa, txã'wêena sju'u'th.

²⁵ Ayte i'kwe'sx yakh ūşça' Dxus jxkaahwa'j ena's pta'sxthu txã's wēse'jsa aytewe'sxa' adxa's āçxhuyã'ja' peena yu' uymeene'kwe sūju'th. ²⁶ Nawa adxa' i'kwe'sxtxi kaapiya'jyã'th na' yuuwemeeth, ²⁷ txãa pa'gately Dxus jxthãasni's paaçte nvxihtmée jxuka āateçxaçxáath pta'sx naa pa'ga. ²⁸ Aça' āçxha' peekíi ya'mpa'yajkxwe, txã'wēy Jesukristo ee pkawçxa weynisa Dxus luuçxtxiwa ew jxpe'jna, Dxus Espiritu' i'kwe'sxtxik thegwa'jsa nvxiht naa pa'ga. ²⁹ Jiith adx u'the', vxite pa'jatxna Dxus yakh fxi'zesawe'sxtxi ivxiitu wēena, sxí'j weesweewa ma'wēta piisxaatx ivxiitu' txã'wēy yūuya'. ³⁰ Jxpa'yakxmeeçxa', i'kwe'sx pwe'sxíiwa kasejene'kwe isasa's pta'sxipkaçxte kaypuba'jwa'jçxá's pta'sxna Dxus yakh fxi'zesatx kaypuba'jna. ³¹ I'kwe'sxa' miyajakxwe, adxa' tekx anxuth teeçxsa na'wēçxah yu'kxpehna ūsu' en petx kus yãljçxa ū'ne petx khakh.

³² Āçxha' yakhthē'jwe'sxtxi Dxusa's neewe'weçxa txajx kusete nvxiituçthu txajx kaapiya'jni's peçxkanamée fxi'zekahn, txãa pa'gately txajx yuwe' kçxhãaçxha'jna weçxana kaafxí'ze'jçxa cielute txajx nwe'wenisa jxukaysa yakh ūswa'ja'swa ūsya' ajawa'jsa'. ³³ Adxa' i'kwe'sx yakh ūşça', vxyu, ropa, txã'wēsa pees jxthãasna fxi'zemeeth kim yuhnawa. ³⁴ I'kwe'sxa' ew jii i'kwe txã'wē yūumée, adx kuseju mjiiçxath kíh peejini'swa uyu', vxite' adx yakh u'jusawe'sx jiiwa txã'wēy. ³⁵ Txã'wē vxite jxpeejsatx pu'çxwa'ja's kaapiya'jnath fxi'ze bagaçxtewa. Txã'wē yūukahník Jesukristowa na'j'i': Peessa yakh wejx weçxa yuja' jxpa'gasate jxthaakwe j'i'k.

³⁶ Pablo' we'wena jxã'jçxa', jxukaysa yakh peejxūkweçxa Dxus yakh puutx we'wek. ³⁷ Txajū' jxukaysa ū'nena psxa'dçxa Pablo's weçxatx. ³⁸ Txã'wē peena yu' uymeene'kwe jíte', wala nxusna ūsu'tx, sa' pi'kxna u'jtx barkote khēepkaçx.

Jerusalenna Pablo u'jni

21 ¹ Yakhthē'jwe'sxtxi nvxihtçxa, barkote khēena'wa teehwed u'tha'w teeçx ahte Kos yaasesate. Sa' vxite enkhē' Rodas kiwete pa'tha'w. Txãajū Pátara çxhabnatha'w u'j. ² Pátara çxhabte pa'ljçxa, teeçx barko uytha'w Fxenicia kiwen u'jsa, txãatetha'w khēeçxa u'j. ³ Çxipre kiwe's uynatha'w skhēw, txã' jebu ju'guk neeyūu. Txã'wē u'ljçxatha'w Siria kiwete pa'j. Sa' Tiro çxhabte u'katha'w barko' kxte karga spãasxwa'kh ji'phu' naa pa'ga. ⁴ Kxte' Kristo's nwēese'jsawe'sxtxitha'w uy, sa' siete entha'w ūsu' txãawe'sx yakh. Aça' txãawe'sxtxi Dxus Espiritu' kaajiyu'the', Pablo's pta'sxtxi Jerusalenna u'jmeene'ga jina. ⁵ Txã'wētewa, siete en skhēuuçpkaçxha', kasehtha'w. Aça' Kristo's nwēese'jsawe'sx jxukaysa nyuuwe'sx petx luuçx yãljçxa pi'kxna yuwe'tx çxhab ekaju kasehpkaçx. Sa' kxte íkh pukate peejxūkweçxa Dxus yakh puutx we'weçxa, ⁶ psxa'dna weçxana'wa barkote khēetha'w. Naapkaçxha' txãawe'sxa' sxawedtxi yatna.

⁷Kwe'sxa' Tiro çxhabuh barkote u'jçxa, Tolemaida çxhabettha'w pa'j. Kxte teeçx entha'w üsu' yakthê'jwe'sxtxi weçxana. ⁸Vxite kuskuskhê' Pablo vxite' txãa yakh u'jusa yã'jçxa kasehtha'w Cesarea çxhabna u'jya'. Kxte pa'jçxa', Fxeliipe yatna u'jçxa kxtetha'w deh. Txãa yu' Pedro txhitxhku siete diákono txãatewe'sxku yu' Jesukristo kaapiya'jni's jxpa'gaçxa pta'sxna pekühsa. ⁹Txãa Fxeliipe' pahz niisa kna'sasak ji'phu', Dxus we'weni's pta'sxsa. ¹⁰Kxte maz en üspkaçxha', teeçx piçthê'j pa'kh, Agabo yaasesa Judea kiwejuwe'sx, Dxus kîh yûuya'watewa dxiiikhêy pta'sxsa. ¹¹Txã' kwe'sxtxi puutx uyçxa', Pablo jxtudni's pêjçxa peekiçxáa çxida petx kuse yakh ya'jytudçxa na'wêk we'we:

—Dxus Espiritu' pta'sxi'k, Jerusalente judiwe'sxa' naa jxtudni namu's na'wê tudçxa vxite nasatx dukhetxna jîk.

¹²Txã'jîni's wêse'jçxa', kwe'sx vxite' Cesareatewe'sx yã'jçxa wala neevxisxatha'w Pablo's Jerusalenna u'khamen. ¹³Nawa Pablo' na'wêk pas:

—¿Kîjxa'kwe txakwe nxusna ü'ne', adxna khaawãsi'j wêeçxa? Adxa' Jesukristo's selpiipa'ga tudniçxáa yuumée, Jerusalente uuwa'j ma'k yuu nawa txã'sa' üukhu'çmeeth jîk.

¹⁴Neevxisxaya' ajameeyã'jçxa', Dxus ma'wê jxthãaste' kxtey yuuna jînaçxáatha'w we'we.

¹⁵Txãa e'su', pheu'jna'wa Jerusalenna u'tha'w. ¹⁶Aça' Cesareate yakthê'jwe'sx pi'kxna yuwe'tx, vxite' txãawe'sx yakh teeçx piçthê'j Çxipre kiwejuwe'sx, wala txaçxyã'j Dxus yakh fxi'zesa Mnasón yaasesawa yuwe'k. Aça' kwe'sxa' txajx yatte dejxa'tha'w puutx we'we.

Pablo Jerusalente pa'jçxa Jakobo tasxna u'jni

¹⁷Jerusalente pa'the', kxte yakthê'jwe'sxa' wala weçxana jxpa'gatx. ¹⁸Vxite enkhê' Pablo' kwe'sx yakh u'kh Jakobo yatna pa'jya', aça' kxtea' ancianowe'sx jxukaysatx üsu'. ¹⁹Pablo' weçxana jxã'jçxa', pta'sxku judiu jî'jmée vxite nasa ksxavxysuwa Dxus yuwe's pta'sxte', txãawe'sxtxi Dxus ma'wê yûuni'swa jxuka. ²⁰Aça' wêse'jçxa', Dxusa's wala weçxaçxa na'wêtx pta'sx Pablo's:

—Yakthê'j, idxa' jiiyã'jne'ga judiu jî'jwe'sx wala kuhsa Jesus kaapiya'jni's jxpa'gasa üsta', sa' txãawe'sxa' Moises leya's nvxihtmeete ewna jî'tx. ²¹Txãawe'sxa' na'jîni'sta jiyu: Idxa' judiwe'sx jxukaysatx vxite kiwejuwe'sxtxi kaapiya'jçxa Moises jxkaahni's nwêese'jmeene'kwe, sa' i'kwe'sx luuçxtxiwa cirkuncidãimeene'kwe, kîh yuhnawa kxtey yuuwa'jme', txã'jînak pta'sxi' jîni's jiita'. ²²Sa' iidx pa'jni's jiyuçxa', txãawe'sxa' idxa's wêse'jya' pkhaakhetxna, aça' ¿kîh yûukxtha'w? ²³Wejxwa na'wê yûune'ga: Ayte pahz piçthê'j üsta'. Txãawe'sxa' Dxus yatte u'kaya' ajawa'ja's Moises ley jxkaaja'k txã'sa' kxtey yuuya' üsta'. ²⁴Aça' idxa' txãawe'sxtxi dxuus yatna pe'jna u'jçxa ley jxkaahni ki'swal'ja's kxtey kxu'ju'june'ga petx idx

yā'jçxa. Sa' kxte dukhwa'ja'swa idxçxaçxáa deweene'ga. Txajū' txāawe'sxa' dxkhasa's ktxiidxi'jixna idxwa txā'wēy. Txā'wē leya's kxtey yuute', maawa jiyutxna txā'wē Pablo' leya's nvxiitwa'ja' jīnak jxkaaja' jīçxa' īsxiija'ne'ta sūhna. ²⁵Nawa judiu jil'jmée vxite nasaçxawa Jesus kaapiya'jni's jxpa'gasawe'sx yu' ley jxkaahni's kxtey yuuwa'j jil'phmeeta'. Txāawe'sxtxi' kwe'sxa' pta'sxna fxi'jyā'tha'w na'wē yūuwa'ja's: Dxus ītximeesatx weçxaya' tajkx ikhni çxiçxa's ū'wa'jme', eenawa ū'wa'jme', tajkxa's thukçxa ikhnisa çxiçxa'swa ū'wa'jme', sa' ptammeesa' pkal yūuna fxi'zewa'jme' jīna pta'sxnisaçxá's kxtey yuuwa'jsata' jītx.

Dxuus yatte Pablo's tudni

²⁶Txajū' Pablo' txā pahz piçthē'jtx pe'jna u'jçxa', kuskus enkhē' ley jxkaahni's jxuka kxtey yuuçxak dxuus yat dxiite u'ka kīh entepkaçx ki'sya'waçxawa txāatx pta'sxya'.

²⁷Sa' siete en ki'swa'jtx jxuka jxā'jaçpkaçxha', Asia kiwejuwe'sx judiuwe'sx pa'jçxa Pablo's dxuus yatte uyçxa', nasa jxukaysatx kaaūusçxa'jna'wa Pablo's tudçxa ²⁸na'wētx sus we'we:

—Israelwe'sx, mpu'çxwe. Naa piçthē'jīk msuuwa jxuka nasa jxukaysatx kaapiya'jna pekūju' kwe'sx jil'jtx açewe'wena, Moises leynawa txā'wēy. Sa' dxuus yatnawa açewe'we'k. Sa' txā'wēçxáa yūumée, açxha' judiu jil'jmée griegowe'sxtxiwa dxuus yat dxiite ka'gak kazx vxitna jil'tx.

²⁹Efxeso çxhabuwe'sx Trófximo yakh Pablo' Jerusamente ūste ne'ta uy, txāasatx dxuus yat dxiite ka'ga'jne' sūhçxa txā'jīna we'we'.

³⁰Txā'jīna pta'sxni seena' suste', nasa' wala dud kūhçxa Pablo's tudçxa dxuus yat ekaju wezxa kutxi'jiçpkaçxha', vxitxa's aphtxi. ³¹Ikhyawatx yu', nawa komadante' jiyuk Jerusalen çxhabetewe'sx seena' susna ūsta' jīni's. ³²Txajū' komadante' soldau vxite' txāawe'sx pwe'sx jxtuhthesatx pkhakhçxa wuwuuçxáatx kūh nasa susna ūsnite. Aça' komadante vxite' soldauwe'sxtxi uyçxa', Pablo's ikhmeeta'. ³³Txajū' komadante kūhçxa Pablo's e'z kadenajuk tudkaah. Txā'wē yūuçxak pējx çkimna sa' kīhga yūu' jīna. ³⁴Nawa nasa txā'wē jxukaysa sus we'wena ūste', komadante jiyuya' ājameeçxa', kuartel yatna jxūna u'khaakh. ³⁵Kuartel yat vxitxte kūhnaçxáa soldauwe'sxa' Pablo's yakhçxatx u'j, txā'wē nasa' ikh wēesa e'ste neeuna:

³⁶—Naa piçthē'ja's ikhwa'ja' jīna sus we'wena yuupa'ga.

Pablo kuartel vxitxuh we'weni

³⁷Pablo's kuartel yatte ka'ga'jaçte', txā' na'wēk we'we griego yuweju komadante's:

—çMaz yuweçxáawa kwe'we'jmeema'g? jīte', komadante pasçxa':

—Idxa' çgriegowá'ga? ³⁸Txā'wēçxa' çnyafxí entey teeçx Egiptujuwe'sx na'wē nasa ikhsaçxaçxáatx kuarto mil āh nasa u'pnimeete pkhakhçxa puui kiisku txāameene'ga? jīte', ³⁹Pablo' na'jīk:

—Adxa' judiuth. Cilicia kiwete Tarso çxhab jxtuhthesatewe'sxthu. Aça' naa nasatx we'wewa'ja's ùsune'ga jíte', ⁴⁰komadante' ùythasku. Naapkaçxha' Pablo' kuartel vxixttxe yujuna'wa kuseju sxuuna' yuuwa'ja's pta'sxte', jxuka sxuuna' yuutx, aça' na'wèk we'we hebreo yuweju:

22 ¹—Yakhthê'j vxite' thê'jsawe'sx, mwêese'jwe adx we'weni's jíte', ²hebreo yuweju we'weni's wêse'jçxa', wejxtxi sxuuna' yuu. Txajû' Pablo' na'jik:

³—Adxa' judiuth, Cilicia kiwete Tarso çxhabte upxsa. Nawa ayte Jerusalente Gamaliel kaapiya'jni walasaath, kwe'sx yaçgawe'sx leya's wala ew nwêese'jna. Bagaçxtewa Dxusa's ùsuh jxukath selpiina fxi'ze', naa ente i'kwe'sx ma'wèkwe selpi' txâ'wëy. ⁴Adxa' nyafxí' Jesus kaapiya'jni's nwêese'jsatx ahçeçxa kiikhe'jna vxitetxi' tudçxa jxüna u'th piçthê'j petx u'y yâ'jçxa karcelte txajxa'. ⁵Sacerdote npiičthê'j vxite' judiunthê'jsawe'sx jxukaysa jiita' txâ'wë Jesukristo yakh fxi'zesatx tudwa'ja's Damaskote yakhthê'j judiuwe'sxtxi pta'sxna karta pêyni's. Txâ'wë yuuçxath u'j tudçxa ay Jerusalente nuypa'jçxa kastigäyya'.

Pablo' Dxus yakh fxi'zeyea' utxaaççxa txâa ma'wêne' yûu txâ'sna pta'sxni
(Hch 9.1-19; 26.12-18)

⁶Nawa adxa' êepxâh Damasko çxhabte utxaana pa'jaçpkaçxha', naa dudte êe walaju eenak kweeth adx dxi'pte uymeenus. ⁷Aça' kiwega weteçpkaçxha', na'wèk we'weni pthûuse: Saulo, Saulo, çkîh yûupa'gaga adxa's ahçeçxa pkxuuya' pakwé'? jíte', ⁸pêjxthu: Idxa' çkimga? Txajû' na'wèk pta'sx: Idx na'wë ahçeçxa pkxuuya' pakwe'g txâath Jesus Nasarethuwe'sx jik. ⁹Aça' adx yakh u'jsa' txâ'wë eena' kweethni's uyçxa wala üukhtxi. Nawa adxa's we'weni yu'sa' jiyumeeta'. ¹⁰Txajû' adxa' na'jînath we'we: çKîhga yûu jxthâasu'? jíte', Kiiteçxa Damaskon me'j, kxte ya'pta'sxina kîh yûuwa'ja'swa jînak jxkaah. ¹¹Txâ'wë eena' kweethnijüçxáa uyya' âjâmeete', adx yakh pi'kxna u'jsawe'sxa' adxa's pu'kiççxa u'jtx Damaskote pa'j.

¹²Kxtea' teeçx piçthê'j u'pu'k Ananias yaasesa, Moises leya's jxuka nwêese'jsa. Txâ'wë nwêese'pha'gatx kxte judiuwe'sxa' txâa Ananiasa's wala jxtuhthesa' jîna we'we'. ¹³Txâa Ananiasa' adxa's thegya' pa'jçxa', na'wèk we'we: Yakhthê'j Saulo, idxa' uyya' âjawa'ja's ki' mpa'ga jîçpkaçxha', thegçxa' uyya' âjath. ¹⁴Txajû' na'wèk pta'sx: Kwe'sx yaçgawe'sxtxi jxpe'jsa Dxusa' idxa's nyafxiiteyku txhitxh txâ'sna nwêese'jwa'jsa, sa' kîh pkal yuhwa jî'phmeesa's yafxju uyçxa txajx yuweju we'weni'swa wêse'jwa'jsa. ¹⁵Äçxha' idxa' naa kiwete jxukaysa dxi'pte Dxus yuwe's pta'sxya' u'jwene'ga sa' ma'wêçxahne'ga uyna wêse'jna yuu txâ'snawa pta'sxya'. ¹⁶Sa' çkîjxa'çxáa txakwe wala jxthêyuu'ki'g? Äçxhîi kiitena'wa yu'te ya'bautisâyçxa Jesukristo's ùsuh jxuka miijaykx iidx pkal peltunäyini yuukahn jînak jxkaah.

Judiu jì'jmée vxite nasatx Dxus yuwe's pta'sxya' kaahni's Pablo pta'sxni

¹⁷Txāa e'su' Jerusalenna ki' sxawedçxa dxuus yatna Dxus yakh puutx we'weya' u'the', Jesusa' adxa's kxte vxyaaçxa, ¹⁸na'wèk we'we: Jerusalenuh dudçxáa mkaaseh. Txā'wēme', idxa' makwe pta'sxtewa nwēese'jmeetxna jīte', ¹⁹na'wēth pas: Adx txā'wē judiuwe'sx pkhaakheni yat-su u'lçxa kxsū idxna neewe'wesatx karcelte txahna vxitetxi' kxuuphsath. ²⁰Sa' idxna neewe'wena selpisáa Esteban eea's pkawuuçtewa uynath ūsu', txā'wē yūuni ewna sūhna. Sa' ikhsawe'sx atxhtxi thegsath yu' jīte'wa, ²¹Jesusa' na'jīnak jxkaah: Me'lçxáa, adxa' jxu'j kaajxa'wath judiu jì'jmée vxite nasatx pta'sxya' jīk.

Pablo's komadante nwe'weni

²²Txā'wē judiu jì'jmée vxite nasatx pta'sxya' jīni's wēse'lçxatx, ki' ūusaçxana na'jīna sus we'we:

—Txāa piçthē'ja's ikhteçxáa ewna. Peena yu' ĩtxi fxi'zemeena jī'tx.

²³Txā'wē sus we'wena, txāawe'sx atxhtxi éete wāatahna kiwe's paçççxa txā'wēy yuuteçxáa, ²⁴komadante' Pablo's kuartel yatte ka'ga'khaahçxa peçxuukwekaakh, txā'wē yūuna khaawāsxi'lççak pējxya'wa yu' kīh yūupa'ga nasa' txā'wē wala ūusaçxana ahçetewa jiyuya'. ²⁵Nawa tuduçpkaçxha', Pablo' na'wèk we'we kpiitana's:

—I'kwe'sxa' romano nasa's peçxujkwete ¿ewmanx? kīh yuuwetewa jiyumey.

²⁶Txā'wē we'wete', kpiitana' na'wèk pta'sxya' u'l komadante's:

—Na'wē yūuni's mpa'yajkx. Txā'wēme', naa piçthē'ja' romano nasa' jīte', ²⁷komadante' Pablo tasxte utxaaçxa pējxku:

—Isa idxa' ¿romano nasa dxihgá'? jīna. Aça' Pablo pasçxa':

—Txā'wē ĩith jīk.

²⁸Txajū' komadante we'weçxa':

—Adxa' wala vxyu dukhçxaçxáa romano nasa yuuna pa'th jīte', Pablo pasçxa':

—Adxa' upxhíi txāa yā'th yu' jīk.

²⁹Txajū' Pablo's peçxuukwewa'jsa' kuçx yuumée nvxihttxi. Aça' komadante yuhwa txā'wē romano nasatewa jiyuçxa', wala ūukhku txā'wē tudpa'ga.

Judiu nthē'jsawe'sx tasxte Pablo's txaahni we'wekahn

³⁰Judiuwe'sxa' kīh yūupa'gane'ta Pablo's açe' nawa txā'sna jiyu wēeçxa, kuskuskhē' komadante' jxkaakh sacerdote npiiçthē'jwe'sx vxite' judiu nthē'jsawe'sx jxukaysatx pkhaakhekahn. Txā'wē yūuççak kadenatx khiihçxa txāawe'sx tasxte txah Pablo's.

23 ¹Pablo' sacerdote npiiçthē'jwe'sx vxite' judiu nthē'jsawe'sx pkhaakhesatx thegçxa', na'wèk we'we:

—Yakthê'jwe'sx, adxa' ãçxpkaçx Dxus dxi'pte jxpubath sũhwa'j yu'sa' jì'phmeeth jìte', ²sacerdote npiiçthê'j Ananiasa' Pablo yuwega petxa kaakh pukate ih ùssatx. ³Aça' Pablo' na'wêk we'we:

—Ãateçáa ew we'weçxa' ùuste yu' ewmée yaakxpaga idxa's Dxus kastigaína. Idxa' ley jxkaahniçxá's kxtey yuusath ¿sũju'gá'? Txã'wêçxa' ¿kĩjxa'ga adxa's petxakaja'? Leya' txã'wê jxkaaja'çme' jìte', ⁴kxte ùssa' na'wêtx we'we:

—Dxusna selpisáa sacerdote npiiçthê'ja's txã'wê wéesxuwa'j jì'phmeeg jìte', ⁵Pablo' pasçxa':

—Dxusna selpisáa sacerdote npiiçthê'jna sũju'çme'ntka. Jiiwaça', txã'wê paswa'jmeene'tka yu'. Txã'wê yuukahmeníik Dxus librutewa na'wê pta'sxi': Iidx çxhabte jxkaahsa's juuna' we'wenu jì'k naa pa'ga.

⁶Txajũ' kxte pkhaakhesawe'sxa' saduceo vxite' fxariseowe'sx txãawe'sxtewa jiyuçxa', Pablo' na'wêk sus we'we:

—Yakthê'jwe'sx, adxa' fxariseo jì'j, fxariseo fiçxáath. Uusaawe'sxa' ki' itxí yuuwa'jsa yuhta' sũhna yaakxsath. Txãa pa'ga yuuçxáa adxa's ewmeesa' jìna ùsta'.

⁷Txã'wê we'wete', fxariseo vxite' saduceowe'sx yakh txãawe'sx pwe'sx juuna' we'weçxa puutx txuteetx. ⁸(Saduceowe'sxa' uusaawe'sxa' ki' itxi yuutxna sũju'çmeeta', sa' uute' nasaa ùus vxite' angeleswe'sx txã'wêsa ùstxna sũju'çwameeta', naapkaçxha' fxariseowe'sxa' txã'wêsa jxuka ùstxna sũju'tx, txãasatx puutx txutee.) ⁹Txã'wê yũuçxa txãawe'sx pwe'sx wala sustxi ùusçxa we'wena. Aça' fxariseowe'sx ju'gusa ley kaapiya'jsawe'sx maafí yu' kiiteçxa na'wêtx we'we:

—Naa piçthê'ja' ewmée yũusame'. Meeçxa' Dxus angel wá' yu', meeçxa' uusáa ùus wá' txã'wê vxayaa, nawa jiimeeçxa' kuçx we'wemeeyuga. Txã'wême', jiimeeçxa' Dxusa's wáa açewe'wesa yu'nja'w jì'tx.

¹⁰Seena' ùusaçxana suste', komadante' Pablo's ikhewáatxna sũhna ùukhçxa soldautx yuukaahçxa, Pablo's kutxi'khaakh pkhaakhesa kxavxyu kuartel yatnay jxũna u'khan.

¹¹Txãa kuste', Jesukristo' Pablo's vxyaaçxa na'wêk we'we:

—Pablo, ùukhnu. Ay Jerusalente na'wêg we'we adxna pta'sxna, txã'wêy we'wewa'j jì'phgu Romatewa jìk.

Pablo's ikhya' puutx we'wenu

¹²Kuskuskhê' judiuwe'sx maafí yu' Pablo's ikh wéesa na'wêtx puutx we'we: Pablo's ikhmeeçxa yu' kĩh yuhwa ù'me'nja'w jìna. ¹³Txã'wê Pablo's ikhmeeçxa yu' kĩh yuhwa ù'ya'mée puutx we'wesa' kuarenta piçthê'j jxthaakwetx yu'. ¹⁴Txã'wê yũuwa'ja's puutx we'weçxatx u'j sacerdote npiiçthê'j vxite' judiu nthê'jsawe'sx tasxna na'jìna pta'sxya':

—Kwe'sxa' Pablo's ikhmeeçxa yu' kĩh yuhwa ù'me'nja'w jìnatha'w puutx we'we Dxus dxi'pte. ¹⁵Aça' ãçxha' i'kwe'sx nthê'jsawe'sx jxuka

pkhaakheçxa mpějxwe komadante's: Kuskusa' Pablo's mkaah kwe'sx tasxte, txajx yuwe's jwee ew paapějx ya'watha'w jīna. Naapkaçxha' kwe'sxa' ayte pa'jmeyna ikhya' dxi'the yupu'nja'w jī'tx.

¹⁶Txā'wē puutx we'weçte Pablo npe'sx nçxi'k jiyuçxa', Pablo's pta'sxya' u'kh kuartel yatna. ¹⁷Aça' Pablo' jiyuçxa', teeçx kpiitana's pa'yaçxa na'wēk we'we:

—Naa luuçxa's meen pe'jna me'j komadante tasxna, txāa yakh puutx we'wewa'j ji'pha' jīte', ¹⁸kpiitana' luuçxa's pe'jçxa komadante tasxte kūhçxa pta'sxku:

—Karcelte üssa Pablo' adxa's pa'yaçxa naa luuçxa's pe'jna kaakh, ayte idx yakh puutx we'wewa'j ji'pha' jīte', ¹⁹komadante' luuçxa's kusete pu'kisna u'lçxa paaçte pějxku:

—¿Kīhga we'we wēje'? jīte', ²⁰luuçxa' pta'sxku:

—Judiuwe'sxa' na'wētχ puutx we'we: Kuskusa' idxa's pēyi'nja'w Pablo's kaakhan, judiu nthē'jsawe'sx tasxna yuuwe's jwee ew pějxya'watha'w jīçxa. ²¹Nawa txā'wē dxihna sūhçxa Pablo's kaahmeene'ga. Txā'wēme', piçthē'j kuarenta jxthaakwesa Pablo's ikhmeeçxa yu' kīh yuhwa ū'me'nja'w jīna Dxus dxi'pte puutx we'weçxa dxi'the yupna ūsta'. Sa' idx ma'jīte'wa txā'sçxāan ūythasna ūsta' jīte', ²²komadante' luuçxa's na'jīna we'weçxak kaah:

—Komadante's pta'sxthu jīna kim yuhnawa pta'sxmeene'ga jīçxa.

Ne'jwe'sx Fxelix tasxte Pablo's kaahni

²³Txajū' komadante' e'z kpiitantxi pa'yaçxa Cesarea çxhabna u'jya' pheu'khaakh. Doscientos soldau çxidaçxāa u'jwetxna, jibatewe'sx setenta, vxite' lansa ji'phsa doscientos, sa' ayjxu kasejetxna kus las nwewete. ²⁴Sa' txā'wēy Pablo a'jwa'j jibawa pheu'khaakh, ne'jwe'sx Fxelix tasxte ikhmée ew dukhkahn. ²⁵Txāawe'sx yakh karta kaakh na'wē fxi'lçxa:

²⁶Klaudio Lisias fxi'ljaçthu ne'jwe'sx Fxelixa's weçxana. ²⁷Naa piçthē'ja's judiuwe'sxa' karcelte txahçxa ikhya'watx yu'. Nawa romano nasatewa jiyuçxa', adxa' soldau yakh u'lçxa nwe'weth. ²⁸¿Kīh yūupa'gaki'tx txā'wē açe'? sūhçxa jxūna u'th judiuwe'sx nthē'jsawe'sx tasxna. ²⁹Aça' txāawe'sx ley pa'gaçxāata txā'wē açe', nawa ikhya' yu' ājawa'jmeek yu' sa' karcelte txajxa'wa ājawa'jme'. ³⁰Nawa Pablo's ikhya' yuuçxāa jīna puutx we'weçxa yupna ūsta' jīni's jiyuth. Txāasa iidx tasxte kajaçthu. Pablo's açesatxwa we'weth kīh yūupa'gane'kwe açe' nawa ne'jwe'sx tasxte u'lçxa puutx we'wene'kwe jīth. Txā'wēçxāath idxa's pta'sxi' jīnak fxi'lj.

³¹Txajū' soldauwe'sxtxi txā'wē jxkaajxā'the', Pablo's pe'jna'wa kusçxāa u'ljtx Antípatris çxhabna. ³²Kuskuskhē' soldau çxidaçxāa u'jsa' ki' sxawedtxi kuartel yatna, naapkaçxha' jibatewe'sxa' u'ljtx Pablo yakh. ³³Cesarea çxhabte pa'jçxa', karta's ūsna'wa Pablonawa dukhtxi

ne'ljwe'sxa's. ³⁴Txajū' ne'ljwe'sxa' karta's lēeyçxa' pējxku Pablo's:
 ¿Majūwe'sxga? jīna. Sa' Ciliciajūwe'sxtewa jiyuçxa', ³⁵na'wēk we'we:
 —Iidx yuuwe's jiyu'nja idxna açesawe'sx pāatxhī'khya' pa'the jīk.
 Txajū' Pablo's Herodes txaahni yatte kxuuphku thegwa'jsa txahçxa.

Pablo ma'wēsaçxawa Fxelix tasxte we'weni

24 ¹Tahç ente' sacerdote npiçthē'j Ananiasa' pa'kh Cesarea çxhabte judiu nthē'jsawe'sx yā'jçxa, sa' teeçx yuwee pu'çxsa Tértulo yaasesa'sku pe'ljçxa pa'j. Txāawe'sxa' utxaatx ne'ljwe'sx tasxte Pablo' ewmeesa' jīna pāatxhī'khya'. ²Txajū' Pablo's nuykühte', Tértulo' Fxelixa's pta'sxku:

—Weçx u'pu'ga, ne'ljwe'sx. Iidx jxkaahnite, mteewa wēt fxi'zena ūstha'w. ³Mteewa txā'wēçxaçxáa wēt fxi'zena ūstha'w, Fxelix idx txā'wē ew yūupa'ga. Txāasatha'w wala weçxá'. ⁴Nawa idxa's jwee yu' en kaavxitu'jya'wameeth, dudte meen mwēese'j kwe'sx we'weni's. ⁵Naa piçthē'ja' iiméh seena' ewmeesatewa kwe'sxa' kpajkxtha'w. Maa kiwesuwa jxuka judiuwe'sxtxi txuhdena puii kiisna ūsa'. Sa' txāaí Nasarethuwe'sxa's nwēese'jsa npiçthē'ja'. ⁶Dxuus yatte yuhwa nasa pkalsatx ka'ga'jya'wak yu' kazx vxitna. Txāa pa'ga kwe'sxa' tudtha'w, kwe'sx ley ma'wē jxkaathe' kxtey yuuya'. ⁷Nawa komadante Lisias kwe'sx yakh ja'da wala juuna' kühçxa kusa'kh, ⁸sa' açesawe'sxa' ne'ljwe'sx tasxte pāatxhī'khya' u'ljwetxna jīnak jxkaah. Kwe'sx we'weni' īsxiinimée jxuka isatewa jiyuya' idx yuu mpējx naa piçthē'ja's jīnak we'we.

⁹Txajū' judiuwe'sx kxte ih ūssawa txā' jxuka isasa yuja' jīna we'wete', ¹⁰ne'ljwe'sxa' kuseju pta'sxku Pablo's we'wekahn. Aça' Pablo' na'wēk we'we:

—Adxa' jiith idxa' wala kuh anxu yā'j kwe'sx kiwete jxkaahna ūsgu. Txāa pa'ga adxa' iidx dxi'pte ūukhmée pasya'wath adx ma'wēsaçxawa. ¹¹Idx yuu mpaapējx txāawe'sx we'weni' isa dxihtewa jiyuya'. Dxusa's Jerusalente neewe'weya' adx pa'jni doce ençxáa yuuça'. ¹²Adxa' txāa doce ensu' dxuus yatte nasatx kaapui'jna judiuwe'sx pkhaakheni yat-su çxhabte msuu yuhwa txā'wē yūuna ūsu'çmeeth. ¹³Aça' ewmée yūunisa' naata' jīna āate kaavxya'ja'jya' yu' kim yuhwa ājameetxna naa nasa'. ¹⁴Nawa āateth pta'sxi' Dxus tasxte pa'ljwal' dxi'lja's āçxh u'se kaajiyu'jnisa' īsxiinisa' jī'tx txā'snath nwēese'je' kwe'sx yaçgawe'sxtxi jxpe'jsa Dxusa's selpiina. Sa' txā'wē Dxus jxkaahni leyte fxi'ljni vxite' Dxus yuwe pta'sxsawe'sx fxi'ljnitx jxukath kxtey nwēese'je'. ¹⁵Txāawe'sxwa ma'wēne'ta Dxusa's nwēese'jna yaaki' txā'wēyçxáath adxwa nwēese'jna yaaki'. Uusaawe'sxa' ki' itxi yuutxna ewsa ma'tx yuu meeçxa' ewmeesa ma'tx yuu nawa ja'daçxah sūhnath yaaki'. ¹⁶Txāasath Dxus dxi'pte vxite' piçthē'jwe'sx dxi'ptewa yuuwemée fxi'zewa'ja's pa'pçxu'.

¹⁷Adxa' vxite kiwesu maz anxu pekūhna u'ljuçxa', adx kiwen u'th judiuwe'sxtxi vxxyu peesya' kaahnitx dukhna Dxus ofxreda'swa ūsya'. ¹⁸Adxa'

txā'wē yūuna ley jxkaahni'swa ki'sna jxā'jçxa dxuus yatte üspkaçxa', judiuwe'sx Asia kiwejuwe'sx pa'jçxa dxuus yatte uytxi. Nawa nasatx kīh yuhwa kaapui'jna üsu'çmeeth. ¹⁹Txā'wē uysaawe'sx ayte pāatxhī'khya' yuuwa'j ji'phta', adx ewmée yūuna üstewa uyçxa'. ²⁰Meeçxa' komadante pkhakte judiu nthē'jsawe'sx vxite! sacerdote npiičthē'jwe'sx kxte üssa i'kwe'sxçxáawa adx ewmée yūuni's uywá'kwe na' mpeeta'sxwe. ²¹Adxa' kxte üsçxa', Uusaawe'sxa' ki' itxi yuutxna jinaçxáath we'we txā'sna wá'kwe ewméeek yuu süju'kx jik.

²²Fxelixa's ew yā'kh pta'sxni yu', txāasak txā'wēçxáa wēse'jçxaçxáa:

—Komadante Lisias pa'the, txāa yuwe's pheu'ju'nja jičxa nvxiht.

²³Txajü' Fxelixa' kpiitana's jxkaakh:

—Pablo's txhweetenu. Nawa jwee jxthaakwe juuna' yūumée miipe'j, sa' txajx namikuwe'sx yakh puutx we'wewa'ja'swa mes jik.

²⁴Maz en skhēwniite', Fxelixa' txajx nyu Drusila yakh ki' kühçxa Pablo's pa'ya kaakh, Jesukristo pta'sxni's we'wekahn. Txāa u'ya' judiuk yu'. ²⁵Aça' Pablo' pta'sxku Dxus dxi'pte ew fxi'zewa'ja', sa' peekx kakwe's ewmée yūuna jxpe'jwa'jme'. Txā'wēme', nmeh ente' Dxusa' kastigaína jina we'wete', Fxelixa' wala üukhçxa na'wēk we'we:

—Äçxhíi yu' txā'wēçxáa mpeeta'sx. Vxite ente adx en ji'phuçxa ki' pa'ya'nja jik.

²⁶Pablo' vxyu dukhe'nja txhwetekahn jiwánaa sühçxak txā'wē maz uswa pa'ya Fxelixa' txāa yakh puutx we'weya'. ²⁷Txā'wē e'z anxupkaçx Pablo's karcelte jxpe'jna üsçxaçxáa Fxelixa' ne'jwe'sx kasejk, aça' vxite ne'jwe'sx Porcio Fxestok u'ka. Nawa Fxelixa' judiuwe'sx yaaçeni fxi'ze wēemeeçxa, Pablo's karcelte nvxihtku.

Pablo' Fxesto tasxte we'weni

25 ¹Txajü' Fxesto' Cesarea çxhabte ne'jwe'sx u'kaçxa', tekhte ente' Jerusalenna u'kh. ²Kxte' sacerdote npiičthē'jwe'sx vxite' judiu jxtuhthesawe'sxa' utxaatx Pablo' ewmeesa' jina pāatxhī'khya'. ³Sa' Pablo's pe'jya' mkaah Jerusalenna yuukahn jīnatx pējx. Txāawe'sx yu' dxi'the ikhya' sühçxatx txā'wē pējx. ⁴Nawa Fxesto pasçxa':

—Pablo' Cesareate preesu üsa'. Aça' maz enteçxáa adxa' txāa çxhabnaíi ul'jweçthu. ⁵Txāasath na'jī': Txāa piçthē'j ewmée yūuni's pāatxhī'khwa'j ji'phçxa', i'kwe'sx jxtuhthesawe'sxa' adx yakh yuwetxna Cesarea çxhabna jik.

⁶Fxesto' Jerusalente oçxo en jxthaakwe üsçxaçxáa ki' sxawedku Cesarea çxhabna. Sa' kuskuskhē' yuwe paapēyni yatte u'kaçxa kaçxna'wa, Pablo's yuukaakh. ⁷Sa' kūjuçpkaçxha', judiuwe'sx Jerusalenuh pa'jsawa utxaatx kīhtewa seena' ewmeesa' jina pāatxhī'khna. Nawa isasa yuja' jina āate kaavxya'ja'jya' yu' ājameeta'. ⁸Txajü' Pablo' na'wēk pas:

—Adxa' kīhte yuhwa yuuwemeeth. Judiuwe'sx ley, Dxus yatna, Romate jxkaahsa Cesar maate yuhwa yuuwemeeth jīte', ⁹Fxesto' judiuwe'sx yakh ewte neeyūu wēeçxa na'wēk pējx Pablo's:

—¿Jerusalenna u'jwēega' iidx yuwe's kxte pheu'khan? jīte', ¹⁰Pablo pasçxa':

—Adx yuwe's pheu'jwa'jsa tasxte yā'j ūsthu, Cesar ki'pni iidx tasxte. Adxa' judiuwe'sx yakh kīhte yuhwa yuuwemeetewa idxa' ew jiig.

¹¹Meeçxa' adx uuwa'the āhwáane'tka yuuwe yuu aça' txā'wēte yu' uuwa'ja's wa'lme'nja. Nawa pāatxhī'khnisa kih yuhwa isameete yu', kim yuhwa pāatxhī'khsa kusete adxa's dukhya' ājameena. Wejxwa Cesar paapēyni wejx ewna jīte', ¹²Fxesto' vxite npiiçthē'jwe'sx yakh puutx we'weçxa', na'wēk pta'sx Pablo's:

—Cesar paapēyni wejx ewna jī'g na' txajx tasxte pa'j u'jwene'ga jīk.

¹³Txajū' maz en skhēwniite', jxkaahsa Agripa vxite' Berenice yakh Cesarea çxhabte pa'jtx Fxesto's weçxaya'. ¹⁴Kxte kuh entxi ūsu', aça' Fxesto' jxkaahsa's pta'sxku Pablo yuwe's:

—Ayte teeçx piçthē'j preesu ūsa', Fxelix nvxiitni. ¹⁵Adx Jerusalente ūste', sacerdote npiiçthē'jwe'sx vxite' judiu nthē'jsawe'sx pāatxhī'khtxi txāa piçthē'ja's ewmeete nvxiitkahn. ¹⁶Aça' adxa' pta'sxthu:

Romanowe'sx leya' maa yuhnawa ikh kaja'çme', pāatxhī'khsa yuuwesa yakh kaapdxī'pu'jçxa kim yuuwetewa jiyumey yu'. ¹⁷Txajū' adxa' jxthēyuumēe pāatxhī'khsawe'sx pa'jaçpkaçxa', kuskuskhē' yuwe paapēyni yatte u'kana'wa txāa piçthē'ja's yuukaath. ¹⁸Sa' ¿kih yūupa'ga yuuwexx? sūhna ūythasnath u'pu', nawa pāatxhī'khyā' utxasaawe'sxa' ma'wē yuhwa ewmeete nvxiit-ya' ājawa'jmeesaçxáanatz we'we. ¹⁹Txāa piçthē'ja's acesawe'sxa' txāawe'sx Dxusa's neewe'wena fxi'zeni vxite' teeçx piçthē'j Jesus yaasesa uuçxawa ki' itxi yuuk jīna Pablo pta'sxni'sçxáatx we'we. ²⁰Txāa yuwe's adxa' ma'wē pheu'jya'wa ājameeçxa', Pablo's pējxthu: ¿Jerusalenna u'j wēega' kxte iidx yuwe's pheu'khan? jīna. ²¹Nawa txāa we'weçxa': Cesar paapēyni wejx ewna jīk, aça' txā'wē yā'the', aytee preesu ūsune'ga Cesar tasxte adx kaahpkaçx jīnath we'we.

²²Txajū' Agripa' na'wēk we'we Fxesto's:

—Txā'wēyā'the', wēse'je'nja txāa piçthē'j we'weni's jīte', Fxesto pasçxa':

—Kuskusī wēse'jene'ga jīk.

²³Kuskuskhē' jxkaahsa Agripa vxite' Berenice vxite' soldau npiiçthē'jwe'sx vxite' çxhabte jxtuhtesa txāawe'sx yakh seena' zhiçxkwe susna u'kana kūhtx Fxesto u'pnite. Naapkaçxa' Pablo's yuu kaahçxa', ²⁴Fxesto' na'wēk we'we:

—Jxkaahsa Agripa vxite' ayte pkhaakhena kwe'sx yakh ūssawe'sx ksxavxyte txajaçthu naa piçthē'ja's. Judiuwe'sx maazkuēesawa naa piçthē'ja's açewe'we'tx Jerusalente vxite' aytewa, sa' ikhteçxáa ewna jīna nestxi yu'. ²⁵Nawa txā'wē ikhkahnwa kīhtewa yuuwemeena'k thegu'. Nawa txāaíik Cesar paapēyni wejx ewna jī'. Aça' txajx tasxna kaja'nja sūju'th. ²⁶Nawa kīhte yuuwetewa txā'sna pta'sxna jxkaahsa's fxi'jwa'j

yu' uymeeth. Txãasa açxha' jxkaahsa Agripa iidx tasxte txajaçthu, vxite' jxukaysa dxi'pte, aça' idx paapējçxça kīhte yuuwetewa kpajkçxça pta'sxte adxa' eça's fxi'ljçxça kaja'nja. ²⁷Txã'wēme', kxulna'k thegu' preesu kaahçxawa yuuwe yuuni's pta'sxmeete '.

Pablo' txajx yuwe's jxkaahsa Agripa's pta'sxni

26 ¹Txajū' Agripa' na'wēk Pablo's we'we:
—Idx kīh yūuna fxi'zeçxawa mpeeta'sx jīte', Pablo' kuse's kiisçxça na'wēk pta'sx:

²—Judiuwe'sxa' adxa's ewmeesa' jīnatx pāatxhī'khe' txã'sa' jxkaahsa Agripa iidx dxi'pte āate pta'sxwa'ja's ji'phuçxça' wala weçxça'th. ³Idxa' jxuka ew jiiig kwe'sx judiu' ji'lj fxi'zeni vxite' na'wē fxiyfxiyçxah yajkçxça puutx we'we'tha'w txã'sna. Txãasa wejx wa'lmée mwēese'j.

Kristo's jxpa'gamey Pablo fxi'zeni

⁴Adx le'çxkuējūjx ma'wēne'tka fxi'ze adx kiwete vxite' Jerusالente txã'sa' judiuwe'sx jxukaysa jiita'. ⁵Fxariseowe'sxa' seena' juuna' jxkaaja'tx Dxus leya's jxuka kxtey yuukahn adxa' txāatewe'sxth yu' piçtakxtey, aça' txāawe'sxa' jiita' na' txã'sa' pta'sxya' ājatxna wa'lmeeçxça yu'. ⁶Dxusa' kwe'sx yaçgawe'sx yakh puutx we'weçxça uusaawe'sxtxi ki' itxi vxitya' neeyūuk txã'sa' kxtey yuuna sūhnath fxi'ze', naa pa'ga yuuçxāatx paapējxya' ayte nuypa'j. ⁷Jxkaahsa Agripa mjiyu: Israelwe'sx docesate ji'lj jxukaysatx ki' itxi yuuwa'ja's ūythasu', txāasatx een isa petx kus Dxusa's selpi'. Txã'wē yūuwa'ja's ūythaspa'ga yuuçxāatx judiuwe'sx adxa's ewmeesa' jīçxça açe'. ⁸Dxusa' txã'wē uusaawe'sxtxi itxi vxituna çsūju'çmeekwe' wakx i'kwe'sxwa'?

Dxus yakh fxi'zesatx pkxuuni's pta'sxni

⁹Adxa' nyafxíia' Jesus Nasarethuwe'sxa's ahçeçxça kīhwa yu'nja sūhçxça, ¹⁰Jerusalente sacerdote npiçthē'jwe'sx jxkaathe', Jesus kaapiya'jni's nwēese'jsawe'sx maazkuēesatxwa karcelte txahth. Sa' ikheçte uyçxça', ew yuh yuuçta' sūhnath fxi'ze'. ¹¹Maazkuēe uswa iipkxuuth, Jesus yase's açewe'wekahn. Msuuwa judiuwe'sx pkhaakheni yat-su txã'wēçxçaçxāath yuu. Sa' seena' pxūuskwe yuute', vxite kiwesuwa u'th, txã'wēy ahçeçxça pkxuuya'.

Pablo' Dxus yakh fxi'zeyā' utxani's ki' pta'sxni

(Hch 9.1-19; 22.6-16)

¹²Txã'wē yūuya' sūhçxça, Damasko dxi'lj u'ljweçthu yu', sacerdote npiçthē'jwe'sx kaahni. ¹³Nawa jxkaahsa mwēese'j: dxi'the u'ljweçte ēepxāh yuuçpkaçxha', sekte jxthaakwe eena'sa ēejū kweethku adx vxite' pi'kxna yuusāa jxukaysatx. ¹⁴Txajū' jxukaysa wetetha'w, naapkaçxha' adxa' wēse'th

hebreo yuweju na'wě we'weni's: Saulo, Saulo, ¿kĩjxa'ga adxa's ahçeçxa pkxuuya' pakwé'? Idxa' peekiçxáa ya'kpā'yuuwa'ja's pakwena ũsgu jīte',¹⁵ pējxthu: ¿Idxa' kimga? jīte!', pta'sxku: Adxa' Jesusthu, idx na'wě ahçeçxa pkxuuya' pakwe'g txāath. ¹⁶Nawa āçxha' mkiite. Āçxh na'wě vxyaath sa' vxite entewa vxya'nja, aça' txā'wěk vxyaa jīna mteewa pta'sxya' u'ljwene'ga adxna selpiina. ¹⁷Idxa's nwe'we'nja judiuwe'sx kuseju, sa' judiu jil'mée vxite nasa kiwesu kajaçthu kxsūwa nwe'we'nja. ¹⁸Txāawe'sx tasxsu kajaçthu, aça' idxa' txāawe'sx yafxtxi phaadene'ga, peena yu' çxhi'dxte fxi'zemée eena'sa's uykahn, sa' eçxthē'j kusete fxi'zemée Dxus yakh fxi'zekahn. Adxa's jxpa'gasa' txāawe'sx pkaltxi peltunāyni neeyüuçxa cielute ũswa'ja's jxpa'gatxna Dxus txhitxhnisawe'sx yakh ja'daçxah jik adxa's.

Pablo's Kristo vxyaaçxa jxkaahni's kxtey nwēese'jni

¹⁹Agripa, idxa'sthu pta'sxi': Txā'wě vxyaaçxa we'weni's wa'lmée kxtey nwēese'jçxa ²⁰Damaskote ũssawe'sx khuē'tytxi pta'sxthu Dxus yuwe's, e'su' Jerusalente, vxite' Judea kiwesu jxuka. Sa' judiu jil'mée vxite nasatxwa pi'kxthu, pkaltxi nvxihtçxa Dxusa's pakweçxa ew yūuna mfxi'zewe jīna. ²¹Txā'wě yūupa'gatx judiuwe'sxa' dxuus yatte adxa's tudçxa ikh wēe. ²²Nawa Dxus pu'çxte', āçxpkaçx Dxus yuwe's le'çxkwe yuhwa jxpubameeth pta'sxna fxi'ze' jxtuhthesa ma'tx yuu ma'wēsatsxwa jxukaysatx. Sa' Dxus yuwe pta'sxsawe'sx vxite' Moises pta'sxni txāaju багаçxte yuhwa fxiy yu' pta'sxi'çmeeth. ²³Txāawe'sxa' na'wētç pta'sx: Dxus tasxuh yuusa Kristo' wala pxthaa yuuçxa uuçxawa ki' txāa khuē'y itxī yuuna, sa' eena'te fxi'zewa'ja's pta'sxina kwe'sx jil'jtx txā'wēy vxite kiweju nasatxwa jīnatx pta'sx. Txā'wēyçxáath adxwa pta'sxi'.

Pablo' Agripa's Kristo tasxte kuutxa'ja'jdxijk

²⁴Pablo txā'wě we'wete', Fxesto' na'jīnak sus we'we:

—Pablo, luuku yuunig. Jwee wala piyaçxane'ga txā'wě luuku yuu jīte',
²⁵Pablo pasçxa':

—Ne'jwe'sx Fxesto idxa' mjiyu: Adxa' luukumeeçxa íith ũus yajkxçxa jxpubamée isasaçxáana pta'sxi'. ²⁶Txāa yuwe's jxkaahsa Agripa ayte u'pa' txāawa ew jiia'. Txāa pa'gath adxa' thaamemée pta'sxi' txajx dxi'pte. Naa yuwe' paaçte sūthçxa we'wenisame'. Txāa pa'ga jxkaahsawa txāa yuwe's ew jiina sūju'th. ²⁷¿Dxus yuwe pta'sxsawe'sx we'weni's ew jiiyuhmeegá' wakx, jxkaahsa Agripa? Idxa' jiiyuhne'ga sūju'th jīte', ²⁸Agripa' na'wěk we'we:

—Adxa's Kristo ju'gu vxit-ya' le'çxkuēeg pejii jīte', ²⁹Pablo we'weçxa':

—Le'çxkuēe ma'k pejii meeçxa' wala ma'k pejii nawa idxçxáamée, ayte āçxh wēse'jna ũsta' txāawe'sx jxukaysatxku Kristo ju'gu yuu jxthāasu' Dxusa', adxwa ma'wētka Kristo ju'gu yuu txā'wēy, nawa kadenaju tudnimée.

³⁰Pablo txā'wē we'wete', jxukaysa kiitetx, jxkaahsa, ne'jwe'sx, Berenice kxte ih pa'jsa jxuka. ³¹Sa' fxiitx txuteena u'j, na'jīna puutx we'weya' txāawe'sx pwe'sx:

—Naa piçthē'ja' kīh yuhwa yuuwemeesa' ikhkahn yuüwa. Sa' karcelteçxāa yuhwa ūswa'j ji'phme' jīçxa', ³²Agripa' na'wēk we'we Fxesto's:

—Txā'wē txāaí Cesar paapēyni wejx ewna jīmeewaça', naa piçthē'ja's txhweteya' ewna jīk.

Pablo's Roma çxhabna kaahni

27 ¹Italia kiwen kwe'sxtxi kaajxa' puutx we'weyā'jçxa', Pablo vxite preesu yā'jçxa dukhtxi Batalxón Augusto yaasesate kpiitan Julio kusete. ²Txajū' Adramitio çxhabte barko Asia kiwen u'jsate khēetha'w, aça' Aristarkowa yuwe'k, Macedonia kiwete Tesalónika çxhabtewe'sx. ³Kuskuskhē' Sidón çxhabte pa'tha'w. Aça' kpiitan Julio' Pablo's namiku yat-suk pa'jya' kaah txāawe'sx sā'jīkahn. Txāa kpiitana' Pablo yakh wala ewsa yu'k, txāasak txā'wē yūu. ⁴Sidón çxhabuh kasehçxa', Çxipre kiwe's jebu ju'gutha'w nvxihtna khēw, wejxa yuppa'ga. ⁵Txajū' Cilicia Panfxilia kiwesu utxa skhēwna u'jçxa, Lisia kiwete Mira çxhabtetha'w pa'j.

⁶Kxtea' soldau kpiitana' teeçx barko Alejadiajuwe'sx Italia kiwen u'jsa'sku uy. Sa' kwe'sxtxi kxtek kaateka'j txajū ki' u'jya'. ⁷Nawa txā'wē wejxa yupna ūste', wala kuh en tuudkuēçxah u'jçxa, wala thēy pa'tha'w Gnido çxhab dxi'pte. Txajū u'jçxa', Salmon kiwee dxi'psutha'w skhēw, Kreta kiwesu ta'guna. ⁸Sa' txāa kiwe pukasu wala thēy u'jçxa, teeçx ahte pa'tha'w Bwenos Pwertos yaasesate. Txā' Lasea çxhab utxatek neeyū'.

⁹Txā'wē thēy u'jçxa wala en ivxiitpa'ga, nus pa'jwa'j en utxaak ikhte u'jwa'j seena' ūukhūukhsa. Txāa pa'gak Pablo' yu'kxpeh ¹⁰na'jīna:

—Jxukaysa mwēese'jwe, kwe'sx u'jwa'ja' wala ūukhūukha'. Barko petx karga vxituna, aça' kwe'sxwa uuwa'ja's ji'phuwá'nja'w.

¹¹Txā'jīte'wa, soldau kpiitana' Pablo's nwēese'jmée barko namu vxite' barko thegsawe'sx we'weniçxá'sku nwēese'j. ¹²Kxte çxhaba' nus ente ūswa'j ewmeek yu'. Txāa pa'gatx jxukaysa u'jya' yajkx Kreta kiwete Fxenice çxhabte pa'jçxa nus ena's kxte yu'skhēwya' sūhçxa, Fxenice çxhabte' nus ente ūswa'j ūukhūukh meek yu' naa pa'ga.

Mar pxāhte wejxaa wala kiitēni

¹³Bwenos Pwertos yaasesajū kasejeçte yu', wejkuēçxáak wejxana ūsu', aça' Fxenice çxhabte pa'jya' ājawá'nja'w sūhçxa u'jtx Kreta kiwe pukasu tuudkuēçxah. ¹⁴Nawa wejkuē u'jweçpkaçxha', wejxaa wala kwe'sx u'jwa'j dxi'puh sēhçxa barko's yupku. ¹⁵Sa' txajūyā'ja' ma'wēwa jxūna u'kh. Aça' barko's kaajxa' ājameeyā'jçxa', kuçx yuumeetha'w wejxa ma'wēwa jxūna u'khan. ¹⁶Īkh pxāhte kiwe le'çxkuēsa Klauda yaasesa e'ssutha'w

skhēw, kxsūa' wejxa txakwe çxhāçxhameek ūs yu'. Aça' barko le'çxkuē jxūçxa u'l'nisa's wala thēyçxáawa kaateka'l'jya' ājātha'w barko walate. ¹⁷Txajū' barko wala's lasu walaju pxājūjx tudtha'w suweekahmen. Sa' txitx wala Sirte yaasesate wáa waçuya' u'jwena sūhna ūukhçxa, ēete tela wala's spajkxtxi wejxa ma'wēwa barko's jxūna u'khan. ¹⁸Txā'wē wejxa seena' çxhāçxha ūste', kuskuskhē' karga's ìkhhē pūsxya' takhtxi. ¹⁹Aça' tekhn en yuuçte', kwe'sxíwa ìkhhē pūsxya' pu'çxtha'w barko ēseekahn. ²⁰Txā'wē wejxa seena' yuuna ūste', sek, estrelxa, kīh yuhwa vxyaameeta' maazkuēe enwa. Aça' kwe'sx yuuwa ìtxī yuume'nja'w sūhwa'l'ja'çxáatha'w ji'phu'.

²¹Txā'wē maazkuēe en kīh yuhwa ū'mée yuhna ūssatx Pablo' na'wēk we'we:

—I'kwe'sxa' adx we'weni's nwēese'l'çxa Kreta kiwejū kasehmeewaça', na'wē nxus knayna ivxiituwa'l'jmeene'tka'w yu'. ²²Nawa āçxha' ūukhnuwe. Ayte u'l'jsa kim yuhwa uumeetxna, makwe barko yu' suweeçxa vxitutewa. ²³Adxa' Dxusna selpisaath, aça' āçxh kus Dxus angel vxyaaçxa ²⁴na'wēk we'we: Pablo, ūukhnu. Idxa' Romate jxkaahsa tasxte utxaawa'l'ji'phgu, aça' txāa pa'ga Dxusa' nwe'weya'wa' ay barkote u'l'jsa jxukaysatx jīk. ²⁵Txāa pa'ga i'kwe'sxa' ūukhmée çxhāçxha miijajkxwe. Adxa' Dxusçxáanath yaaki', angel we'weni' kxtey yuuna sūhna. ²⁶Sa' ìkh pxāhte kiwe le'çxkuēsate nvxiitni yu'nja'w jīk Pablo'.

²⁷Adria ìkhte wejxa jxūna u'l'jni e'z ki'su ājaçte', txāa kuspxāh yuuçpkaçxha', barkote thegsawe'sxa' kiwe utxasu u'l'jweççxatx jiyu. ²⁸Sa' makhwe ìkh dxiitewa jiyuya' isatx, aça' treinta y seis metroçxáak dxii yu'. Txajū' yaç yaçte u'l'çxa ki' isatx, aça' kxtea' weintisiete metroçxáak dxii yu'. ²⁹Txajū' penxate wáa iika'nja'w sūhna ūukhçxa, barko's neewewa'l'jsa pahz çam walatx ìkhhē akh barko e'skhē, wejxa jxūna u'khamen. Sa' wala ūukhna ūythastxi khijjxpkaçx. ³⁰Naapkaçxha' barkote thegsawe'sxa' barko yaçkhē vxite çam walatx ìkhhē akheçtha'w jīnaçxáa barko le'çxkuē's ìkhhē spaakiçtxi yu', txāate khēeçxa kasehna u'l'j wēeçxa. ³¹Nawa Pablo' pta'sxku soldau kpiitan vxite' soldauwe'sxtxi:

—Naawe'sxa' barkojū kasehna u'the', i'kwe'sxa' ìtxi yuumeene'kwe jīte', ³²soldauwe'sxa' barko le'çxkuē tudni lasutx spē'thçxa ìkhhē wāatahtx barko le'çxkuē's.

³³Txajū' Pablo' kusítey neewe'wek jxukaysatx kīhçxáawa ū'kahn:

—I'kwe'sx dehmeé txā'wēy ū'wamée ūsni e'z ki'su yā'l'j yuuça'.

³⁴Aça' i'kwe'sxtxi neewe'we'th kīhçxáawa ū'kahn. Txā'wēme', kasejxa' ya'çxhāçxhameena. Āçxha' ūukhnuwe. I'kwe'sx maa yuhwa vxitumeene'kwe.

³⁵Txā'l'jīna'wa, Pablo' jxukaysa dxi'pte Dxusa's weçxaçxa pana's ū'k.

³⁶Txajū' jxukaysa wejx ūukhmée txāawe'sxwa ū'tx. ³⁷Barkote u'l'jsa jxukaçxah yu' doscientos setenta y seis nasatha'w yu'. ³⁸Kīh ū' wēeçxawa

txā'sna ũ'na jxā'jçxa', skuutxha's ïkxkhê pũsxtha'w barko jweeíçxáa ěseekahn.

Barko ïkh dxiikhê khēeni

³⁹Khijxna jxā'jnite', barkote thegsawe'sxa' jiyumeeta' maa kiwete pa'jçxawa. Nawa ïkh pukasu kiwe ukwesa u'pte uyçxa', kxte nuypa'jya' ājāwá'nja'w sũhçxa kxtetx u'jya' yajkx. ⁴⁰Sa' çam wala ïkh dxiikhê akhnisa lasutx spē'thna'wa, tela's ěete ki' kiisçxa, barko's tuudkuẽçxah jxūna u'jtx ukwete pa'jya'. ⁴¹Nawa teeçx ahte ïkh jwee yu' dxiimeete yu' seena' çxhāçxha ukapajxna ũsu'k kxtek kũjxa' u'j barko'. Aça' barko içha' kiwete waçuna kũhte', ma'wē yuhwa ěeme', naapkaçxha' barko' esu yu'tũçxhasáa ujkana kũhçxa jxuka suwuuçku yu'. ⁴²Txā'wē yuuçte', soldauwe'sxa' preesutx jxuka ikhya'watx yu', pehdna kasehçxa iyuwe'sxte. ⁴³Nawa soldau kpiitana' Pablo's nwe'weya' yajkxku, sa' kiikhe'jmeeçxa na'wēk jxkaah:

—Maawa pehdxa' jiisa' i'kwe'sx khuē'y yaçte me'jwe, ⁴⁴naapkaçxha' vxite' taplasu mkhēewe, meeçxawa barko pe'lasu txā'wē yũuçxa mkaasehwe jite', txā'wē yũuçxa jxukay kiwete pa'tha'w uumée.

Malta kiwete Pablowe'sx pa'jni

28 ¹Kxte jxukaysa uumée pa'jçxatha'w jiyu txāa ïkh pxāhte kiwe' Malta yaase yu'. ²Kxte u'psa nasa' kwe'sxtxi wa'lmée jxpa'gaçxa, ipx wala yuthçxa kwe'sxtxi bajçxya' pi'kxtxi, nus txā'wē wala pa'jna ũspa'ga. ³Txajū' Pablo' e'kx uhdx pkhakhçxa, ipxte āsxiçku yu', naapkaçxha' txāa ipx pxājū ul weeswee ũphna kasehçxa Pablo kusetek wa'kx. ⁴Txā'wē Pablo kusete ul wa'kxte', kxte ũssa' na'wētx we'we txāawe'sx pwe'sx:

—Naa piçthē'ja' nasa ikhsana. Makwe ïkhte yu' uumeetewa, Dxusa' itxi u'ju jxthāasmeene' jī'tx. ⁵Aça' Pablo' kuse's yahtaçxa ula's ipxkhē akhku, nawa txajx kuse yu' kīhwa yuume'. ⁶Aça' nasa thegna ũssa yu' ¿Ma'wēn uukx? sũhna jxukaysa ũythasnatx ũsu'. Nawa kīhwa yuumeyna wala txaçx yuute':

—Pablo' nasa ikhsamée wejxwa Dxusna jī'tx.

⁷Txāa kiwete teeçx ne'jwe'sx jxtuhthesa u'pu'k Publio yaasesa. Txajx uuthasx ja'datetka'w pa'j kwe'sxa', aça' txāa piçthē'ja' kwe'sxtxi wala ew jxpe'kh tekh enpkaçx. ⁸Txāa ensu' Publio neya' āça'naga ũsu' kakwesekte eeçxáa uçxi'çxçxa. Aça' Pablo' thegya' u'jçxa, peekizeçxa Dxus yakh puutx we'wete', çxhāçxhak. ⁹Txajū' txāa kiwete vxite āça'sawe'sxwa pa'jçxa', jxuka katxhiçxatx neeyū. ¹⁰Txajū' kwe'sxtxi wala peeygāhçxa kijkihwa dxi'the peejini's jxukatx pees, barkote khēeçxa ki' u'jya'wagaçxha'.

Roma çxhabte Pablo pa'jni

¹¹Malta kiwete tekh a'te ũsçxaçxáa, Alejadría kiwejuwe'sx barko kxte ũsu'k nus piipkaçx txāate khēeçxatha'w u'j. Txāa barko' yaçte e'z dxus

ĩtximeesatxku piisani ji'phu!, Kastor vxite! Polux yase ji'phsa. ¹²Txajũ kasehçxa!, Sirakusa çxhabte pa'ljçxa, tekh entha'w ũsu!. ¹³Txajũ ki' u'tha'w kiwe pukagaçxaçxáa, sa' Regio çxhabtetha'w pa'lj. Kuskuskhē' e'su wejxa sēhte!, thēymée u'ljya' ājaçxa e'z enkhē' Puteoli çxhabte pa'tha'w. ¹⁴Kxtea' puutx uytha'w yakthhē'jwe'sxtxi, aça' txāawe'sxa' pi'kxtxi txāawe'sx yatte teeçx ki'su ũskahn. Txajũ kasehçxatha'w Roma çxhabna u'lj. ¹⁵Romate yakthhē'jwe'sxa' kwe'sx yuhtewa jii yā'tha' yu!, sa' teeçx ahte Tres Tabernas yaasesa utxate teeçx çxhab ũsu'k Fxoro de Apio kxteta pu'thegya' yuwé!. Aça' Pablo' txāawe'sxtxi uyçxa!, Dxusa's wala weçxana ũuste wēt wētku yajkx.

¹⁶Romate pa'ljna'wa, soldau kpiitana' vxite preesutxi' dukhku kxte karcelte thegsa npiiçthē'ja's, nawa Pablo yu'sa' vxite yatte fxiik txah teeçx soldau thegwa'jsa txahçxa.

Roma çxhabte pa'ljçxa Dxus yuwe's pta'sxni

¹⁷Kxte pa'ljni tekh en skhēwniite!, Pablo' pa'ya kaakh kxte Romate judiu npiiçthē'jwe'sxtxi. Sa' pkhaakhetē!, na'wēk we'we:

—Adxa' kīhwa ewmée yu' yūumeeth judiuwe'sxtxi, sa' kwe'sx yaçgawe'sx kaapiya'ljni'swa ahçena fxi'ze'çmeeth. Makwe txā'wētewa, Jerusalente adxa's tudçxa romanowe'sxtxi dukhtxi. ¹⁸Aça' romanowe'sxa' paapējxtxi, nawa ewmée yūuni's yu' uymeççxa!, adxa's txhweete wēetx ikhwa'the nvxiht-ya' yu' ājameeçxa. ¹⁹Txā'wētewa, judiuwe'sx yu' kaatxhwete'ljmeeta!. Aça' txā'wē yā'the!, adxa' romanowe'sxtxi jxkaahsa Cesara'sthu pi'kx adx yuwe's paapēykahn. Nawa judiuwe'sx adxna preesu'jsa yuutxi' pāatxhī'khya'wameeth. ²⁰Txāasath i'kwe'sxtxi pa'ya txā'ljina pta'sxya!. Israelwe'sxa' ũythasu'tha'w Dxus tasxuh yuusa Kristo's txāa pa'ga yuuçxáa adxa' na'wē kadenaju tudni ũsthu.

²¹Txā'wē pta'sxte!, na'wēt x we'we:

—Judeajũ idxna nuywe'wena kaahni karta kīhwa iijxpa'gameetha'w kwe'sxa!, txajũ judiuwe'sx pa'ljçxawa pta'sxi'çmeeta' idxa's açewe'weni yu'sa!. ²²Åçxh u'se pta'sxni's mteewa jxukatx açewe'we!, aça' txā'sa' idxa' çmaa sūju'ga? Iidx yaakxni's jiyu wēetha'w jīçxa!, ²³vxite ente ki' pa'ljya' neeyūuçxa txāa en āhte!, wala kuh pkhaakheçxa pa'ljtx Pablo ũsni yatte. Aça' Pablo' kusí pta'sxçxa kusna kīhpkaçxku pta'sx Dxus jxkaahwa'lja's. Sa' Moises fxi'ljni ley vxite! Dxus yuwe pta'sxsa txāniiteywe'sx fxi'ljni ma'wēçxahne'ta Jesusa's we'wena fxi'lj txā'snak āate kaajiyu'lj. ²⁴Aça' maafí yu' Pablo pta'sxni's wa'lmeetx jxpa'ga, nawa vxite yu' wa'ltxi. ²⁵Txā'wē maafí yu' nwēeselj wēemeççxa txuteena u'ljweçte!, Pablo' na'wēk txāawe'sxtxi we'we:

—Dxus yuwe pta'sxsa Isaiasa's Dxus Espiritu kwe'we'the!, isa yuh na'ljina pta'sxne! kwe'sx yaçgawe'sxtxi!:

²⁶U'ljçxa txāa nasatxi' na'ljina mpeeta'sx:

I'kwe'sxa' wēse'jçxawa, jiyumeene'kwe.

Meeçxa' uyuwá'kwe, nawa jiyumeene'kwe.

²⁷ Txãa pa'gategy txãawe'sx ũuste jiyuwa'j yu'sa' ji'phmée yã'tha',

Sa' wēse'jya'wa wa'lu'tx.

Txãawe'sx yafxa' aphanita', uymeeçxa' nwēese'jmeetxna.

Sa' ũustewa ew jiyumeetxna.

Sa' adx tasxtewa utxameetxna pkaltxi peltunãykahn jīnak we'we.

²⁸ I'kwe'sxa' mjiyuwe: Ñçxhūyã'ja' Dxus ewte nvxiitwa'ja's judiu ji'jmée vxite nasaçxáatx pta'sxwa'ja', aç'a' txãawe'sxa' nwēese'jetxna.

²⁹ Txã'wē Pablo we'wete', judiuwe'sxa' txãawe'sx pwe'sx wala kuh jwed we'wena u'jtx.

³⁰ Pablo' e'z anxu utak yat pki'jçxa txaahni ũsu', sa' kxte thegya' pa'jsatx jxukaysatxku jxpa'ga'. ³¹ Kxtea' kim yuhwa kuçx yuuniméek fxi'ze' Dxus jxkaahwa'j ena's pta'sxna, txã'wēy Jesukristo kaapiya'jni'swa ãatek pta'sxna fxi'ze'.